

蛟峰文集

方逢辰

文碩閣

wenshuoge.com

目录

关于我们	3
提要	5
卷一	6
卷二	14
卷三	24
卷四	31
卷五	35
卷六	41
卷七	50
卷八	63
蛟峯外集卷一	69
蛟峯外集卷二	73
蛟峰外集卷三	79
山房先生外集卷四	89

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

钦定四库全书 集部四

蛟峯文集 别集类三【宋】

提要

【臣】等谨案蛟峯文集八卷宋方逢辰撰逢辰初名梦魁字君锡淳安人登淳佑十年进士第一理宗改赐今名官至吏部侍郎以母忧归德佑初徵拜礼部尚书会父疾未赴宋亡元世祖诏御史中丞崔彧起之于家以疾坚辞不出至正间修宋史有司不得其事状故不为立传惟黄潛集中有所作逢辰墓表尚略见其始末明邵经邦作宏简录始为补传然亦据潛所述不能有所增益也是集乃其五世从孙蒙城知县渊等所辑正集八卷前七卷为逢辰诗文末一卷附以其弟逢振所作逢振字君玉景定中登进士官至太府寺簿亦国亡之後抗节不仕者也外集四卷则其七世从孙玉山知县中所续辑凡逢辰历官诰勅及酬赠诗文皆在焉逢辰当丁大全贾似道柄国之时皆能力抗其锋持正不屈其提点川东刑狱及爲江西转运副使政绩亦俱有可观惜其遗篇散佚所录奏劄惟宝佑三年请除内竖一疏尚存余若论雷变论边备论吴潜去位贾似道匿败诸劄子皆平生建白之最着者墓表略见大槩而悉不载于集中其所掇拾大抵案牘简札之文爲多而策问一首至并考官评语载之盖散佚之余区区搜辑而成故不免识小而遗其大矣乾隆四十六年四月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

卷一

钦定四库全书

蛟峯文集卷一

宋 方逢辰 撰

申状奏劄

辞建状元楼

某照得本县见差修造司打量基址欲议建楼问之则曰为某设也此固是鄉邦胜观贤令尹之盛心於某何辞然某为见田里瞽瞍县庭烈烈某自束发读父书便以致君泽民自任每观后稷视天下饥由己饥之伊尹见一夫失所若已推而纳之沟中作而叹曰彼何人也某仰蒙圣渥尘忝甲科则又将以致君泽民之责自任矣爰自期集来归闭户焚香置书一卷将前贤事业日夜讨论将天下利害日夜静思求所以报君父而慰苍生岂有虑周四海而不及父母之邦乎且淳之为邑吏猾民贫斧斤之余元气有几遭霜之叶不可以风毒民之尤莫如里役一人之身责之警捕责之风火责之桥道责之督赋责之追会文移如山欲其顷刻为之俵散卒徒如云欲其仓卒为之唤集抛买不时欲其质田贸屋而为之偿纳县道倚之如命胍而使之如奴隶取之如外府嫉之如仇讎自去年创置白纳旬解钱米谁生厉阶其祸最深充一月之役扫其家资之半充数月之役者其家扫地矣贤令尹下车之初首闻明榜罢此弊例一邑闻之为之鼓舞曾几何时罢而复行迺来鄉之父老过门者曰子闻保司白纳旬三百典尽妻儿无擘画之诗乎曰未也子闻龔标八九十年同百万豪家一夜空之诗乎曰未也子闻县家建楼之议乎曰尝闻之矣父老勃然告曰楼则闻而田里咨怨则不闻苍生何赖於子某竦然下拜曰某之罪也旦夕当请于贤令尹以造楼之费少纾保司白纳之祸此举於某无益於贤令尹有益其从与否某虽不敢必若楼则决不容於不罢惟高明实利图之须至申闻者伏乞照会谨状辞兼国史实录院校勘【是时兼史之命非出於谢相之本心而出於诸公之列荐所以屡辞而後拜命】

具阶方某状照对某五月一日伏准省劄备奉圣旨令某兼国史实录院校勘速为撰述輿服志某伏领指挥益重悚惻切念某种学罔工绩文尤拙昨来两被公朝劄命俾某撰述上件史志某所以敢於干冒鈇钺一再缴还劄命者盖某自揆力不能堪兼进呈期限已迫使某临时苟简修纂惧必有疎缪故也兹忽被宸命华以兼职是益置某於坐针负芒之地愈无可以奉承之理如此则是某度德量力之本心转而为干荣觐进之私意公朝纵不以是而加譴某独不自愧於心哉所有輿服一志容某一面用功外有校勘职名在某断断不当祇受省劄当用缴还欲望公朝察某拘儒自守之本心特赐敷奏收回成命所有纂修之书仍乞少寬月日容某集以副公朝眷委之盛心伏乞指挥施行申闻事

再辞前职

具阶方某状照对某再准省劄备奉朝旨令某不必避免国史校勘职名仰见公朝眷宠之美意缘某自揆前日之辞今日之受两有抵牾於义断断不安而公朝但欲国史成书在某敢不任责某於纂修则不敢辞所以上无怫於公朝於职名则不敢受所以下不背其初志然某不欲其文辞避频瀆穹严除已将省劄寄留秘书省国史库不愿被受供职外伏乞照会申闻事

乞祠

具官方某备员馆职丝粟罔功蚤夜思之每怀兢惕虽圣朝包荒未赐汰斥然某实甚愧之近忽於六月七日得冒暑之疾继以寒邪冲之至下旬仅仅小愈又因入局及行香出入再冒暑毒加以洞泄又缘前来发散过多遂至不能支持此间医者用药多不相投若非急归私家寻医必致狼狽欲乞公朝特赐敷奏畀以祠禄早还私家以便医治伏乞指挥施行申闻事

再乞祠

具官方某状照对某昨以病势危迫具稟朝廷丐一祠阙以归山林继准省劄备奉圣旨不允某仰见天地包荒之仁心切念某至愚极陋既病且危愚陋而久留则徒负素食之羞病危而不去则立见残喘之蹙况某始因暑毒继感寒邪肠胃虚鸣水谷不化异证捷出生意甚微一官虽卑馆阁岂是养病之所二亲在远庭闱益重惟疾之忧坐馆阁而病是已旷官遗庭闱以忧又为不孝凌兢局地危迫吁天欲望公朝特赐敷奏曲回造化陶铸一祠廩差遣俾得舆疾急还私家以便医治实拜隆天厚地之造须至稟闻者伏候指挥施行

三乞祠

具官方某昨两以病势丐祠再准省劄备奉圣旨指挥不允許令给假将理仰见天地曲全之造第缘某才钝如椎福薄如纸一身值坎坷之辰数口有迍邐之灾迺者七月十一日又有舐犊之戚泛焉萍梗困于疾?造物之所以警不韪而罚旷瘼者莫惨于此苟不急归是为乐祸又况久焉伏枕馆阁非卧治之地仍欲望公朝曲回造化特赐敷奏陶铸祠廩一阙俾得舆疾速归不然乞除程三月俾得暂还私家以便医药实拜二天更生之赐伏候指挥

乞假归里

具官方某状照对某一介书生备员百僚底尸素三年遂无分毫补报造化包荒未加汰斥比自六月以来一病几至狼狽三上祠禄之请公朝未察其真而未曲全其去但某昨来病中自知决不可不归所有御冬之具一缕不存而二亲年耄已先奉归乡而某仅以只身留此二亲在远日夜所以望某之归者甚切兼某昨有先祖襄事封於浅土近方卜地将以初冬迁厝某此而不归是为非孝欲乞公朝特赐敷奏陶铸一在外待次小垒差遣或予祠或给假三者之中乞畀其一实拜二天之造伏候指挥施行

再乞假归里

具官方某状照对某昨得父家书以十月上旬迁葬先祖促某急归赴葬事某已即具申朝省乞给假或补外或予祠俾得速归以赴大事而公朝未察其心未赐俞允切念某为先祖之嫡长孙岂有祖葬而长孙留恋官职不急奔赴者乎揆之天理人伦大有所拂欲乞公朝特赐敷奏先与给假两月俾某得急归以全孝心此亦天理人伦之正须至申闻者伏候指挥施行

乞假劄子

某切谓臣子之大节进退而已进以礼退以义礼主乎辞逊义主乎刚决故曰三揖而进一辞而退若当决不决而濡滞乎进退之间则失其所守矣某等不才业已买舟江浒挑包即行但未得朝旨未敢轻动欲望钧慈曲转造化於假状尾特赐钧判且与给假暂归若万一续与在外差遣则未为晚庶几某等可以曲全进退之节不然要君之罪将无所逃於天地之间何以立身乎立俟指挥下情无任悚仄战汗之至

再乞假劄子

某不避鈇钺之诛辄伸轮囷之愚某一介不才备数馆底三年尸素面目凌兢屡上丐外丐祠丐假之请叠奉指挥不允缘某近得父家书以先祖营葬之事促令丐外急归甚峻某切谓君父之命一也不俟君命而先去固为不忠久违父命而稽留又为非孝欲乞公朝察某真情特赐敷奏检会考功郎中洪勲例特与在外小垒差遣或照监丞吕中例特急假三月容某急归以承父命以赴祖葬实拜公朝锡类无边之仁某干冒钧严下情无任俯伏俟命之至

出关後乞假

具官方某状照对某昨得父家书促归赴先祖葬事叠上丐假之请未蒙公朝察其真情某今月十二日又得父书促归尤峻某切谓君父之命一也不俟君命而先去固为非忠久违父命而稽留尤为非孝况某於先祖系嫡长孙若祖有葬而孙不赴岂不拂人伦而害天理兼国子丞吕中考功郎中洪勲近以弟赴兄葬兄赴弟葬俱蒙朝旨或给假或补外况某嫡长孙之於祖乎今缘卜期既迫难以稽留除已於十月十三日冒急出关以俟朝旨外欲乞公朝检会某前後所陈及照监丞吕中考功洪勲近例特赐敷奏或给假或予祠实拜陶铸之赐伏乞照会施行伏候指挥

抵家乞寬假一月

具官方某状照对某今月十七日午时伏准秘书省牒缴示省劄二通备奉圣旨俾某兼庄文府教授及奉玉音促令某回省供职等事某切谓臣子之道忠孝所贵於两全进退不可以中止某昨以父命促归赴祖葬事屡控於朝乞假乞外未蒙赐允然卜期既迫父命尤峻只得丐假于朝冒急驰赴今星夜兼程於此月十六日已抵于家方将再上寬假之请敢谓九天震威

惓惓於一蝼蚁曲赐追还之命某感恩入骨虽死不忘但某为亲乞退又难中变而为进若以退为进则要君为不忠背父为不孝实为名教之罪人欲乞公朝特赐敷奏少宽给假之期俾某得了先祖葬事然後奔走公朝俯伏俟命所有兼庄文府教授省劄寄秘书省库并俟某假满日赴省被受供职实拜二天之造伏乞指挥照会施行

展假三月

具官方某状照对某一介蝼蚁为亲丐归自知瀆犯雷霆罪在不赦圣度天宽曲赐涵贷伏准十月二十三日省劄备奉圣旨给假一月某露香东面再拜感激垂涕以告於二亲曰此圣天子至仁如天必使天下归仁而皆得以遂其仁而不遗其亲之心也天地之大未知所报某尝覩先朝赵汝愚为著作丐祠未许以祖母大事即日自劾而归仰值孝宗皇帝孝治宽洪就许畀外而释其罪今某忝覩省劄天涵地育曲赐予假虽某之妄庸不足以望汝愚之万一而某之遭逢圣明蒙被恩宠则又过於汝愚远矣今某始得安心入山有事於祖茔若不展假必致一簣亏山於孝心终为有碍欲乞公朝特赐敷奏宽赐展假三月容某得终大事实拜公朝锡类无边之仁伏候指挥

为病再展假

具官方某状照对某伏准宝佑四年正月十七日省劄备奉圣旨除某著作佐郎某已於省劄到後涓刚祇拜圣恩讫即拟兼程赴阙忽为痼疾再发未可戒行谨先具专状控申欲乞公朝特赐包荒少宽程限放令某稍便医药俟病势少可扶持即便负席藁走阙下以俟鈇钺之命伏乞照会申闻事

辞著作佐郎

具官方某状照对某伏准今月十三日省劄备奉圣旨除某著作佐郎兼备近降指挥庶官不许辞免某一介蛙黾藐焉井底忽逢王明汎渌而绠汲之某感激君父异恩誓将捐躯以报但某切念内外迭补之法所以练人才也每读晋陶侃传朝暮运百甓问之则曰侃方致力中原若过自优逸他日恐不堪事某虽不才中夜感慨常有奋励事功之心自曩缀朝班未更外任今复尸素馆职切恐犯陶侃不堪事之讥欲乞改畀在外小小差遣俾得稍自展布以晷万分之报伏乞公朝特赐敷奏施行伏候指挥

乞改正理还劄子

具官方某劄子伏覩指挥应命官凡经臣僚论列者并合经朝廷改正某昨自宝佑乙卯之冬因有先祖卜葬事急投假状即行遂坐擅出关之罚得旨寝著作新命按之者朱应元也丙辰之冬有排斥三学之士者某偶前此与曾唯为文字交遂坐不合与太学生交游之罚得旨寝宁国新命劾之者吴衍也景定庚申之夏以轮对不能尽言陈寅弹之得旨予在外差遣未几以有官人不合作馆事林光世击之得旨予祠积是四非无非自取某惟圣贤不责人以无过

而许人之改过圣君贤相千载一遇此而不言是自弃於大造之外欲乞公朝特赐敷奏将前项特与改正过名理还元断月日伏候指挥

辞免司封

具官方某状照对某伏准尚书省劄子备奉圣旨除司封郎官某自揆不才合具辞免者伏以井鲋无闻久处泥涂之蛰乾龙有造忽闻雨露之仁其得若惊以感而涕伏念某素行乎患难自堕於迂愚不图橐龠嘘吸於天地煮载之间欲使勾甲萌拆於瓦石覆压之下某虽无他技而善自知敢以庸才冒居清选辄裁免楮仰告朝廷伏乞畀矜特赐敷奏彙征开泰倘不忍一物枝叶之枯自养曰颐愿少给勺水簞瓢之禄祷祈恳恳局蹐兢兢伏候指挥

辞兼直舍人院奏

具官臣方某状奏右某今月十三日恭准省劄备奉圣旨方某兼直舍人院日下供职者伏以菲材侥幸滥分主爵之曹误渥光荣俾涉代言之笔鼎来天宠震惕冰衷臣切惟内史赞书之司实为文士清选之极必有浑厚尔雅之体然後可以润色国典必有激昂婉切之功然後可以感发人心必挥翰如飞然後可以备缓急之辞命必涌泉不竭然後可以应填委之文书夫岂庸才可当是选切念臣荒疎学术浅涸辞源郎围方惧於素飡词掖岂容於越俎王言之制有七所未讨论舍人之様有三其何称塞恐慚帝制祇速吏诃仰望圣慈俯矜愚悃不嫌反汗收回成命之颁特许循墙别选时髦之任吁天恳恳伏地兢兢所有前项恩命臣未敢祇受谨录奏闻伏候

辞兼直舍人院劄子

伏以纶闼地峻顾越俎以难堪黼辰天高虽循墙而未许敢荐陈於愚朴祈转彻於穹窿伏念某受才既凡种学尤浅以寒苦而粗为文字处孤陋而实寡见闻孤陋见闻固未习朝廷之典故寒苦文字岂足代皇王之训辞冒居是官必忝於位辄成免楮仰告公朝欲乞畀矜特赐敷奏涣焉廷号倘无销印之嫌属之时髦方称如纶之任恳祈切切局蹐皇皇所有恩命未敢祇受伏候指挥

辞起居舍人奏

具官臣方某状奏右臣今月十七日伏准省劄三省同奉御笔除臣起居舍人兼职依旧者伏以龙御正中言动则书于史螭分左右记注必惟其人安有非才可当是选但觉震躬而不知涣汗之皇皇伏念臣孤远之踪空疎之器惟空疎则学问不足以该台阁之典故惟孤远则名实不足以孚上下之听闻以名实未孚之人而职简书岂能信乎後世以学问不该之士而立殿陛安能沃於君心而况济济周行蔼蔼君子苟自知非佚狐之选而不逊於夔龙之贤必至旷官反以违戾伏望皇帝陛下察其安分矜其不能更畀时髦许缁衣之改收回成命何嫌刻印之销所有恩命臣未敢祇受谨录奏闻伏候勅旨

辞起居舍人劄子

伏以才非狐伋何敢班二史之清身际唐虞未许为九官之逊以感动之忱弗至宜呼吁之请莫俞匪告公朝曷回宸听敢历陈其梗梗冀转彻於高高切原古者设官之由曷寘君举必书之职盖以人主一言之善否实关天下万世之安危所以选端良之人执简在後庶几处富贵之地非道不行以是官所系之匪轻虽先正犹惧其弗克苏轼之有此令且必诣宰相而力辞必大之除是官犹自乞皇帝之改授苟以謏才而不自揆冒居古人所不敢为以此败官何所逃罪伏望公朝察其非据许以奏闻言出如纶倘可惟行而惟反衣犹在笥何嫌改造而改为所有恩命未敢祇受伏候指挥

讨信州哄军待罪劄

具官方某照得比岁以来兵骄易哄不勇於御乱而勇於为乱所资以卫民而反以害民然桀悍难制惟信为甚某蒙恩予节职在澄清昨入境之初据信州公申本州军人以支米作哄事继得之谘询咸谓郡纠遭其凌辱非小郡僚虽微然其损一郡之体者甚大即欲诛锄一二首恶少正军律盖以事体关系者重所以迟迟而未敢轻於一发自此暴横愈甚夏税场栋子州郡已差人许福等又欲别差一吏州郡不听遂挟衆喧噪以请州郡遂俛从之乃七月内州郡以狱劄行刑而许福等以不用军劄遂集衆持杖拽街搜捉狱级擒至郡厅必欲行法州郡不听此曹又辄喧噪州郡又俛从之窃惟信之卒伍肆骄其所由来渐矣郡守低首丧气为其挟制郡民吞声茹苦为其凌暴已半年于兹比者殿司军将官提兵自信经过此曹生心衷甲腰刀呼俦集衆复谋为变阖郡惶惶中夜束担出郊以避祸以信之去天密迩军兵干纪一至于此下无州郡上慢朝廷是可忍也孰不可忍也本司近以秋试因密切调遣诸寨寨兵入城为护试之举陰为戢乱之图帖上饶县令程从事应新护州印牒差拟迪功郎兼本司金厅何惠生以捕伪关会为名同共合谋今月二十九日蚤据拟迪功郎本司兼金何惠生同上饶县令程应新申已於本月二十六日早擒获为首人许福等八名斩首示衆揭榜晓谕军民各已平定外无非仰藉国之威灵幸而集事少洗积年骄横之风少正兵律抑亦可销变於将来也所有调遣用命服劳一行人别具姓名开申乞赐推赏所有某不合专擅调兵及专行诛戮一节谨席藁俟罪外伏候指挥

乞与共讨信州哄军有功者转官推赏

具官方某状窃惟汉人有言曰有功不赏有罪不诛虽尧舜不能以化天下信州哄军其罪当诛久矣某自到任已来日夜图之而未有一可任事之人方欲以兵取之则本司无兵之可调方欲乞兵於朝廷则此等狗鼠何足上劳君相之虑环视精选得一有用之材曰从事郎上饶县令程应新然彼方为县令其势不足以运掉一州也而某於是委之摄行州事旁搜远取又得一可与共功名之士曰拟迪功郎何惠生然彼方为士其位未足行事也某於是留之本司金幙其不知者以为过客也使之以过客为名馆于信州者屡月以尽察诸军之情伪尽得哄卒之姓名尽识诸卒之面目入其党与探之试之离之间之结之收之往反图为至于十数所与共谋者上饶程令也乃者八月秋试士人喧杂於是借科举之名密调诸寨精锐顿之棘外

而选彼党之强壮者收之棘内然後谋取其渠者而殲之彼八凶者诱而致之数处同时下手一朝擒之顷刻之间皆就诛斩急张旗榜以压衆心军民按堵如故今城内外不惊一尘所调捕兵不伤一卒实县令程应新拟迪功郎何惠生之功也斯二人者使其一为见任守臣一为见任金幙皆不当言赏盖本职公事也今程应新以选人县令行郡守之事何惠生以江州进士任潜师之责非其胆略度越常人何以不动声色不烦朝廷调兵收徒手缚虎之奇功某伏覩在法捕获强盗选人改官白身补授今来二人之劳非止捕盗而已欲望公朝特赐敷奏将程应新特与改合入官何惠生特补文资给迪功郎真命以为趋事赴功者之劝外有头目用命立功人张济为第一功王伯茂郑荣次之若头目以下则排军璩迁蓝安詹宝汪福余正陈福秦明徐强余宝及百姓吴龙吉军兵吴强郭茂余照二杨旺洪贵张玘鲁先程先璩元等凡壹百余人内头目立功张济本司已於信州见管进武校尉绫纸内书填一本给付张济充赏外其余并合厚支犒赏欲乞朝廷割下信州於有管官钱一切支行庶几赏不踰时则三军感悦他日可以使人仍乞割下本司照应伏候指挥

辞免诛剿哄军转官

具官方某状照对某今月十四日伏准省割以信州诛剿哄军事备奉圣旨方某运谋集事与转一官某窃惟百官有司各有所职旷职分之当为者固不逃司败之刑为职分之当为者亦无受赏之理盖某之事与程应新何惠生不同也若使程应新为见任守臣何惠生为有官金幙亦不当言赏惟以其选人县令而行郡守之事进士金幙而任潜师之托是以可嘉若某则为所当为仅可逃司败之刑而已今公朝赏不踰时以为厉世磨钝之具因衆人而及某焉若某以本职公事而受赏则是侥幸而冒功顽钝无耻人谓某何所有上件恩命不敢祇受欲望公朝特赐敷奏收回成命庶几小臣得安分守伏候指挥

江东提刑一考丐祠劄

具官方某伏照对某伏准咸淳三年二月省割授前件差遣某即於当年四月二十五日入江东境交割本司职事越今年四月二十四日书一考某窃惟荀卿之书以礼逊为伪卫风之诗以素飡为非苟以荀卿之言为嫌而犯卫风之刺则为顽钝无耻之士伏念某学未语上才不逮中冒乘使者车而行外司寇之事虽小大之狱必以情而听讼未能无讼虽得其情哀矜勿喜而罔中未能惟中圣人之言朞月而可今某试之朞年而风俗未能变化圉圉未能空虚弗绩罔功孰大於此所以未即司败之罚者圣贤在上不求备于一夫也某是用不敢犯素飡之讥而避伪逊之嫌伏望公朝特赐敷奏姑畀祠廩使某以自量之心而为自全之地实拜天覆地载之造伏候指挥

辞免江西转运副使

具官方某状照对今月二十一日伏准省割备奉圣旨某依旧职除江西计度转运副使某闻命震惊惧溢於喜某窃惟小器受大任者有颠覆之虞一命至再命者有盈满之惧某一介不才滥切皇华之遣司臬江左凛凛旷瘵乃夏五月既叨进职之恩今甫半朞又叨改轍之命俾

之将?于西非但小器受大有颠覆之虞而一命至再尤有盈满之惧所合具申公朝乞赐敷奏
改畀时髦庶安愚分伏候指挥

蛟峯文集卷一

卷二

钦定四库全书

蛟峯文集卷二

宋方逢辰撰

书劄

上宋理宗书

六月吉日奉议郎秘书郎兼国史实录院校勘臣方某谨斋沐裁书昧死顿首百拜献于皇帝陛下臣闻可使小人受隐然之福不可使小人显然有胜君子之名胜之名一立则南衙北司之势自此分天下国家存亡之几自此决矣左右小臣供汎扫给奔走人主日与之接岂能怱然无爱之之心哉但不当使之窃威福与外廷角胜负爱之而又有以威之可也一或有罪惟恐不知小则斥大则刑无所宽纵如此则使之弄权孰敢哉治世者小人失志之时也乱世者小人得志之时也为小人祷者必祝其遇乱世勿遇治世臣窃以为此非善於爱小人者小人之在治世欲为豺狼而不得噬欲为蛇虺而不得螫信乎其不得志然无大恶者无大戮抑之乃所以全之诎非福乎若其在乱世豺狼当路而不可问鸱鸢横翔而不可击招权纳贿而上不知蠹国殄民而下不告是天将稔其毒而歼之若国家危亡小人独能存乎然则英君毅辟为小人回互而求一胜者虽曰爱之而实非所以福之小人得志何所不为宠则骄骄则横横则不可制汉唐之季建置天子在奄竖掌握威权出人主之右彼其初岂有此心哉人主宠之以教其骄纵之以教其横为之除异已者以教其不可制势薰炽天下之穹官美爵大半出其门下岂复知有天子哉彼自知结怨於忠良召怒於天下万一值英明之君决不赦故於危疑缓急之际不容不贪天之功以为己力当此之时虽欲除之其可除乎彼其罪大恶极朝廷不能诛之则天下必有起而诛之者汉之宦官陈蕃窦武争之不胜而并州之将乘天下之愤而操戈以殪之唐之宦官宋申锡攻之不胜而河中之帅乘天下之怒移兵以屠之然则汉唐之君前日所以宠之纵之者廼所以益其疾甚其毒而投之死地也为北司者必欲与南衙角一胜岂其福哉人主之爱小人而使其至此甚非善於爱小人也恭惟皇帝陛下聪明而英毅中正而密察天下事事物物无不洞照其是非而独於左右之小人未能以义断恩以公割私何也臣窃料陛下英明而独未悟左右之奸邪者其弊正自英明始何者英明之君多欲自操天下之权彼惟因人主欲自操其权也故间摘事之可悦可信者而试之使人主行其说以渐侵外廷之权外廷之权一侵则彼之说益进帷闥之密帘壁之窥君怒知怒君喜知喜留正未迁左辖而姜特立先泄之以为己功洪迈未除西垣而渊靓先卖之以为己力其欲进某人也非一日之誉游谈之助足以宿留宸聪欲退某人也非一夕之毁浸润之潜足以潜蓄天怒陛下但见威福之出於己而不知彼实借吾之权以行其说而簸弄於中外乌在其为权在我也臣又料陛下英明而独不肯少裁左右以正纲纪者必谓此朕家事无预外人盖将分官府为二也臣窃谓不然大抵小人之在君侧其操心何所不至其所以不敢动於内者盖有所惮於外

彼其颜情稔熟岂惧眇然之人主哉若外不足憚自宰相至百官皆俯首弭耳以下之则此曹无憚忌之心生无憚忌之心生则君之恶动矣臣又料陛下英明必曰聪明自我刚毅自我此辈虽纵横於中外岂能卖国哉臣亦曰聪明如陛下刚毅如陛下万无此事然陛下独不为他日虑乎此曹素轻朝廷仓卒夜半禁中出片纸召某人外廷素无权拱手唯唯谁敢与之角是非者臣又料陛下英明而思虑独不及此者必曰晚唐以内侍典兵故其权足以易置稷社今之内侍无兵虽纵横不足以乱天下臣窃谓不然嬉笑之间有机弄焉樽俎之上有戈矛焉陛下不可谓此曹无兵也况修内壹司以工役为名为天下逋逃渊薮藏奸聚恶数百人凡州县寨镇之凶人巨盗刑于有司不容于乡井者皆归之又散而巢於某庄窟于某场皆内司之牌号也皇城禁旅实掌握之武库甲兵实管钥之如此而尚得谓之无兵乎苏轼有言方其始也台谏折之而有余及其既成干戈取之而不足与其他日以干戈而取之孰若今日以台谏而折之臣非当台臣者夫不得其言则去台臣之志愿毕矣尚何助哉但不去二竖则陛下纵虚赏言官一日而九迁之於国家之安危实无所益且南衙北司胜负之分乃天下国家存亡之一决此则臣所甚惧也臣此月六日尝移书宰相勉其行申屠嘉之事而七日即得寒邪之疾伏枕者兼旬矣兹又闻道路愤怨而切齿於二竖臣虽病睡不能着力疾辄为此疏自知瀆犯天威僥幸自爱其国亟出二竖於外以拔膏肓之病根小惩而大戒使此曹得以全其身全其家即所以爱之也臣昧死惓惓下情无任伏冀罪之至不备

上庙堂书

六月吉日具阶方某惶惧顿首百拜致书于大丞相枢使国公先生钧座前某窃见盛夏之月大阳无威盲风晦雨用事拔木发屋夜寒昼闇黯黯凄凄朝野震愕曰此陰剥阳之象奸邪剥善类之象大臣善类之宗主也輒摭所闻以告某尝谓天下之祸莫大於奸邪之窃国威尤莫烈於奸邪之蔑国威夫人主之威奸邪窃之以弄於中外天下知之而人主未及知则虽窃也彼犹惧乎万一之知则不赦矣一旦发其奸邪人主知之而罚不伤其毫毛彼得以蔑视朝廷曰无足畏者矣剥之初六曰蔑贞凶六二又曰蔑贞凶圣人重伤阳道之亡故以蔑之一字哀痛反覆而两言之近日台臣按发两横璫及其牙爪三四辈此天下之所共快而亦前乎此道路之所指目而亦人主之所独未知者及此之时斥去一二则此曹尚有所憚曰国有威也侧听数日而两奸从容上索祠邀去之牒玉音曰留至于一再而絕其请断蛇不殊刺虎不毙人心惶惶曰剥之蔑贞之象所可幸者天诱圣衷以内司扰民一事付之公朝此又南衙北司胜负之一大机也前日之未言也其责在台臣已言而未行也其责在人主今付外则其责在庙堂他如小人庸人之为大臣反倚此辈为援者天下所不责相君自为台谏为侍从为执政正色朝端中立不倚负天下重望望之重者责之深未知何以处此前岁以一奄竖之隶逐一台臣此国威之一屈也声生气长陵蔑纪纲莫可谁何今日之事若不幸而国威再屈则豺狼当道自此不可问矣国家社稷之存亡在此一决未论他日之事即目前而观则台臣言之不行惟有掉臂而去此曹思虑益深术数益密必将援一同类者入台以角善类而空之剥之初六曰剥牀以足夫害人者先坏其牀之足害国者先坏其国之足剥之六二曰剥牀以辨辨者牀之干也牀有干国亦有干大臣国之干二大臣位也陰之蔑阳先剥其足而後及其干彼其敢於与台臣鬪胜负者剥足也敢於剥足何憚而不敢於剥干乎今日逐台臣明日駸駸逐及大臣矣若俟其逐而去不若为天下国家争一胜而去乾道间渊靓之横诸君子攻之不拔

陈参政以一言逐之绍熙初姜譙用事留丞相以一语去之留之去姜譙陈之逐渊猷岂他有奇术足以撼其君不过伺得其泄报左史西掖之除漏传两文昌过府之事显然有迹深中上心故二公甫下殿而三奸已出门矣况今之横璫腥焰熏灼其显白之迹又不止漏泄差除而已圣上英明决不肯终茈狐鼠但前此未得实状所以不信今闻台臣所奏具得事实况付之外廷此圣上疑中之信也易之坎曰纳约自牖所谓疑中之信正是蔽处之明乘此入之机不可失若万一争之必不从则某又有一说上可以不伤人主之心而下可以慰天下之公议内可以开小人之路而外可以无损台谏之纪纲而公朝又可以专为之而不必忌今台臣所劾内史之爪牙直胥史耳其富埒国其恶滔天若二三大臣坐朝堂猝然呼此数辈於堂下责其奸状而黥籍之然後闻奏则二凶既以得免为幸彼又可以嫁其恶於此曹以自解于上而九重亦可以自白於天下曰前日毒民之事皆此辈为之果非禁庭之所知也一举而释君之谤掾台纲之轻开小人之门解天下之怨留陈之事又不足言矣不然青史书之曰南衙北司胜负之决自某人为相始某实为相君惜之干冒钧严下情无任悚惕俟罪之至

与庙堂书

某惶惧百拜申禀大丞相枢使国公先生钧座前某窃谓天下之大可畏伏於不足畏惟其小而不足畏故其发也常至於不可御昨者荻浦之盜其初不过鼠窃使州郡监司即扑之岂有後來之焰焰哉惟始则狎而养之中则讳而撝之故终也至於上劳君相宵旰之忧再易部使者调重兵而後足以胜之前事可鉴已乃者道路藉藉谓郊关之外白昼擄掠之风肆行无忌客舟非三五十艘气势联合不敢西上其地即龙山庙山之对境其巢窟曰童家会後曰後杭是也其居环数里皆无藉子平时贩私越禁出江入海其舟白刃林立今则专施其毒於客舟有诉于天府者往往视曰常事而轻释之由是其风日横有夺其货而沉其人於江者有拽其舟而泛其载以入海者徽严衢婺之人遭其惨者凡十数矣近又闻如陈其姓士人父子两人遭刃幸而不死掠去数千缗囊篋席卷仅逃其身和其姓舟人被掠一万三千缗米一十四石舟中之遭伤者数人严之淳安有课社每月用盂子发试卷到京委官考校近忽遭盜舟拏夺舟人急发一二盂以示之乃故纸也方得弃去似此态状乌可养奸若护痛吝疽必为腹心之急证又闻南荡塞卒与之交通为之耳目其商旅之实舟江浒某舟某物此曹一一密探及至波涛之冲专以巡船为名如取诸怀及有司捕之则或纵或擒皆在此曹之手此尤不可不察者也欲望朝廷急行下安抚司及东西宪急作擒捕大者即正典刑小者去其手足然後可以遏滔天於涓涓扑燎原於荧荧仍严戢後杭之舟出入不得带凶器所有南荡塞卒与盜久稔不无以革之据在籍之额分隶远塞仍於他所分拨生头兵卒以填之此亦转移变化之一术也得於见闻者如此不敢不告惟公朝密施行之幸甚

达严郡守

某因回使就有恳禀近桐遂寿淳四邑民准大府督赋之命甚峻田野震惧某切谓此未必出於君侯之本心也往往有迫而为之但在府由措辞与幕府拟笔迺纯乎非君子长者之言虽然若使久在民间而不输虽杀之可也今淳安家追户对类有输足之钞又有预借之关县一切不理又重借明年民莫敢不听又督借本户民亦莫敢不听如此则不可谓之化外之民矣

而县家方喜砧斧之下有铜山焉如近日卢某此淳安之佳士也妇翁被迫壻代出官既有足钞又有?借之钞可谓纯民儒士矣止因与史笔一语扞格径为裂衣冠押之狱张皇暗申於大府将以作大威福应宰当即悔之已无及矣今卢族以君侯方入左腹之言辄为一札俾某转伸札中亦不明言是非亦不敢冒犯府吏倘沐台慈怜其壻代妇翁察其已输足已?借有足钞有足由特为一转福笔田里幸甚至若县家太甚之急弦可畏之裂帛亦望君侯为赤子宽之一分某为父母国请命不知狂瀆惟君侯其赦之

回马总领

某惶恐端肃加拜申禀总领都运大卿台座前某伏拜台翰读之汗下某备员百僚底安敢妄发达官书自束发受父兄戒素以干请为耻况代人为请乎某自去夏入馆以来未尝作一字为人?监司州郡而乞丐于外不谓何等不肖子敢以膺书尘突自非藻监精明必为所欺某前载备数吴门金曹亦得一假托台谏书者搜其橐犹有二三封即白之郡鞭背而拘之圜土郡赖此而後来者不敢以伪售矣大卿平昔风采赫奕此様无赖辈到手不可放过也某继此或有书到当於月日姓名下用名记以别真贋然亦决不为人发丐钱书若有之必伪也乞置之重宪以清奸慝拜赐弘矣

与包宏斋

某惶恐端拜申禀提刑龙图大卿侍郎台座前某向也得侍立玉於鸳鹭行见格心一疏唤醒醉生梦死於卓然有立深为朝廷有人贺未几执事以绣衣而斧荆棘某虽得升堂下禀钱之拜而未能一牋申平寇之贺某岂独无人心不为国家喜哉盖有忧焉以夺其所喜故也东南一角之天下四疆溃烂所恃以寿如綫之脉者仅浙右三数郡此楚汉必争之厥仓也小人负乘致寇其祸乃使君子当之朝命借重望压其衡自非深谋密运万全而动安能破数十年不可入之巢窟哉未几波涛?涌变白为黑公议几为之一厄息壤之盟犹在而三至之杼已投中山之捷方闻而谤书之筐已满功之足以招忌如此哉所赖公议之帜卒不可拔今日之事是亦幸而集也虽然转石拔山是非颠倒何朝廷之靳於赏功而不靳於赏奸赏盗与此某之所以忧而不敢喜不敢贺也因郡卒便僭及惓惓愤闷之心伏丐合照某洵有稟事近浙江闻有白昼剽掠之风客舟非数十为党不敢西上其地只是龙山相对所谓童家会後及後杭是也环一二里所居皆无赖子平时贩私违禁其舟出没波涛白刃林立卒然遇之则姑以买物而争登客舟若随其所索委而与之则幸而免不然则掠而去之近富阳令有一亲戚遭其毒遂合巡尉捕之得二三十辈执而归之天府往往付之等闲轻释之近日颇横严婺之舟遭其劫者数十矣此事正隶绣斧须望牒临安及遍帖巡尉严禁密捕大者即正典刑小者去其手足然後或可胜之仍须严榜禁後杭之舟出江者不得带凶器有者许巡尉拘解或可戢之不然郊关外不一二里而威令不行其何以立国乎却望密切行之

与宝庆夙宫教

某惶恐端肃加拜申禀判府宫教即内除郎中台座前某念日夏间伏辱台翰且拜台馈以师

門而摩抚後进者如此感当若何继尝潦略且答状谩尔微芹伴空函计彻岩电矣某备数百僚底尸素一年余拭目时事中夜感慨睡不能着虽下僚惟当思不出位然鸣鸡起舞自有勃勃不能遏者敬以判府器足以大受才足以弘济学足以谋皇而断国坐之细旃立之左墀则所以沃君心而起世道者必大可观一麾翱翔不能动宣室之思邪西边苦竹之围危甚幸而城中坚忍敌以乏粮解去传闻还又围嘉定闻此郡子女玉帛所聚敌垂涎久矣又须常得天幸可也若人事则戈朽斨钝直可櫜櫜大理既为渎破齿失其唇闻线路可直达滫澠此尤可忧淮哨未枣红而来生理一空强隣四面迫我而左右顾无一人能面北发一矢者朝除暮迁不过应副人情富贵姻姓曷尝念及生聚教训乎哉近天府易帅以马华甫代人望甚厌服然圻漕有除职暂兼之令或谓注意在王而始借马以压物议未可知也但今之两司非顽钝无耻弭耳於羣貂者不可为恐马未必肯来耳时事可忧者类如此因风及此乞恕其僭伏丐合照

回吴退庵

某惶恐顿首再拜申禀判府提领节制大资相公钧座前某十一月十八日伏拜十月间钧汗驿日回緘始疑误投审之再而後敢拜悦而读之乃知江湖不肖子以贗书干渎且辱台馈而遣之是使某重速遣也某自束发受趋庭教干请之戒甚严而况代他人干请乎某自去载之夏入馆未尝为人作一字乞丐于监司州郡每见一等无赖子自为割目列注宅?沿門作谒以乞书名者某甚嫉之惟只坚拒而排去已尝榜于門曰例不书列割不作监司州郡书凡游士过访者必先扣其无索书之谕然後见之某非固矫枉过正亦自揆百僚最底不敢妄发达官书耳兹承钧谕所谓裘其氏者某不知其为何人欲望钧旨索而鞠之重置于宪亦可以清奸慝而杜干聒也伏丐钧照

【继是或有书问当於月日下用名记以别之然亦决不为人发丐钱书万一有之必伪也】

荐洪尉

某等惶恐端拜申禀都运判府安抚待制台座前某等窃见庚戌同年仁和洪尉兰文章政事两以优称初筮奔走使节下比及一年本不欲自鸣然恐如叔向所谓子如不言吾几失子辄代致醜蔑之喙如蒙少借造化则一言而识醜蔑在叔向不得专美矣琐琐溷渎伏丐台照

荐王新班

某惶惧僭越端拜申禀侍读提举端明相公钧座前某尝谓知贤者必当有所荐妨贤者必当有所避帝朝命官必逊于爰戕伯与逊于朱虎熊黑济济之风今不可见已知贤而荐此相公事也某不得出位然自知妨贤而能避其犹可以希相逊之风乎迹闻朝廷指挥再开史局方搜天下英杰其实不才滥叨史馆今窃见从事郎侍班王某舍选发身家贫彻骨其践履在某上学问在某上文章在某上丹铅点勘实维其人敢以某所领史馆校勘职名推以逊之而某自有秘省本职欲望钧慈特赐备申朝廷乞俞所请庶几某免妨贤不避之讥而相公亦无知

贤不荐之愧矣干冒穹严下情无任悚息之至

与赵端明

某惶惧端拜申稟判宗端明相公钧座前某念自壬子春得瞻拜阶府违侍一瞬四周星夜望南闽聚奎熠熠知一代英杰考盘在阿之地也某去载尝便翼一纸走起居问去鸿飘飘不识彻岩下电否欽惟手扶河汉为天下文章宗主力负宇宙为宗国庙社命脉当今柱石人也江涛汹涌之秋眼中人才左右顾无一可当缓急者野水孤舟之句未尝不中夜抚掌为世道浩叹迺闻朝廷寓意江左夷吾将强起之而东山高卧迫之坚不动仕止久速某知先生之所以权衡乎时者审矣虽然山中云出雨太虚洗净一番山更好苍生固以此望英嗣司令着郎到此某幸得一拜识未几亟索祠归何与岂翔集之审固当如是与抑不肯久去膝下与某尸素蓬寓且两年无丝发补国虽下僚惟当思不出位然寤寐时事鸡鸣起舞自有勃勃不能遏者日夜鞭勉惟恐有负师门便鴈如可赐之箴砭惟丐勿吝兹因司令锦归附便致安问伏丐钧照

回赵端明

某惶惧顿首端拜稟申判宗端明相公先生钧座前某昨者伏辱钧汗宠报且领钧贶潦略具答状附之回翔深惧不敏敢图钧慈与门墙小子下交乃如家庭相接之气象某何为得此於先生也某备数百僚底丝粟罔功蚤夜兢惕深惧负所学而负师门前辈谓爱做好官而不爱做好人某甚以为戒夏五奏对愚天下三字深犯时忌颇闻贵人衔之此月下旬洪彘再疏二璫尽力攻之而不胜六月十一日除目盖为逐洪彘而恐在朝者纷纷故例一美迁用杜公议之口耳诸公得此果不言幸三学之士为之举幡二十三日洪彘再除常卿亦姑揜外观其实为二璫地也某适病寒邪伏枕者兼旬睡不能着二十六日又力疾一书撩蛇虺之头此日王潜斋为击去次日李文溪又为击去文溪尝疏二竖故受此祸潜斋闻亦因此事与上面不合时事颠倒一至于此某势只得见几而作矣不然焰焰必及莫可避矣归使潦略仰报先施伏乞钧照

通方宫使造黻侯祠

某窃谓当今天下何哉戎狄豺狼扰我金汤正智者效谋勇者效力之时也而明府乃贴牒割奉使府命俾驾鹤子孙同新鼻祖祠宇永平一籍图鸠三千【阙】似若急今日不急之务然亦不能无谓焉田单复齐而有神师教我之诏东晋淮淝之灵蒋山而草木人形晴淮涨波神与有力焉今日之举其意亦犹是也夫悞神贴者是不一姓独於吾宗是鸠者犹清平乌龙之庙成於邵安乐侍郎之庙成於何子孙之责也非惟公上之命不可违神祖洋洋如在况虚谷先生又神祖之流芳者也不以是而应公上之命其将何辞吾宗勉旃伏丐台照

答何穀斋求荐

某惶恐端拜申稟判簿帅签郎中尊友兄某去冬蒙惠书求鄙字时朝议分栖已定书不书元无损益是以姑与焕翁言之不欲多言便胥失之也居无何策马西去乃为向阳花木保师一见即相知罗之议幕荐之公车留视东【阙】大胜造物相成就固自有所也承闻北风之恶使人抵掌天地中气所宅敌人据之今尚有五十年穷山陰谷为雪霜所扼一阳动则迸裂求出以求附我正统逃琨起舞兹惟其时惟吾兄勉之内屏 不鄙垂谕荐书弟某被谴方新惟当闭门以自省匪惟不得而书虽书决无益也今叔太博为一世名胜近归自庐陵今近舍远取皇甫持正不笑我乎某苟可效绵何敢自爱而以德之爱亦有望於君子也草略占报不敌来施惟祈台照

达朱南山制置

某尝谓人生宇宙间翕忽之聚皆有定分而岂徒哉昨尊执事玉立朝端某赘员班底得以亲切门墙今尊执事持节江淮某驰驱王事又见并轡原隰四方上下无往而不托隣绩之光谓非分定可乎一介往来笃叙隣好礼也修敬有稽汗我颜甲属兹阳刚方长岁除伊迓荒山寂寞风宜不腆登载副笈以贄履端之敬高谊鉴忱特赐采纳荣幸亿秭輶渎崇严伏墨战栗

达赵都大

某忆昨在班中获修一纸之敬恍疎记曹两见寒梅煦然赵日之温?甚郇云之觐开槭如见谏议其何忻快之如揆辰天地三阳万物生意恭惟某官从容论譔乐只涧阿明哲简知穹示棐佑台候动止多福大卿以毕原豐郇之昭胤德苍歆向之名望内之为磐石外之为扞城固其所也而高卧不出何与龙泉太阿当为宇宙间用若久藏櫝中其光射斗牛自有不能掩者岂世无雷焕未知至宝之所伏耶

达李提举

生平慕藺之心未快识荆之愿所恃燥湿气味之相合虽曰未面而心固面矣棠陰蔽芾瞻之在前敢不封护惟谨比者忻闻建台未遑专贡首以为人之请衡阳推官杨某於某尝僚今以其属城掾受察于节下千里之书借羽言彻其姓名于左右某未见颜色而言则隣於僭拒人於千里之外则又几於固用敢忘其僭以免於固辄为拈出倘蒙恢之以仲尼之天覆之以少陵之厦幸矣干?陈言伏祈台照

贺卢可庵鄉举

自春暮稟别於化成堂一瞬景物累改莲而菊菊而梅矣绊縈吏尘池边之吟篱下之酌弗克与兄共之而岭梅之寄又复疎濶冗实夺之非敢慢也久不闻?信试後李提干归急走问之虽得榜而未知其人然玉川一氏必君家鴈行中人也十月终有来自鄉邦者方知执事巍夺高名急用喜舞此事为兄不平久矣吾今而後知造化终有平时春官荣上更宜勉之令叔胄监发轫天地成就人才各有地方十七兄为鄉试首新刃发硎其利如此可喜可庆吴门况味粗

安藜藿每旦入暮出府事如蝟毛惟廉与公不敢不勉

吴是斋问乞巧文内子厚少陵事

比使鴈拜状继承海答感甚忸甚暑中六合为罍惟有长簟打眠无由嗣笺稟起居而鴈使叩门乃拜琳琅之緘金玉之馈上樽太牢甘瓜物珍而丰何以辱此长者赐弗敢辞下拜芒背汗面而已贫家虽无巧筵然菽水有具对银河不寂寞矣少陵子厚嬉笑皆成文章执事拈出俾某忝注脚某妄论谓方员苟齟齬丈夫多英雄少陵生平不遇者在此子厚附叔文终身为巧误所谓天之所命抱拙终身岂因巧而得拙与然不以人废言皆吾辈一段鞭策也先生以为如何

贺卢可庵赴春官

昨闻秋帖香名亟奏书称庆继辱海答剧用忻浣鄉邦英气輝?乎山川课盟诸丈所作香满西浙不但卯峰区区之讖而已百里三元岂三山所得专美哉诸丈联翩上春官辱以义约见谕覩此盛事敢不薄助授之回翔矣执事与介翁焕翁鼓行而前全胜必矣但世事闷闷人意明目张胆摧倒一世雄杰可也不然反为高科羞

回贺何正书

某肩门深雪罔知宇宙之寒燠是以於亲戚鄉党间皆不能修元正贺可谓缺典专俾以台緘来唤醒溘睡汉真情满怀喜可量哉鲜鳞玉粉之颁品品珍腴下拜登受之春风郁郁塞茅屋矣使旋亟奉此以复命其诸谢私尚图嗣控

回鲁国正谢铭书

某昨蒙不鄙緘示先大夫平生实履某饱闻典刑旧矣昭昭年华实印我心是以不果别作何必专緘言谢为也坡翁祭文有曰轼於天下未尝铭墓独铭五人皆盛德盖富郑公范蜀公马温公赵清献公张文成公而已某於先大夫亦云适有虑囚之行役其谢潦草伏祈台照

回卢可庵

懒来枕书困忽闻打门声起视之则沧海频渴万宝毕呈吾可庵辱贶也盥手摩眼疾展快读其秋後之山露下之葵霜中之菊与雪前之梅竹与引玉之诮何敢辞也

回许国正争妓

前日蒙谕已知其不可而见之报牒矣专緘再至何犹未能忍情而介介於此耶某谓为柳下惠则可为鲁男子则不可执事为磊磊豪杰之士则可自家以拘拘尺度之士则不可且望就

县行移若或置飘风之过耳则又爱执事以德者也

与吴是斋

卧牛衣山中罔知世界上事但见晨窗白而黑黑而白则知朝而复暮暮而复朝也厥有拍其肩而告曰桃符又换诗新句矣感物景而思朋友不能相与一樽访梅花而寻岁寒盟心耿耿乎不寐也某物聊为咏春亭怡集一笑之助

回卢可庵馈物

某坐看峡云来往静观天地心见往古来今於穆不已之命元无息也遥望风露天边此心同也此兴同也侔来以书饷我双鱼朋酒便当溉釜鬻洗盃杓以承嘉德矣草草切希台照

达宋云叟荐毛伯明

某昨岁之夏在山房弟处得挹翠盎尔後梗泛于旅渴贤之心夙暮耿耿率尔有禀凤林毛举之鄙人也挟风水而往遂家焉今有二子曰伯玉伯明克世其家久闻蔗峰下有熠熠者曰宋云叟屡需鄙字求见伯玉者间在胡戎坐间已识紫气独伯明未获瞻际数字相其行倘有鞭策惟命是听崖率奉简不如书仪切祈鉴亮

达王翠麓荐毛伯玉

元毛伯玉递至佳章两轴其一则令西宾省元作也患难迁徙之余见珠玉不任喜慰遥想胸襟冰雪主宾一也十袭为荣某念昔在江左时得托好寅恭承揖共济孰非大惠十年往事今在梦中自丙子春山中盗起焚劫一空挈家于外于今四年萍梗东西未有定止望翠麓潭府三槐如故真如桃源洞天起敬起敬某久欲一纸问起居而未能适伯玉过我相与道令德伯玉正欲求见遂作此以相其行闻翠麓方欲择佳山水以为千秋之藏伯玉愿以杖屨从听鞭策草草上状不如书仪伏乞台鉴

答卢可庵手帖

山中揜耳不知五月又一陰生矣脚跟不定於亲党之礼何诞之濶兮使价叩寓庐蒙惠舒鴈笼炊丹杏三味俱佳下拜登受蒲节不荒落矣崖率奉答未既厥心伏祈台照

回洪司理为亲寿

日坐故纸惟无从奉书伊我怀人寤寐展转扁舟挟策过洪都目迷五色使人知气忽奉来教如对玉立其为忻快可量哉内帖有盛馈何从得此笃叙缱恋为吾亲寿当於前辈求之在某亦曷敢辞但见任讲寿礼於条有碍若曰於已则不可於亲则可毕竟费注脚用是例以此谢

而不敢独受於执事也其为感激与受均之

送物与陈宜中丞相

某忤审玉节建台未遑走一介修睦邻好非礼也寒燠起居已具吏楷外由中有敬敢申布之
某观风非据属在同舟仓庾狴犴虽曰各有攸司然视时聚散使民免於饥仁意周匝庶几轻
生者少远罪者衆刑可期於无刑河润岂直九里哉某与一道生灵并受其福某将忱无物凉
【阙】风【阙】登载副笈不以鸿毛而斥之幸也春树暮云遡风凄断

送物与卢可庵

某以九日留临地虽此世界人无登高佳兴然浊酒对黄花长歌靖节之诗胸中自有一日太
平某率尔池鱼牟粉珠也百事吉专人持荐萸菊之末得蒙一笑幸甚崖略奉简切祈亲亮不
宣

遣花粉礼往项宅

某维时雪中开霁贞下起元敬惟某人德配阳休气排冬凜台候动止多福某惟礼曰婚礼者
所以合二姓之好上以事宗庙而下以继後世者也故君子重之某以仲女托之门墙迎礼既
行则百世之好方自兹始聊奉薄礼所以将其敬也倘蒙不鄙而顾留之幸甚

蛟峯文集卷二

卷三

<集部,别集类,南宋建炎至德佑,蛟峯文集>

钦定四库全书

蛟峯文集卷三

宋 方逢辰 撰

啓

贺董矩堂

某启伏审光膺典册进秉钧衡有王佐才人谓用仲舒之晚任天下重今乃得伊尹之时皇路大亨苍生胥庆孰不交陈於颂语仆方愿献其忠忱某窃谓自古至今未易有明良之会惟天祚宋岂终无平治之期每念吾皇屡更元弼越若老奸之执柄遂令上意之吹藿但欲损外廷之权反以开旁鹵之罅虽宸聪英断视尧舜无以过之然中书积轻有周召不能为者而况暂焉冢司之虚伫沸乎人心之多疑或云巨奸之复来或曰外闱之晋拜议论交撼证候可惊忽开昌运於千龄乃宅耆儒於百揆致君之责实重当世之务孰先恭惟某官四海一贤两仪间气齐家治国平天下夙韬大学之经纶佐王经邦统治官素抱太平之纲领时止则止当为必为人尽倚冰我则为仲宣之接淅衆方辞甲我则为裴度之请行既深愜望霖之心宜即展擎天之手然适处艰难之会正有资撑拓之功仰而思之非无事者如国计当裕而边防当飭士风当美而民瘼当瘳此虽久积於弊源然尚可施於活着惟独正邪胜负之际最关治乱反覆之几清昼之狐狸方嗥南衙受屈高岗之凤凰欲集东方未明幸弦辙之一更宜弓旌之四出多培元气少抗外邪使朝廷之肃然则宗社之幸甚某自擢礼闱之桂即栽治化之桃耸观登庸喜至欲舞燕雀贺厦先歌芘寒士之诗蟋蟀吟秋当续得贤臣之颂非私祷也与衆望之谨具启事专人驰贡钧墀百拜申贺伏惟钧旨俯赐鉴察不备谨启

贺何提干

恭审入登法从就领神臯夜半思贤划闻汉宣室之召日边作郡惊见赵京兆之来辄持一瓣之香以贄九顿之贺恭惟某官才弘且毅器博以周运斤成风解全牛於四顾策蹇奔电洗凡马而一空自其不卑小官於州县之间已知将降大任为社稷之重刚亦弗吐柔亦弗茹以霽之手而把麾威於不怒信於不言以天地之公而持斧翱翔卿月驱驰使星足用度而不斂於民士无饥色有仁义而可利吾国王曰遄归第版曹适当煎熬乏兴之冲而京邑又有弹压不行之弊狐嗥万状蠹穴百端如上必欲无拂乎人主之私心而下又欲不伤乎天下之元气虽有智者实惟艰哉惟公权衡二者於熟虑之余则我邦家庶乎有无穷之福方见君子有益人之国母使小人执理财之权苍生望之赤心及此如某者穷途场屋借迳右阶虽素无根柢之

先容未甘与草芥而俱腐月乌三匝方吟遶木之无依雨燕孤飞尚冀卷帘之放入一忱归向
万舌莫弹谨具启事专诸台墀申贺伏惟台旨俯垂鉴念不宣谨启

贺王金枢

某伏审显膺宸渥擢赞庙谟江左喜见夷吾屹为砥柱中国欲相司马先领天枢增重朝廷耸
瞻夷夏共惟某官盛名盖世直道致身於衆人方醉之时冷揩醒眼居万物为圜之世独秉方
心遂从班班乎中外践馘之时已知卓卓乎弘毅重远之器总司制司之条画足镇关中春官
天官之规模可推天下宜从琐闼即上几庭矧惟世事江涛之秋又值人物晨星之会兵憚而
国弱财匱而民贫及闲暇可以有为以疑信费於虚掷惟事事备乃可以无患言人人殊何以
成功必资运帷幄之中折冲尊俎然後坐庙堂之上不问甲兵邦其永孚於休公有无穷之闻
某窃依大厦侧听温纶休哉登庸喜而不寐帝谓何见之晚汉岂忧匈奴哉天将大任是人商
为真宰相矣非私祷也与衆望之

贺程金枢

某惶惧顿首加拜稟申枢密端明相公先生钧座前某伏审明廷涣号右府升贤上念李牧廉
颇冀精神之强赵王命程伯休父图宥密以兴周增重朝廷耸瞻夷夏共惟某官渊源伊洛人
品富韩万顷涵波澄之不清淆之不渝一团和气听之也厉即之也温自入长於乌台即跻荣
於紫阁御史作朕耳目持刚亦不吐柔亦不茹之心文昌为天舌喉行进思尽忠退思补过之
事宜从雉正径上鸿枢矧惟云云某以书生为门弟子闻明主得王佐才休哉登庸喜而不寐
紫泥一下咸谓金书之得齐贤瓿墨又新倚需中国之相司马非私祷也与衆望之伏丐钧照

贺胡殿院

伏审擢从谏省晋贰台端玉立坡头久抗青蒲之节芒寒殿上再扬白简之风除目一颁金口
交庆恭惟某官邦之瑚琏学者斗山忠言嘉谟有舒蕢诸子之不及细旃广厦非唐虞三代则
不陈龙旒简知豸冠益峻当栗烈冰霜之操为胚胎霖雨之基某芘窃万间喜闻三接燕雀之
贺厦屋辄控轮囷鵬鹗之在秋天伫观凌厉深惭尘渎伏丐渊涵

贺丁司谏

伏审龙墀疏渥骑省升贤白简回天已芒寒於柱後青蒲伏地又玉立於坡头吾道之亨下民
是望恭惟某官邦之瑚琏学者斗山峩惠文之冠风采闻於天下坐细旃之席仁义陈於王前
简在帝心擢司廷诤君子得輿民所载也母使昌黎之疑阳城袞职有阙我仪图之更令淮南
之憚汲黯栗烈冰霜之操胚胎霖雨之功某芘窃万间喜闻三接辄凭一纸以写万分无任冰
兢伏祈渊鉴

贺吴守

某伏宸宸疏荣辅蕃借重一丝高洁犹有汉故人之余风千里廉平又见吴河南之作守下车戾止交笏庆之恭惟某官眉山之苏华阳之范蓬山直上便当执笔於二螭棘寺横翔胡尚持麾於五马行且召矣姑少俟之某一别转头五年捻指未由面贺徒切心倾维巢而鳩居之幸有滕君之?在及門而马後也勿云为贾之贺迟盈臆愿言非舌可尽伏丐台照

贺邵正言

戊戌状元之及第独冷甚安庆历御笔之谏官新除再见鹤鸣而和鹏怒则飞喜直道之可行宜清朝之增重忠良得路已辨蔡君谟之诗议论回天必须张元素之力非私祷也与衆望之某虽病欲归因喜亟贺万间之托大厦不徒私上栋之安一言之订千金庶或伸南衙之屈深慚尘渎伏丐渊涵

回赵少保

某伏以天子维辟公实赖鹭飞之助宗庙为小相偶叨骏走之联奉以周旋曰予先後适际庆成之始允为无疆之休未罄贺私先蒙逊牋兄弟婚姻无胥远矣来此雍雍神祇祖考其安乐之锡之简简略陈稟谢未究愿言伏丐钧照

回镇江徐总

某伏以诸侯上之王人已闻环召三馆中之冷客犹辱盃传旨哉竹叶之香华矣菖蒲之节久闻公瑾愿为不觉醉之交未许屈平乃作我独醒之客下拜受也中心藏之伏丐台照

回王检閱

某伏以九重涣号半刺借贤奏上汗青已就补天之巧香传泥紫忽催分月之行除目一颁金口交庆恭惟某官师尊姬孔奴视迂彪虽骊龙之珠惜为渔者之所得然塞马之福讎非鸿造之复还便当立柱下之班胡乃屈治平之驾会且召矣姑少俟之某不能留行慚无举羽之力薄言往送冀寬接淅之期无限心丹尚须面白伏丐台照

回南班冬

鲁云喜书又报有年之兆赵日可爱易为向阳之春茂对昌辰宜袞殊祉恭惟某官为善最乐大雅不羣舒柳放梅天必私於玉叶拔茅连茹地行锡於圭桐某濫伴吹藜又闻鸣竹方图面贺先辱手笺百万买宅千万买隣密迩仁人之里一阳为复三阳为泰愿依君子之明无限谢丹尚须控白兹祈台照

回徐总

君子占七日之亨阳从地起王人序诸侯之上福与日新方拟庆笺先蒙巽汗恭惟某官气排冬凜德配春和一綫添长缓如丝之六轡重緹嘘暖回挟纆於三军或遄其归可拱而俟某冷伴青藜之杖浪辱蒲萄之觴既有滴红宁憚斗十千之直第虞飡素不无困三百之讥感藏诸心言不尽意

回西仓送酒

兹申扬旌拂日拥纛朝天且分万斛之春例及百僚之底光生节朔惠重泰山今朝捧汉殿之觴被沾丐者多矣他日作商岩之醴愿公溥其庶乎具此控酬伏祈锡簪

回皮嘉兴

气应黄鍾又报放梅之信香凝画戟顿回隼李之春对此新阳宜尔遐福某未由执贄先辱传觴勿谓孺文之饮此特私恩但见公瑾之交不觉自醉下拜受也中心藏之幸有滴红宁憚长安斗十千之直第虞飡素不无河湑困三百之讥感藏诸心言不尽意

回南班正

玉历颁春又报桃符之换璇源袭庆宜增葛藟之长未即贄庭先蒙坠汗恭惟观使领卫太尉振振公子蔼蔼吉人脱颖金枝自是向阳之木分封圭叶行连拔茹之茅与时偕行何福不至某居蓬山底托櫬边四为鄮五为陆幸甚藩篱之剖破三于耜四于趾但求畎畝之归耕亟报掌书余需面贺伏丐台照

回诗秘书送物

某无功受素飡之禄方惧河湑之貽讥闻君上白玉之堂乃许瀛州之随步未由贄庆先辱贄笺馈我生鱼既有化天池之便酌之浮蚁又欣回冰谷之春玉莲深契於苦心綉瓜可托於永好粲然之文驩然以相爱得之若惊长者之赐少者不可辞归之斯受尚须面白以控心丹

回王漕贺新除

伏以东观底僚偶塞除书之数西清法从忽来华剡之颁得之若惊报於何有退思僥冒益重凌兢昔繙閱乎道家山之藏尚訛渡豕今超躡乎兰台郎之选宁免濡鹄所当後汰而前扬莫匪左提而右挈一字之褒荣於袞辱先施之七襄之报不成章非敢後也尚图酬控以罄谢私伏丐台簪

回安吉杨守

六十属观象喜颁魏阙之条二千石惟良融作雪溪之庆与时偕极何福不臻恭惟某官风韵

浚明天资凝远阳春布德已奉行玉札寬大之书肆夏升歌即展布金銮论思之事某未申赞
贺先辱贻笺兹饮公瑾之醇醪不觉自醉若作商宗之醴酒更赖汝为感之在心言不尽意伏
冀台照

又回杨守送重午

某冷坐道山罔记菖蒲之节香凝茗水忽传竹叶之馨敬再拜之得一醉矣有余谢悃尚须嗣
笺第乏报璫惟祈炳鉴

贺吴是斋弟中鄉试

种槐久矣殆如种德之多折桂以之何啻折枝之易山川且为之改色鸡犬亦为之动容恭惟
某人博大弘深高明寬厚以是父生是子载瞻砌玉之芳以难弟得难兄共副儒林之望三献
小淹於抱璞一鸣始见於惊人淡墨书名不在郡英之下泥金作榜即为四海之魁

贺何梅境入太学

监闹奏凯帝学腾声行当高占南宫而魁唱彤庭犹使同登瀛州而蜚英璧水造物者将玉其
成就大君子益显其姓名

贺何曾六丈得乡第

秀芝呈瑞已为鶚表之占撒棘登名果见凤雏之捷金铃夕报乡锦昼荣共惟某人望耸儒林
芳联棣萼韦经教子於诗书尤用其心窵桂收功在造化可谓有眼更看黄甲自有青氍某贺
在人先喜如已有遥想长安得报弟兄两处和气春风少顷浙漕联鑣父子一门人间天上谨
专申庆伏丐炳原

贺余吉甫升学【中十一名】

凯奏上庠共仰天荒之破名标先进咸瞻月窟之登香蔀桂林光增梓里喜溢萱庭之色荣联
棣萼之华明时幸际於乾亨嘉会果符於萃聚绸缪托好忻忭无涯昨陪宾庑之後尘过辱主
仪之前席未遑賸谢徒重甲颜奠彩驱羊盥手驾絨伸燕贺策勲奏马状头虎榜佐龙飞

贺人中乡试

彩戏斑衣雏飞丹穴秋闱勇战已登天府之名春榜联鑣又续世科之胼

贺同年中乡举

高题鴈塔增耀螺川鹭于下鹭于飞民献有十夫之翼【乡举十人】麟之趾麟之定天潢分四辅之辉【宗子四人】实为六一卿之荣适应五百年之盛兹逢喜事倍激庆惊泮水林中荷不隔同年之面凌烟阁上又将垂异日之名

贺周几堂请举

掉臂乡闾登名天府看榜中姓字如吾友果是得人想分内功名在造物岂容欠我到此日方知笃信诗书之效则天下岂果无持衡监之明某如已得之逢人夸此燕雀贺厦敢以豚犬而代行鵬鸞横秋更冀鵬鸞之速化心之所慊言不能宣

贺吴是斋入室

肃涓良辰荣归华第木石之奇规模之壮可知势力之恢绳墨之巧斧斤之精皆出主心之用
在道傍免三年之叹见胸中有全室者存未至往观且陪申贺遣苏軾而致敬具毕瓮以助懽
笑而留之幸何大也

贺能和尚生日

日临良月天借小春万宝呈祥一佛出世人共天赞善类均懽恭惟某托在契厚倍剧忻愉敢
指南极老人星仰祝西方无量寿漫持菲物僭侑伊蒲

回人请

扫门求见方愧鲁人之臯开阁相延乃辱郇公之翰圭三跪诵鼎九恩隆虽私心欲退以循墙
然厚意不容於避席懽然之恩灿然以相爱辱先施之长者之命少者不可辞事斯敬矣

方聘陈

元老克壮采芑之猷藐焉冷胄宰相不对治粟之问华矣名门昔相望乎周汉之间今幸托乎
朱陈之好恭惟令侄女某小娘幼闲四德有南涧苹藻之仪荆某次学生某家传一编匪东山
芝兰之子弟荷不弃菲葑之体遂获缔丝萝之盟诺既拜於千金币敬陈於五两圭马而琮锦
绣甚惭庭实之微屏雀而褥芙蓉行近门阑之喜

方聘何

咏扬州之梅清矣参军之胄采新田之芑冷哉元老之家幸作合之自天俾借荣之有地恭惟
令女拟封于沼于沚习知鳩德之仪而某次男於礼於诗粗闻鲤趋之教幸因冰语遂契月书
定盟已及於三年纳采尚迟於一介虽圣贤之训不以货为礼然婚姻之始非以币不交辄略
弥文敬陈薄贄圭马而琮锦绣愧无周行人使聘之将屏雀而褥芙蓉尚冀李监宅门阑之喜

葵心无限楮面莫殫

蛟峯文集卷三

卷四

钦定四库全书

蛟峯文集卷四

宋方逢辰撰

序

严州新定续志序

郡之有志所以记山川人物户口田赋凡土地之所宜也严於浙右为望郡而界於万山之窟厥土坚而隔上不受润下不升卤雨则潦霁则槁田则土浅而源枯介乎两山节节级级如横梯状其民苦而耐其俗嗇而野其户富者亩不满百其赋则土不产米民仅以山蚕而入帛官兵月廩率取米於隣郡以给而百姓日余则取给於衢婺苏秀之客舟较之浙右诸郡其等为最下下而严之所以为望郡而得名者不以田不以赋不以户口而独以云山苍苍江水泱泱有子陵之风在也郡志自淳熙後缺而不修者距今七十余年矣吴越钱君可则以太府丞来守严政事之暇为之访蒐以补其缺编削讫事走书属予为序予谓严为我太宗皇帝高宗皇帝建旆之地今皇储赐履之封则一郡之山川人物风俗户口田赋职方氏皆欲知之矧惟天子圣明勤恤民隐凡州牧之出辞入覲必详访焉是编之作非惟可以备顾问亦可以少助宵旰民瘼之万一也

云塔序

南台沙合河路通先出状元後相公此晋人语也至今方验水遶壶公山莆阳朱紫半此古语也後渠水包山而高科者甚衆如响斯答岂人才之隐显尽在天而不在人欤此犹曰阴阳家之说非吾儒所信也三山千簇寺七塔万枝灯谢泌此诗盖谓闽多文章士秀气聚於山与塔也妙果院造一塔范文正公曰此番水文章之应因目曰文笔山後二十年赵汝砺果魁天下文正何人岂惑乎阴阳家者予谓宇宙间一气也山川气之宅山川之气有厚有薄则鍾而为物为人亦异故山之润者必有玉川之媚者必有珠茂林蓊郁芝兰郁乎其间梗楠杞梓松筠楸柏挺出而特起者必天地英华刚劲之气宅乎此也惟人亦然穹崖深密必有彪硕朴厚之人崇岗峻拔则当出磊砢岌嶭之士申甫降嵩岳轼辙枯眉山其验着矣漕贡进士方君至京谒予谓其乡自溪堂後未有显者今几百年气数当一复阴阳家谓是水口值风雷峯若文笔耸立当有掇巍科者今拟其乡之同志峙一塔於云头之峯以迓气数之复予谓君不必以阴阳家为辞但举文正之言谢氏之诗以扣同志孰不闻风以兴

横域义塾序

橫渠先生有志於復井田之法嘗慨然欲共買田一方畫為井田而行之一鄉先儒之行好事其志之烈如此予於三代鄉里之學亦有志焉嘗願得屋一区聚鄉黨之英教之讀書講明義理而躬行日用之斯亦可以自求相規之益也歲在庚申婺之士相與踵門而告曰吾鄉有橫域蔣君沐慨然有淑後學之志創義塾而請予為之師予曰是予本心然師則不敢姑相與正其始而以待當世之賢師可也明年春扁舟泛雪直造雙峴與塾主相與訂正所以為教之條目一句之中以九日讀書講明義理而以一日為科舉業條畫具行之越月塾主請載之冊曰又當創新塾而恪守之予謂見義必為此勇者之事樂得天下英才而教育之非君子不能推是心塾主以君子之心為心而又勇於義若是則予曷敢不成其美遂錄其大槩而並為之序其或規模之有未善者正以待方來之賢師訂而改諸

誠齋文脰集序

人莫不飲食鮮能知味也知味者在飲食之外也誠齋先生磊磊砢砢挺挺介介故發而為文則浩氣拍天吞吐溟渤足以推倒一世之豪傑豈必聱牙屈曲波譎滄詭艰深蹇澁思苦形枯使人讀之不能句然後為工哉雖然大篇巨冊浩渺無涯或傳於經或集於文或散於遊戲之翰墨繁窳屹屹猶有未能盡窺其班者況場屋一日之士乎建安李誠叟取先生片言只字之有助於舉子者門分條析為前後集前集為綱者四十三後集為綱者三十二名曰文脰蓋鼎嘗一臠皆足以炙人口而膏筆端也千里外來徵予序予謂先生之文豈止於舉子之助而已乎舉而措之可以撐拓宇宙彌綸國家黼黻皇猷袞冕古今知味者又當於此乎求之母但曰脰炙而已矣

邵英甫詩集序

詩不必工工於詩者泥也諸所以吟咏性情足以寄吾之情性之妙可矣奚必工前輩有以放而詩者謝靈運是也有以狂而詩者李太白是也有以寓而詩者陶淵明是也有以窮而詩者郊島是也有以怨而詩者屈平是也以文為詩者昌黎以史為詩者少陵以俠為詩者非今之江湖子乎放也狂也寓也窮也怨也文也史也雖其為詩有不能皆出於情性之正者而其所以詩則亦各寄其情性而已惟俠則詩之罪人焉邵兄英甫吾鄉之秀也讀書之隙且寄意於吟咏集而成編來謁予序予謂子非俠者也豈其文乎史乎窮乎怨乎抑狂乎其放乎子以儒業其身而志於詩子姑以此寓性情可也勿泥於工請子識之

汪君明詩序

汪君明以妙年挾英氣而為詩以吟藁一卷並為序介朋交示予曰願得子一言以自壯焉其自序之說以作詩未能工方將為子長游遍走天下名山大川歷覽旁搜以發其英華果銳者此蓋得於馬子才送蓋邦式之辭之意也予謂子志英矣又將何以進子乎昔老泉蘇公之初為文也舉進士不中曰此不足為吾學於是閉門讀書絕筆不為文辭者五六年涵蓄充溢抑而不發久之慨然曰可矣由是下筆沛然但見其中之源泉混混而不知其所從來至於詩之優柔騷之清新投之所向無不如志此蘇公之自述也然則子長之文得諸天下之名山大川

而苏公之文得於环堵一室之内而已矣以吾子之才之气作诗特余技何事於子长尚当端拜老泉先生以为师则他日为远器君明日唯於是书之为赠

汪称隐松萝集序

穀江称隐年妙而隽於才故有余力於诗今为严正学以郡檄核士【阙】籍于淳之乡校予耄病峡中称隐顾焉出吟卷二集曰子为我评之予素不诗不晓诗家尺度姑与子论诗之道可乎喜怒哀乐未发谓之中发而中节谓之和诗所以吟咏性情而已矣感物而动矢口而言不失其性情之正斯可也读子之诗如咏青藤杖属玉枯桑数章夷易而有沉潜如客淮沿途诸诗英发而有感慨夫逊言而沉潜者藏乎智也直道而感慨者见乎义也即此充之其进孰御或曰如子所云诗一出於情性之所发则从事於诗者将何所用其力而诣其至乎曰学以培其本气以达其支则横驰直鹜皆不失其正矣称隐唯之否

洪菰岩先生诗序

唐李汉婿昌黎翁乃能集昌黎所作而序之汉亦得托以自闻於後世夏生濂予族之外孙也以妇翁洪磐陆翁平生善题咏惧其死而诗不传录其藁为一卷求潜斋石庵诸老为之序以托不朽此亦汉之用心欤自陵谷易位士失其本心语之以道义则笑而走濂也独汲汲为妇翁存其诗其笃志好义足以厚人伦起人之善心允为可书濂年十二三时陆翁一见奇之即许妻女焉陆翁可谓能知人而胸中倜傥不凡矣岂徒能诗而已哉

鴈荡林霁山诗集序

霁山林德阳前进士也壮年英华果锐之气无所於托瑤瑰玉佩大放厥辞吟卷一编嘱朋友胡天放转致石峡山中请予评之予惟诗所以言志盖直泄其中之蘊而无待於外者然而骚人文士於得意处每曰神助盖光风霁月有以发之然後勃勃有奇气唐人谓张燕公守岳阳而诗益凄惋盖得江山助也德阳自鴈荡游会稽而钱塘潮汐之吞吐吴山烟霏之舒卷瞻望兮咫尺缥缈兮余怀所以触其情发其感者朝朝暮暮无日无之故其凄惋夷以远闇以章率有古意非湖海吟笑而已矣於诗家门户当放一头因书卷端以归之

胡德甫四六外编序

世人有言司马君实不能四六无损乎四朝元老予谓不然司马公者所谓梓人不能葺牀足者也若其锯者锯斧者斧梓人岂能欠斯人哉汪彦章作册康王文曰汉家之厄十世宜光武之中兴献公之子九人惟重耳之尚在天下读之戚然起朝覲讴歌之心曰吾君之子也寿皇初两淮保障虚张魏公以右相视师寻以谗召洪景伯当制曰棘门如儿戏耳庸谨秋防衮衣以公归兮庶闻辰告儿戏本指边将而天下谓诋魏公而不平夫以一言而收天下之心一言而缺天下之望则四六可苟乎哉胡公伯骥德甫余乡之老师学问渊源山涌泉出而尤长於四六近得啓事数篇观之交乎上者不谄交乎下者不倨且铺叙旋折咳唾历萃如散文每篇

於頌之未必有所規規之未必有所勸若施之制誥當有彥章之得而無景伯之失矣陳后山有言韓以文為詩杜以詩為文余於胡公四六亦云

林上舍體物賦料序

賦難於體物而體物者莫難於工尤莫難於化無而為有一日之長驅千奇萬態於筆下其模繪造化也大而包乎天地其形狀禽魚草木也細而不遺乎纖介非工焉能若觸而長演而伸杼軸發於只字之微比興出乎一題之表惟工而化者能之前輩賦鑄鼎象物曰足惟下正詁聞公餗之歌傾鉉既上居足想王臣之威重因足鉉二象而發出經綸天下之器業賦金在熔曰如令分別妍?愿為藻監若使削平僭叛請就干將因藻監干將四字架出擎空樓閣愿為請就又隱然有金方在冶之義識者固知其為將相手噫化矣上庠林君采長於賦月書季考每先諸子鳴一日出示一編曰體物賦料自天文地理至草木禽魚合二十門凡涉體物字面收拾几盡閣筆寸晷者得是編觸起春雲秋濤之思或可以化無而為有矣

周月潭詩序

三代而下詩獨稱少陵蓋其以史為詩不以詩為詩也武強周月潭因宇宙大變挈家東西走托詩紀其事蓋直叙其情而無事乎追琢者丙子丁丑盜哨之禍可考焉亦鄉之詩史欵因為賦兩詩以叙其端家世牙籤入劫灰猶存詩種發枯荑騎牛夜半歌誰和跨馬月明敲又推且說山中窮快樂莫言世上活輪迴欲知天地心安在冷看溪橋雪後梅又曰誰云世上無君子試看林間有散仙康節逍遙在行樂希夷快活只鼾眠不言宇宙山河變且擅風花雪月杈撞著頭頭皆太極賞心樂事浩无边

名物蒙求序

童蒙未識宇宙內事雖此身不識其所從來況同胞同與者乎法當從事物上起予弱冠時業書館苦於初學聰明不開為作蒙求一卷教之以天高地下萬物散殊人物之大原人倫之大本及其飲食衣服切已日用處使之先識其名次通其義積習既久雖木石之愚者亦豁然為之開明然後知天地間無不可教之人伊川程先生曰今日格一物明日格一物然後當脫然有貫通處初學之學雖與大學之格物不同然太極之冲漠無朕者豈在萬象森然之外哉此之所教特先其近者小者而所謂遠者大者亦不離乎此而已矣丙子後有朋友拾得此本於兵革煨燼之余者持示予問所為作之意遂為道其所以然

蛟峯文集卷四

卷五

钦定四库全书

蛟峯文集卷五

宋方逢辰撰

记

严陵浮桥记

严治万山窟无河渠无大陂泔遇秋夏即浮桥面州垒惟一衣带水宜无汹涌澎湃忧然歛流直注婺流横绝山包而水不泄一潦即又大浸居民遇梅霖常惴惴有鱼鳖之惧然此犹有时也由定州垒门直涉而南断岸千尺民由是出者耕焉器焉牧焉由是而入者薪焉蔬焉菓焉由是往来戢戢者贩夫贩妇货焉贸焉市所无郊运以入郊所无市载以出一日病涉则耕者器者牧者厄薪者蔬者菓者梗贩夫贩妇货者贸者滞吾城内外之毗且以病告此则旦旦之忧也於是不可无舟舟犹险也又从而梁之然後涉者始无忧虽然涉者无忧固有任其忧者夫舟与梁皆木下渰而上覆风雨之所剥蚀波涛之所轰脰舁担之所蹴压舳舻之所挽拽马牛之所腾践数年一葺又数年一易为费且浩瀚州家惮焉岁在丙辰李侯以胄簿来守兹土每事痛撙节下车首问輿梁之政侯亦可谓知务者斯役也舟若梁故者腐者悉撤而新之葺而仍者十不一二舟七十梁百有三十其制之广袤数之多寡悉仍其故鸠工集材於府治侯躬自检柅其受给也吏不得隐其营作也匠不得鹵莽故费不浮而事集工坚而人忘其劳会其用为缗万有五千为米斛者百材木绠铁不与焉十有二月梁成官民庆之属予记其事郡丞武博吴恺且语予曰此郡太守撙节力也余谓节用爱人此治千乘者第一义二者固并行而相为用也不节用者固不能爱人徒节用而不能爱人则其节也必入於吝不爱人者固不能节用徒爱人而不能节用则其爱也必反於刻世固有墙倾壁压而不能恤坐视民之坠水火而不拔一毛者曰吾节用也又有唾金谷一切泛爱甚至屠人膏血而濡洙乎蝼蚁曰吾爱人也出纳有司所专也而侯谨焉兴作人情所惮也而侯乐焉此无他视人之溺犹己之溺忧惕惻隐一触即奔迸不可遏而舟梁一事其火然泉达之始欤余家青溪滨熟睹病涉者重有感於斯而书侯名介叔字直翁宣城人也

天边风露楼记

乙卯之冬十月既望余自馆职言事不合以归友人卢登父上春官就坐嘱余记山楼巔末余方入林而登父将发轫请因扁楼之义共商之宇宙间一气耳掀簸万物莫劲乎风此天地之至刚汎濯垓壤莫泽乎露此天地之至洁故风露气之清以任者也肖翘惴栗洪纖高下莫不秉是以生以潜以动以华以实故受气之不刚匪洁者为朝菌为秋蒲为粪蝇为蝼人亦然贡薛韦匡用之固葩华阙庭而熟视诸贤骈首刀锯束颈栗股於刑余之掌握醞成汉鼎易姓

之祸君子贬其孱柳宗元刘禹锡元徽之之輩非不文彩??而比之匪人不辯芳臭万世秽之信越平布拔荆棘立赤帟而顽钝无耻似任而不清西晋之士擗鼻富贵芥视六合而无能为中原取一块土似清而不任三代之下何寥寥乎我思伯夷伊尹喜之慕之孟軻氏曰伯夷圣之清伊尹圣之任虽然軻特区别而言之夷尹易地一也登父屋於溪山境楼曰天边风露白云赵汉宗扁也风乎露乎取二气之刚且洁乎陟而俯之四望迢崑郁乎苍苍面浸寒碧蛟宅骊窟楼之伟观也左册右弦积床牙绀钜公名人走笔龙蛇楼之贮珍也笠樵入林斧烟丁丁讴渔泊艇燎月荧荧楼之朝昏也柘洲春蓝菰町夏甲圃秋橘霜坡冬梅雪楼之四时也其人如玉人醉我醒踞吟风涛已重物轻楼之宾主也斯主斯宾历览四时徜徉朝暮挟贮珍饱伟观把酒吞英风拂劒啸劲气风露在天乎在我乎穷则夷达则尹不绰绰乎汉唐诸子之孱秽当望避三舍

勤有堂记

余外兄吴景迈寺簿壮年筑居室经营数载而後略备旁为书室三间取昌黎之言榜曰勤有为读书教子之所丙子春宇宙大故屋遭劫毁独勤有巍然烈焰外景迈语予曰殆天未丧斯文子为我一言以训诸子余惟勤有之为言劳也力於所有事也人在宇宙间未有惰而生者农与工贾鸡鸣而起虽善利不同莫不孳孳各有所事士独可以不自力乎哉天下物之不可以力而求假使求而得之亦非可以力而有之所可以力而有者独学问所得天之所与我与生俱生者也常人於力所不可求者则遑遑以争而於可以力而有者反悠悠以媮不亦失其勤已乎人与万物之生天地间我乃得其全以为人天与我以人之形又与我以人之理而我乃不能承其所与而有之则人之形虽具而所以为人者则亡然则何以有之学而已孔氏之教法曰博学之审问之慎思之明辨之笃行之先儒曰五者缺一不可学之目有五所以行之者一勇而已矣学以弗能求能学之弗能弗措也问以弗知求知问之弗知弗措也思者必於求得思之不得而舍置焉是无勇也辨者必於求明辨之弗明而含胡焉是无勇也行者必於之善行之弗笃而苟简焉是无勇也人能行此五者决之以果持之以毅进之以序终之以不倦一念之决为贤则贤为圣则圣孰御陶士衡志在事功则朝暮运百甓以自劳苏明允志在文章则闭户读书十年然後下笔则沛然矣事无精粗无大小未有不自力而至者况以上而求为圣贤哉彼亦有以穎悟为道以鹵莽灭裂为学者其说谓不由阶级不假修为以致知格物为支离以躐等陵节为易简以日就月将为初学以真积力久为钝才匪徒诬人亦以自诬天下未有一超径诣忽焉而圣贤者吾景迈甫所取勤有之说意盖为此岂徒为撑肠拄腹五千卷而已哉

芳润堂记

文章以芳润擅名自陆士衡之说始予外兄吴景迈筑居室也於进修教子之所榜曰勤有於游息延宾之所榜曰芳润其用力於进修而游息於文章也欤丙子宇宙大故屋室为煨烬独勤有芳润二堂在予既为发勤有之义复俾记斯堂所以擅芳润者予惟山川之气升为云降为雨润莫大焉其滋液锺聚为根荂芽甲泄为春华敛为秋实芳莫大焉宇宙芳润之气吾与斯人凡有生者所共食也文章家士安能而专有之青溪之南去邑三十里曰云程其溪山演

迤其势宏以放足以大受吾景迈伯仲以诗书宅焉絕溪而南有墟市富者商者鳩焉其水陆达杭越通衢建凡舟车日夜之所奔走皆夺吾山川芳润之实以去之者溪山不改风景顿殊并落荆榛?市瓦砾俯仰宇宙山川芳润之气郁积磅礴无所发泄廼为山林枯槁者之所受用而独专其有於斯堂又非他人所得而夺之者幅巾藜杖徜徉山水间听往暮归历览无际斯堂之行窝也左右面势小垵大陵或曲而阿或呀而谷或崖而嶙峋或石而崔嵬一川横阵风之则波而纹日月则绚而章鸢鳬鸥鹭之出没鰕鲈魴鱖之洋洋圉圉斯堂之诗窟也或渔而扣弦或樵而行歌声呜呜而田家之抚缶夜漫漫而牧童之扣角或欣或嘅为过耳之飘风者皆斯堂之感心豪兴也日出而霏开虹收而雨歇云脱天空而月在水落石出而潭清凡朝暮四时之变化不齐者皆斯堂之澄襟霁宇也是气也流行於宇宙则为民物之所共有收敛於山川则为骚人雅士之所独专此吾景迈以文章家而擅之者欤虽然元气混沦絪縕於天地间着形於万物者孰主宰是孰翕辟是景迈甫平生用力於濂洛关西武夷之学自明而求诚由博而反约则夫文章之妙虽得助於气而实根於道登斯堂者又当索文章於睹闻之外

青溪县修学记

孔门教人要领一言以蔽之曰学道子游得之为宰邑法盖君子学道决不肯於仇其民小人学道必不忍於尤其上上不仇下下不尤上虽治国平天下可也於一邑乎何有严濂一丝凛凛有生气青溪严上流治万山窟其民蠢愚而坚忍豪家亩不能百甲邑版者不十室而岁收斛不满数百甚矣民之穷也习於穷故惯於忍穷以忍贫贱不能移苦以坚富贵不能夺教之入也莫易乎哉迩年来上下以?丝为功守迫之令令迫之民而胥吏最黠足以顛倒其长令之峻也火以?政之怪也湍以惊噫仇矣朝三暮四狙其不诈乎弱者买吏以为安强者伍吏以为市畏征者逃其田怖役者窜其户鸥鸣舞而不下矣为令者又相与诋兹邑曰难治噫斯民也三代之所以直道而行也民之尤乎上者其无辞乎淳佑辛亥四月石君孝闻来尹兹土越明年夏大水祸半天下而严尤甚城郭坏陵谷迁室庐十荡八九赖尹颠顿扶服而登之岸淳之赤子一饭必曰微尹吾其鱼乎越明年又裁以旱尹扶伤救死日不给虽大贤处此亦有未暇礼义之叹一日会邑之寓公秀民慨然以修学校为急尹之心子游之心也抑将以礼义救人心之溺矣虽然土木谈何容易尹曰费当自公出吾将请於郡民曰费当自百姓出吾当率以助尹戚曰是厉民也民悦曰以佚道使民民忘劳也尹捐俸以倡乡之秀民闻风兴起咸户相哀愿翼斯役而无尤其上之心羣目而凛之不日而成由殿而堂堂而庑庑而门此经营之序也大成殿规模旧虽壮屋老风雨摧压兹上覆悉改作余则撤腐易牢四隅易以游楹面殿设朱绿檻天井悉易甃先圣贤像加绘先圣座上下四傍设障加帷仍几而丹之庑下从祀七十二像升之殿东西两夹室殿北有堂三间曰化成旧梁栋微弱今易以壮撤榱桷重覆之气势弘敞东西各一室再整刷亦如之仍长谕馆焉长东谕西堂之北明室三仍扁兑轩轩外逼通衢旧甃颓塌来往者攀而入今易叠以峻之东庑入首创屋三间朱扉明牖扁曰东斋厅西庑如之扁曰西斋厅厅相联分两斋扁仍之斋相联有室四东则仍令尹祠土祠创五先生祠西则仍融堂祠学廩两庑旧无甃今甃之门三间及左右翼室并撤新所仍者无几并门戟易之左翼室仍扁直学位又旁室创为祭器库并图经在焉右翼室扁曰斋馆封土崇三十尺种杏扁曰杏坛庖屋两间在西庑北之右斋隶室两间在东庑南之左皆创也垣墉旧圯成熟路今厚筑而藩焉经始於宝佑改元仲秋告成於明年二月朔是役也邑尹啓之邑侯赞之乡寓翼

之诸生先後之庶民懽乐之乃集厥成庆成属某记始末某谓前令非不言修校也为其事者无其心分其事者无其人涂扃键粉墉壁已即功徒於室之壁书曰某年某月某日某人葺也今则尹亲督斯役又得乡之贤士夫老成缜实疏畅者董经营司出纳一匠一夫皆仿乡例和贸僦而来之饱而役之犒而遣之民悦於使工力皆坚实可经久不坏噫土木非乐事也而民虽劳且费也无尤固足以见尹无仇民之政然亦可以观人心矣尹辍俸为缗五千乡之秀民助缗五万有奇邑僚助缗六百寓公学职助缗万余刊诸珉姑以记岁月云

思堂记

琅溪余氏其曾大父邦程舍田於安福院者二十亩至於孙应龙暨曾孙继先志又两世以十亩入焉其祖妣方氏孺人墓於院之阳也厥後於院左辟一室曰思堂为奉先之所俾院僧主之春秋设饌外每岁孟春则轮差子孙同院僧徧诣余氏之先茔所诵佛经以代俎豆展省之礼是举也余氏有孙曰振玉者出家於本院实纲维是此报本反始之心歟厥孙洙请余记其本末余惟义理之教行於尧舜三代之时祸福之说兴於石姚之世天下治少乱多家之贫富不常子孙之贤不肖不齐是以尧舜三代之所宗主者有兴有废而石姚之所兴起者则有兴而无废於是孝子顺孙欲报其先者悉托诸石姚之所教者焉盖祸福之说可行於乱世庶彼之教不废则吾之祠堂亦可托之而不坠焉尔若振玉为浮屠氏而有孝弟心此则尤可书者

贛州兴国先贤祠堂记

贛州兴国地虽僻小先贤仕国也庆历甲申大中大夫程公珦以大理寺丞知县事二子侍焉学焉越二年丙戌公由兴国摄倅南安识濂溪先生周元公於理掾以二子师之即明道伊川二先生也明道生於明道元年伊川则生於二年侍乃翁在兴国时明道年十有三伊川十有二国史传曰明道自十五六时兴弟伊川闻周茂叔论学遂厌科举业慨然有求道之志盖此时也咸淳十年吾友临川何君时了翁试邑於斯考往牒知为大贤过化之邦二程子始学之地景行先哲廼创书堂於安湖於讲堂东奉大中公父子祠以元公侑之二千里走书介入严陵山中语予曰江西为周程授业传道之所实自兴国开先焉子为我一言以发濂洛授受之微旨以开斯人某窃惟圣贤之学自孟氏後无传距庆历凡一千三百五十年而周程出焉非元公无以传绝学於千载之不传非大中无以识元公於衆人之未识故祠以大中主之元公配之二程子侍焉若元公之面命以授而二程子之捧手以受者此为何物太极一图不以语他人而独以语二程子及二程子之教人则专以语孟中庸大学为主而未尝一语及太极或遂疑其非元公之书而争辩纷纭至今学者犹相衄齟呜呼夫所谓太极者其尽在图也不穷理之所自来则滞於形气之粗下而不足以为造化之枢纽品彙之根柢不体理之所实在则沦於空寂之高虚而不足以贯本末而立大中该全体而达妙用天之所以高地之所以下阴阳之所以动静此何物哉必有为之主宰者未有天地未有民物以前又何物哉必先有是理而後有是物也周子将教人以穷理之所自来不得不探天地之根极万化之源以为言故名曰太极又以其形形而实无形也故曰无极而太极二程子将教人以体理之所实在则不得不就日月事物切近者为言故曰道不离器器不离道二程子之不言太极乃所以详言太极之无在无不在也何也入孝出悌徐行後长即太极也桑麻谷粟日用饮食即太极也出门如

宾承事如祭即太极也为尧舜则揖逊为汤武则吊伐为禹则胼胝为回则箪瓢即太极也去齐则接淅去鲁则迟行为乘田则牛羊茁为委吏则会计当即太极也语其隐则上天之载无声无臭语其费则即事在事即物在物程子之言道器其得於周子太极之说欤某不敏姑以是复何君之命

常州路重修儒学记

至元二十二年乙酉常州路学正前乡贡士李君阐等书来言常州自乙亥岁火於兵幸夫子庙在唐君骏发以乡国名士为教官立司存瓦砾中先汛扫以新庙貌次营构以居生徒修讲堂修经阁建直舍建两庑为六斋六楹暨内外夹屋垣墉四周咸一新之学田为戍守军将夺占者请於官复其旧越十年甫讫事徵予一言以志之予谓唐君有功於乡学大矣考州志常为延陵季子采邑今墓在焉盖先哲兴逊之邦也立学自唐李栖筠为刺史始五季以兵毁宋景佑乃复建炎又以兵毁越绍兴再复今又一毁而一复矣噫嘻此天之不肯丧斯文也天以於穆之命寄於人也书谓之帝衷诗谓之民彝帝衷民彝不能悬空以独存於是寄以学校无学校则三纲沦九法斁君不君臣不臣父不父子不子天下之人胥为禽兽维天之命於穆不已者畴托此天之所以不肯丧斯文也虞书天叙有典敕我五典五惇哉天秩有礼自我五礼有庸哉五典五礼於天何预然不曰我叙我秩而一则曰天二则曰天盖斯道之原出於天非人力所能造为者尧舜特为之守典礼而奉行之耳挈帝衷民彝之目寄司徒今州县有学学有官其司徒之属也三代盛时家有塾党有庠国有学术有序五典之教自乡州而达於党族闾比自遂县而达於都鄙里隣其所讲明所践行者皆此物也民彝宣明於学而天命流行於民熏?浸灌是以风俗醇厚人人有士君子之行此天下所以久安长治三代衰学校废教法坏入之道不立天下遂为纷纷争战之场天生孔子孟子扶帝衷民彝出之污秽糜烂中载之六经载之七篇以示万世而後维天之命於穆不已者始有所托三代而後历汉晋唐宋一千六百余年其间虽有大乱大祸而天地犹得以位万物犹得以育者斯文未丧孔孟之教犹在也後之学孔孟者其以四书为根本以六经为律令格物致知以穷此理诚意正心以体此理学之博以积之反之约以一之庶不负天之未丧斯文之意

癸丑严陵乡会题名记

宝佑初元夏五之四日皇帝临轩策士越二十有二日赐文武正特奏名发严陵进士洪承祖暨方哲凡一十人续郑璫又以今科中严之杰士山涌泉出或齿穉且壮而先登或器大以周而成晚或以韬略而出间道或以法理而收奇功视丁庚两科未逊也乡之仕於朝居京者杨钻约乡之新进循比讲序拜礼乡寓致礼者或自远而来馈者或留京而预集者乡贵郡侯李鏞辈偕诸邑尹多以币将意乃差谷盍簪於湖山之四面亭礼毕泛舟从游筮豆洋洋絢履锵锵斯亦乡邦之伟举欤时孟秋後五日也

徐义士旌门记

岁在壬午至元十九年十二月浙西道宣慰使司奉行中书省劄以徐洪甫赈济饥民令府县

旌其门闾并将户下一切科役并行蠲免淳安县尹丞若簿李君震高君天佑魏君惟寅皆以力行好事为心咨於乡之士为之榜曰积善徐家复徵予纪其事严在万山中本无富家然有洪甫之力无洪甫之心故宁辱身以藩货不肯扶危以利物有司此举岂为一家所以愧鄙夫励薄俗也予安得不特书以为风俗劝

蛟峯文集卷五

卷六

钦定四库全书

蛟峯文集卷六

宋方逢辰撰

絕句

题卢可庵天边风露楼

龙泉三尺倚天横浊世滔滔我独清一柱高台仙掌起愿推一滴活苍生

题柯峯谿掾钱君叔行敬简轩

是非辩白只须钦敬简奚消读吕刑一片公心一双眼心醒醒则眼醒醒

赠尹巽斋数学

阴阳晴雨可前知此是人间第一奇鼾睡华山何日觉烦君更与问希夷

题吴氏梅堂

闻君家在雪边住靠尽阑干索尽诗只怕梅花应冷笑清香元不要人知

问天

胭脂十二万风尘一样胞胎父母身天欲杀之胡至此厥初何用降生民

天对

羊祜乘危乃并孙杨坚非解自蚕陈长江不是无天堑只为江南多妇人

赠墨士翁彦卿【因其以竹墨来谒故吟诗以?】

一团烟里蓄明光做出棱棱竹样刚语汝好寻台阁主直将劲节扫豺狼

赠风鉴曹老眼

九重拊髀叹才难
币聘皇皇难未戡
老眼试将天下看
岂无颇牧在东南

送胡兄远游

人言行路险於山
君却乘槎欲问天
毕竟家邦总闻达
鸡鸣猛着祖生鞭

赠月心

苍苔破屋生涯足
淡饭清汤梦寐安
认得秀才穷快活
何须烦恼做穷官

赠大佛老子卖药斋僧

药中得报饭中施
始实终空不是呆
水复去来来复去
谁知无去亦无来

赠南山寄傲轩

着心寻处元无物
开眼见时都是天
楚市少年霸陵尉
纷纷蠛蠓过吾前

赠相者

烟霞泉石在空谷
富贵貂蝉在北方
林下野人无可相
相人须去相侯王

赠梁电目

满睫尘埃寸许深
世间豪杰尚山林
冰壶指见形骸外
难照江湖一片心

七言律诗

庆明堂礼成

合宫芬郁彻垓埏
治象阳明景烂然
云气朝隳疑欲雨
帝心夕惕即旋乾
皇穹后土实临汝
祖德宗功鉴在天
既灌更祈如未灌
缉熙此福万斯年

和刘府判【名夔相人】

英雄牢落谷音空
敦薄犹存柳下风
善政有声闻六邑
病躯无自谒千峰
乾坤许大心知少
道义相交我辈同
珍重瑰章何以报
烟云留护峡山松

和张寓轩题孤山二首

客骄专恣讳言兵祸本伊谁自种成潮汎有时声转怒权奸一死罚犹轻道无起灭无今古物有消虚有长盈赞化正需豪杰手华山深处卧昇平

又

西湖奋事逝如流红紫尘沙新绿稠昔日赏心今日吊前人遗迹後人游雨观水色连山色晴看湖头送日头鸥鹭无情自来往兴亡不管帝王州

挽有宋周府君袁夫人

孩提均识爱其亲未有君家最睦姻逊畔以全诸父义在原此岂妇人仁一门邹鲁斯文地三世羲皇太古人朱紫满门直余事九京可作百其身

挽宋尚书余公二首

时样多求赫赫声惟公独韞玉精神传无房杜可书事心即羲皇太古人日月升时先奋翼风云浓处忽抽身苍苍忍夺客星去却使凌烟忆老臣

又

扁舟一叶掠垂虹因泛江莲得识公千里军民安席上一年宾主坐春中斑催紫橐朝天近梦到黄梁霍地空契阔真情言不尽只将楚些寄东风

挽宋吏部赵公

翱翔碧水又蓬山再入郎闾即丐间屡疏朝端词梗梗一麾道院政斑斑阁因书创家邹鲁堂以亲名行冉顔所恨与公非识面一诗寄鴈写潜潜

被召不赴

万里黄华遣使輶姓名曾覆御前瓯燕台礼重金为屋严濂风高玉作鈎丹凤喜从天上落白驹须向谷中求敲门不醒希夷睡休怪山云着意留

赠樵隐

樵仙深入琴棋境一笑出门天地宽人世已非存朽斧土音不改只南冠琴中自有鍊心在外何妨道眼观霁月光风元属我饭牛何谓夜漫漫

题河潜斋安乐窝

闲中历览古和今夫岂全无所用心书为重看因熟读诗添新作费沉吟消磨暇日尊前酒
和熏风膝上琴过去未来都不管却看明月是知音

颂徐大可为六县减免税粮得请

六县驩娱已独劳肯心行善是人豪乞怜请命蠶丝价起死回生鼎釜?谁谓他人无力气不于
好事拔毫毛老夫赞咏非夸诩此在春秋亦合褒

石峡山茶盛开

水崖赤骨物俱老火树生阳我不孤鍊叶几经寒暑战丹心不为雪霜枯托根峡里老居士加
号花中烈丈夫顔色不淫枝千古洛阳牡丹药只为奴

又

凡卉春妍夸国色此花阴极抱阳明人疑芝草非时出我谓丹砂托树生可惜洛中忻富贵不
知霜里蓄精英老夫诗若宋初出牡丹药如何得盛行

古体

前修史官讲吏部陈大着赴镇贑州

蠡湖擘破亨衢开山川鍾作魁奇材九关叫後入云岫六阴卷出登蓬萊着庭万卷了汗竹粉
闱胡事被先幙非徒五马人生荣正要急流刚沃足章贡二水分西东江右九郡斯为雄亭横
尘外眇四海台插天表森孤峯三百里水见沙磧一十八滩如劒脊醉读题咏呼坡翁此是太
守风月窟又闻犷俗多惊湍况有蛭尾隣诸蛭付之重寄忧亦大此是太守思虑关伐木诗废
友道缺道山幸有诗送别一言爱助当何如思虑先之後风月

钱判府国史直讲秘书赴镇南劔

番江之峯高插天番湖之水渊其渊山川鍾作一书簏胸次汹涌万斛泉呼来天上佐良史唤
起英雄斧奸魅玉堂万字云锦章赤墀一对国士器天为资善择畏师汝作羽翼从吾儿光芒
忽报动双剑翱翔直去分一麾我闻了翁鍊梁脊生晚不得拜履舄又闻龟山与延平首为东
南揭标的今君剖符守其乡视三先生为有光开明义理当日用扶植气节争秋霜知君报政
只数月袴襦万口九天彻去时好趣芦花天归时又见橙橘节道山繾綣持一觥临别惟有诗
送行执手不敢赞谀语版样惟视三先生

和金事夹谷之奇韵

夫子说周易肇开太极分及乎作春秋下逮西狩麟混辟至决裂坚冰至习驯三皇何皞皞五帝何纷纷卓哉洙泗翁道大孤无隣於是作六经以救万世人孟氏辨义利战国骇所闻不肯为老聃和光同其尘人不识四端岂知有君亲孔孟作日月然後夜向晨天高与地下中立师与君师以扶纲常君以治广轮廉耻甚缺钺礼教威斧斤自古立宇宙以道为精神清溪斗大邑土瘠民甚贫虎豺方恣睢駟騊忽谏询痛民若赤子礼士如上宾簞瓢在陋巷穷则独善身家有读书屋乃为劫火焚仁人忽行恻仲氏敢具陈公肯挈坠道天未亡斯文移檄作主宰歌诗示恩勤弦歌已久废简陋尚可因祠堂俨遗像生徒招惊麋户内有洙泗山中见华歆光霁挹茂叔粹盎师伯淳体用契忠恕恭安想天申仰师千载上兴起三代民剥穷果不食贞下元又春太极在何处青归烧?新

送潘翠谷

无屋住僧庐无菜挑野草野草风味长僧庐人迹少剥剥谁扣扃访予事幽讨钱塘有骚翁自号翠谷老疋马游南墙要伴松竹好遐思到山人迂寻出诗藁诗无怨苦吟扫退郊与岛胸次鲍明远笔下王逸少我观阴与阳禅代何时了不能为鲁连尚可作商皓长歌黍离篇酌酒问旻昊

赠术士刘衡监

高目下耳赫如监福善祸淫平如衡顔癯胡天跼胡寿季氏乃富宪乃贫伯道无儿汤有後造物岂是监不明孔明遗恨懿血食造物岂是衡不平当知稟气有清浊所以人品有善恶至若夭寿与贱贵又是稟气有厚薄清浊厚薄物自圣洪纖高下天何言君子惟以理自充英雄难与造物争前人论理不论气不信试问刘监衡

赠星命舒云峯

五星聚东井天下王业开五星聚奎宿天下多贤才蚩尤扫【阙】 揆抢卷飞埃日月黄道见火罗计孛乌能为之灾云峯挟术善说命穷通贵贱非所问敢问何时聚五星今年五星聚何分圣人在上天下平疏食饮水甘曲肱

题卢文峯十二知丞文集

骊珠一颗千仞渊渔翁探得遭骊眠一朝吹堕千万颗恐是蛟骊卧半天骈花俪叶妙天下文赋直追古班马手抉河汉裂锦章写在诗歌轧骚雅大篇赤手捕长蛇不须控勒骑生騊短篇任意起忽伏苍江浩浩涛中槎文章妙手压场屋到底亡羊还得鹿庐陵方买载月舟清谈又展朝天轴军将打门书一封呼起醉梦为醒松只怕至宝不肯留山中雷霆风雨取去还蛟龙

挽郑直斋居士

有侄宰相才昔惟吕文穆有婿国士器昔惟晏同叔公乃兼其荣秀气塞一门为国作瑚琏赖公培福根世态方恶直公乃自立的掉头蛰触争冷坐雪月窟今世能几人如公心迹清馨艳有如此公死犹如生

赠杨内舍景尧刲股

子肉可疗亲或曰不敢毁不见母生儿生死一间耳此身母之身非可认为已杀身可救母当不爱一死天理通神明寸肤直糠粃苟能充此心是即学曾子

赠五星陈东塾

粤从动静极互根裂为二气分五行未有二气先有理理与气合人物生人惟禀得天地气故为耳目为口鼻人惟禀得气之理故为仁义为礼智气为人形理为心同是水木火土金今人问气不问理茫茫只向天外寻人而不仁木已死不须更论败在子人而薄义金已伤如何却说生在已无礼无智水火灭不忠不信土气绝人於心上斩了根是气安从有萌蘖出门一笑逢星翁谈天议论迥不同若能论气又论理太极只在桃包中题跋

青阳方氏义聚跋

一生二二生三三生千万太极生生之道一无不分之理虽天地不能拂此而过之而况於人乎虽然天地之理一本不能不万殊而万殊不能不一本也惟人则一者固可以万万者不能以一非惟不能一旦不知其初之一矣苏明允有言吾父之子今为吾兄数世之後不知何人此薄俗之通患也青阳之方以义聚而居者数世国初尝旌其门此诚义族也後三百年其远孙时发以县志所载者来宛见国初气象使人感慨也予观东京之樊三世共财北魏之杨总服同爨唐崔郾之三世张公艺之九世皆有太古风然昔之同者终不能以不异何也物不可以终聚理与势然也释老之庐聚数衆历数百年而不弊者又未尝不可以终聚何也彼无生生之道也若生生者衆则情伪日多衣食不给则聚者不可以日久也然则人生而羣分殊者终不可一欤曰可有大宗之法

跋洪智堂地理心机

谚云一世识阴阳三世翁无墟墓场此为不识阴阳之理者发欲识其理则程子五患之外莫非佳山水也洪石庵与乃翁复庵自言高於阴阳之学然皆为己而不为人世兆域皆其自卜世之言阴阳者不足以眩之其所卜皆不出数里之外非如他人之自浅其山水必求於他邦数百里外者今其家福祿昌炽本支盛大又有非他人所可及此可谓真知阴阳之理者矣其从子曰应东图其先莹之山川形势及其家世福泽之奇名之曰地理心机又将推己之学以及他人其用心亦仁矣哉阴阳之术予虽未达而其理则固深知之近毛伯玉来予赠以诗曰当面有山人不识却於山外更求山族人有卜葬於住山之麓者予赠以诗亦曰风水不从天上落元来只是屋檐头此可与知理者道吾子若计予之说推行之则可谓识阴阳之理者

曾杨当在下风

书凤山吕首之玉京胜槩图後

凤山吕首之以吟咏作玉京胜槩图二十首读之皆有奇思有微意使人坐万山中如覩京城之巨丽也首之云如今生不遇後來当有杨子云予谓知我者希则我贵矣何必子云

题薛上舍集

孟軻氏发性善一语反以激荀杨韩子之争端周茂叔说无极而太极亦以啓陆子静之排诋立言之难如此乎薛君某过予袖示一编五言七言长短句皆有可观首卷曰性理论也河洛辨也中庸大学论也井田议也噫是数者皆当世大儒所难言者君乃脱口如泻瀉瀉似不见其所谓难者何欤軻远矣请试以问茂叔

题梅骚後

宽闲之野寂寞之滨不以无人而不芳此谨独者之事也穷嵯暝雪疎篱晓霜毛皮剥落孤干独挺此特立独行者之事也梅乎梅乎其遯世无闷者乎非斯人也而友梅梅友我乎哉屈平一不见知则闷以死其悲愤自况徧及乎菊兰蕙茝而独不敢及梅平犹为知量者有客过予自号梅友出示一编曰梅骚且以不及梅为骚之欠不入骚为梅之耻将以补骚缺也噫嘻果如子之言则平不得为知量者矣

题方景说出家疏簿

东坡翁问佛印曰鑊汤狱图中何独不画和尚对曰人间怕阎罗阎罗怕和尚翁曰怕你则麼对曰若使阎罗自犯亦要和尚懺除此诗人所谓善戲謔兮不为虐兮者欤方景说来言鑊汤无冷处惟和尚快活愿舍身入龙华寺以为死中求活之道乞一转语以干宗族乡党之仁人君子噫嘻圣贤未尝许人从异端也但释氏得时其力足以活人吾儒安能禁之苟自度吾力不能活之则听其依释以自活亦可已有肯助缘便请下笔

题家状籍

举人书铺翁生持一籍来曰我将以此访丑科之省元状元且謁予序余戏之曰昔陈抟有双元集尝持以语人曰天下省元状元尽在予集中今子亦抟之术乎虽然抟之术数也天地之通塞人才之隐见有理焉君子不谓数也方今天下林泽空缺钺钝赤子如沟中瘠明诏蒐材正将以得经纶天下之大器岂徒询词艺云乎哉严之山峭水秀代不乏人子试以此求之虽未学陈抟之数而来科之省元状元当在子籍中矣

杂体

田父吟

清溪眇如斗大邑万山壁立土硗瘠百分地无一分田九十九分如剑脊一亩之地高复低节节级级如横梯亩心一畦可一亩边旁一亩分数畦大家有田仅百亩三二十亩十八九父母夫妻子妇孙一奴一婢成九口一口日噉米二升茗醯醢酱菜与薪共来日费二三斗尚有输官七八分小民有田不满十?方放兮有菜色曹胥乡首冬夏临催科差役星火急年年上熟犹皱眉一年不熟家家饥山中风土多食糜两儿止肯育一儿只缘人穷怕饿死可悲可吊又如此有司犹曰汝富民手执鞭敲目怒视今年淫雨天作难汹涌澎湃四五番浮尸敝屋坏江下迸山裂地如鲸奔半山都成水泽国平地皆作龙蛇窟水头晚退早复来屋角朝出夕又没岿然令丞簿尉衙下视四境无人家水平归家无屋住有屋住者无生涯农民抛家认亩陇担砂翻石肩皆肿百千一亩判晚秧一坵分作两坵种都来一亩无百千买秧已费半百钱眼前插种已剜肉头後丰歉犹在天晚田再种未可保早田无秧为出草皂衣旦暮来槌门今年苗税催得早打快织机趁头网作急粿米输苗仓更有一言牢记取断不许人言灾荒

猩猩歌

猎者围猩猩疑其以衆抗诿曰不取小惟取大与壮衆猩自相仇推挤送其长以次索二三不复推已往四五至于十无一得释放衆猩怒相目各悔受人诳及早同一心未必躯尽丧吁嗟兽不灵相仇无足嗔胡为豪杰羣不能自相亲秦人吞六国诸侯各附秦并力取其一冀不及他人智者欲合从徒自腐舌唇安得先震邻然後于其身彼先噬其一其次祸亦均早知秦用术六国同一心

鸡雏吟

我闻先儒云鸡雏可观仁须臾不舍母是即孝弟根不待教而知不待习而成於斯为良知於斯为良能人从此充拓四海皆闵曾异哉鸡伏鷄出殼忘其恩子向水中去母从岸呼鸣子往母亦往子疎母愈亲鷹隼飞在天母亦与子惊或遇狸与牲爱鷄忘其身不顾力小大直与争死生天於微物上感人惻隐真人观鸡护鷄鍊石为动情子呱方卧冰安得卵覆人勿看鸡伏鷄吾则行吾仁

南康遇雪

夜来怪甚风太颠掀簸震撼不可眠门前鍊骑怒拔屋枕上猛虎飞吼天却是庐山夕作雪杨花未春先擘绵左蠡门前玉两柱江心落石鹭一拳五峯千仞削银壁重湖万顷开瑤田若使瑤田可以种虽遭赤地民不癯若使银壁可以铸当造白币权飞钱要知冬燠生意泄明年造化功斯全帝呼玄冥急收斂闭塞阳气胚丰年虽云不可耕与种桑麻谷粟兹开先

上梁文

由市入山初非避世读书筑室只为悦亲不妨驴背狂吟【贾浪仙事】更入蛟峯深处规模小小居处安安蛟峯主人天地外快活胸襟水云边自在人物科目人间之第一世犹能之家庭君子之乐三我惟有是虽尚论坡翁生子不能称颜鲁之诗虽求为元佑全人亦足养怡愉之志回寻深密小作住持左顾则龙卧半天界风雨清凉之境前瞻则虎眠双峡卧云烟紫翠之间门外皆山纵巉岩而气象不迫崖下可井虽淡泊而滋味自长挑野菜足以羹种村秫足以酿未逊李愿之谷庶几康节之窝修齐治平未说经纶天下事出处语默且须康济自家身龟策既从虹梁斯举东高岗千仞横长虹万壑千崖此为主旱天唤起作蛟龙西虎卧一山高复低山外日斜遮不断光芒照夜有青藜南举足出门天地寛葵向太阳心一片举头正午日当天北入到源流皆稼穡瓣香旦旦祝年丰此是书生真报国上河汉无云呈万象主人丘壑本来心月夜一层楼更上下归来同结渔樵社前村牧笛方放牛我亦推敲驰匹马伏愿上梁之後户庭清昼松栢长春晏起早眠学为混沌之太极身轻脚健余皆富贵之浮云凡我同盟共伸善颂

题家状簿

主试棘闱又是一番造化题名桂籍只消三日工夫然须家状甲发之人必得举子利市之簿惟尔多多而益辨诸公衮衮以先登前科鵬鸞之在秋凡七作者去岁蛟龙之得雨有五人焉至护巨鳞亦入吾网凡羣公由此选也舍吾子将安之乎各示芳衔列八赋十经之选亟乘盛会续百里三元之题

题卖试卷引

足踏黄槐好是一番大比手攀丹桂须要三轴雄文敢奉楮先生用供新贡士少年纸贵休夸贾谊才能今日价高正赖诸公斟酌愿挥兔管早缀鸿名

又

转眼三年又是一番造化妆功一日只消三轴文章纵夸黄绢好辞也用清江佳楮当効驱驰之力益加制造之功庶可探春蚕食叶之声得无助秋鸞横天之举请书姓字即占鴈塔之题行夺科名尽中龙头之选

蛟峯文集卷六

卷七

钦定四库全书

蛟峯文集卷七

宋 方逢辰 撰

讲义

子曰贤哉回也一簞食一瓢饮在陋巷人不堪其忧回也不改其乐贤哉回也

此一章以圣贤地位观之簞瓢陋巷乃吾儒本分固非甚高难行之事何为圣人独以许顔又何为反覆称其贤此当就人不堪其忧看只为衆人於此有所大不能堪者是以深嘉乐道之正欲学者於不能堪之中自寻乐处也处富贵未足以观人处贫贱乃可以观人处贫贱未足以观人处人情所大不能堪处始可以观人有天下不与何足以知舜居深山饭糗茹草而後知舜之为大去齐去鲁何足以知孔子厄於陈蔡弦歌自如而後知孔子之为圣此章以顔子对人言以忧对乐言各有所指人之本心天理具足各自有一个至尊至贵的物事举天下之物无以尚之岂不大可乐者岂特顔子有是哉人唯不见所乐是以得志乎富贵则极声色之奉穷四体之欲一遇贫贱则戚戚无聊只簞瓢陋巷便有甚不能堪者唯顔子工夫精到能忍天下不能忍之穷虽处屡空恬然不以为意盖其胸中自有大可乐者天地间更有何物可以易其乐哉人见其陋巷彼不自知其陋巷人见其簞瓢彼不自知其簞瓢此无他人见物而不见道顔子见道而不见物也夫子始称之曰贤哉回也终之又曰贤哉回也非誉顔子也有所不足於天下之人也称道顔子之旨愈深鞭辟学者之意愈切夫子之待学者可谓厚矣望学者可谓深矣惟皇上帝降衷於下民人人与之以惻隐羞恶辞让是非之心此圣贤之鎡基也今人有百金之鎡基者惴惴栗栗日夜护持惟恐为人夺之而贫而天所与我之鎡基倍於百金者万万乃反弃之如敝屣而不知惜诚能拨转头移其兢兢护持於彼者以兢兢护持於此祇见其有人所不知已所独知之妙而不见其有为人夺而贫之忧也昔程子从濂溪先生游每令寻仲尼顔子乐处所乐何事呜呼必有事焉必有下手处周子引而不发盖欲学者深思而自得之吾侪共处斯堂所乐何事盍相与心体而身践之顔何人哉顔何人哉

子夏曰日知其所亡月无忘其所能可谓好学也已

子夏圣人之徒也子夏之学圣人之学也圣人之学何学也入乎耳存乎心修於身行於事明五常之理尽五伦之道也顔子之博文约礼曾子之致知诚意子思之明善诚身孟子之尽心养性皆是也夫人之生以天地储精以五行锺秀无极之真二五之精合而为方寸之灵聚而为百骸之形所以备万物而参三才者其原有自来而其本已素立矣然才禀於气而性原於理穷古今亘宇宙寓於流行而不易者理也往来荡摩杂揉交错而无一定之体者气也气惟无一定之体故以流行於两间者验之光风丽日之景恒少风雨晦冥之变恒多则人生而随

遇者至清极淳之气不易得而偏倚浊驳之分不能齐固其所也惟圣人之生也得其秀之秀故气清而义理无不明质淳而邪秽不能入由圣人以下虽大贤之资一有纖毫之累亦必资学问之力以修治之自帝尧有匡直辅翼之言大舜有直寬刚简之命其转移变化之功已见於当时矣然学之道至三代而益明其见於书则曰学於古训曰惟学逊志曰终始典於学曰学古入官曰不学牆面见於诗则曰学有缉熙於光明隆古圣王未有不以学为要务者也吾夫子生於衰周不得位以行其道而天命在躬夙夜只畏闵当世之人去尧舜禹汤文武之世远而不闻大道之要当杨朱墨翟异端之说行而不免他岐之惑乃以身任大教继往圣而开来学推明大学之道昭示明德之方使人人皆得以消磨其物欲变化其气质而为圣贤君子之归何其幸也夫以常人之资而欲为圣贤之事耳目口鼻之蠢然声色臭味之交接愚者欲明而懦者欲立顽者欲廉而薄者欲敦以一心而明五常之理以一身而全五伦之事天下之义理无穷而工夫有限代间之人生有期而白日不再苟非勉焉孳孳克勤无怠则查滓未融而邪秽已入已之所学其能迄用有成也几希矣此夫子所以拳拳於学有时习之诲而又曰学如不及犹恐失之者此也圣门之徒三千夫子独称顏子为好学盖以顏子明心力行克己复礼所学者得圣人之道也学之得其道而又能竭其才夫子所以既许其不惰而又惜其未见其止也顏子终能至於去圣人一间者岂繆悠之功所能及哉子夏之在圣门笃实之功亚於曾子而身居文学之科其所谓学者皆人伦日用之道诚笃切实之功也其垂训以勉人曰日知其所亡月无忘其所能可谓好学也已矣夫为学之道内明五常之理外尽五伦之事变气质於有生之初絶物欲於有知之後必资师友之讲明方册之诵习然後能开其心术见於躬行然其殫日夜之力严理欲之辩使朝有所询夕有所考昼有所作夜有所思则志於缉熙功无间断人心之罅隙不开本体之虚灵不昧矣其或玩物弛心废时乱日於学问思辩不能致耳目手足无所加至於时弛岁去老死无闻岂不重可惜也为学之道若陟遐必自迓若升高必自卑故当自强不息勉勉循循为山未成而加一簣之土掘井未已而见九仞之泉温故而知新崇礼而广业向之得於讲明而见於诵习者既有默契於心知而行之拳拳奉持服膺弗失此古之人所以一饭不违跬步必思盘器有铭几席有戒参倚之有见顾諟之弗忘所以固守其德也其或执之不固守之弗专或存或亡乍得乍失则一暴十寒而生意弗存半途而画而前功尽废义理之性既无学问之推充血肉之躯不胜外诱之纷扰则杯水不救於车薪五谷不踰於萑稗虽具人之形当士之名饮食男女无以异於衆人存心制行不能远於禽兽中心冥冥醉生梦死岂不重可哀也子夏之训盖深勉夫有志於学者必当日新其功有以自考一日之间自旦至暮我於义理未知未能则深以为耻一月之间自朔至晦我之学问已知已能则固守而弗失夫如是故日引而月长日就而月将自有学之初以至於一息尚存勉焉以尽其力惕焉以殫厥心其得不谓之好学之人乎子夏之所以居文学之科者此道也故言此以示人欲人人皆然而底於道也学者观此岂可荒嬉而不知所以自勉耶某负戴经籍而来山中诸友不以某为不肖而屑与某交修游息尝不自揣而述所闻於先师者告诸友矣今观气化之流行寒暑之迭兴以春而夏夏而秋秋而冬矣窃以诸友之日有所亡而月未有所能为忧也良月初吉冬序伊始故述子夏之训以相告语冀诸友思齐於圣人之徒而景行於圣人之徒也非徒守方册以为勤夸诵说以为能而已当以明物察伦治心修身为要务在乎为人子者必尽孝於其亲为人弟者必尽悌於其兄为卑幼者必尽敬於其长手足动静必知天理之所存耳目口鼻毋为人欲之所汨以消融其查滓以荡涤其邪秽子夏之所谓学也深致其力复考其成使进修之效日异而月不同此子夏之所谓好学也苟为不然徒事口耳虚

费岁月尧言孔诵而不知求圣贤之心禹行舜趋而不免为禽兽之行若是则非徒尔父兄之所忧抑亦吾师友之所羞秦穆公有言曰我心之忧日月逾迈若弗云来此某之所以区区告勉学者当痛心刻骨而致力於学也

齐景公问政於孔子孔子对曰君君臣臣父父子子公曰善哉信如君不君臣不臣父不父子不子虽有粟吾得而食诸

夫彝伦者人道之大纲政事之根本也第彝伦之在人内而至尊者无出乎父子外而至大者无出乎君臣苟在家父焉而能尽父之慈子焉而能尽子之孝则必有以正伦理笃恩义小大咸得其宜而家道齐矣在国君焉而能尽君之道臣焉而能尽臣之忠则必有以正朝廷平庶务上下咸得其所而国体治矣然则为政之本又岂有出於君臣父子之外者哉是时齐之景公内多嬖媵太子不立而父子之道睽外则陈氏厚施擅用国政而君臣之分乱故圣人因景公之问政而以君臣父子之说告之可谓至要切矣景公亦深有感於斯故以善哉之言赞之又从而叹之曰果使君而不君臣而不臣父而不父子而不子上下之序紊纲维之义隳而法令不行祸乱寻起矣虽有谷粟之多尚安得而食之哉此必然之理也其後卒不免於篡弑之祸盖由景公知善其言而不能自振故也间尝论之国土至广也人民至衆也苟欲使之安如泰山固如磐石非上下之分定不可也不然一日之间其或君不能君臣不能臣父不能父子不能子则家不可为家国不可为国而生民之命有不可得而保者矣论至此而後知吾儒之道大而真有以扶植天命维持世教而为生民休戚之所系者正在於君臣父子秩然有序而不乱也若易之六十四卦而以乾坤为之首春秋之大一统而以王正月为之先其他如诗书之劝戒礼乐之防范无非欲详夫君臣父子彝伦之道而已无他事也然则为政者不此之务而规规於事为之末而欲致国家於平治者无此理也读此章者所当知

子贡曰夫子之言性与天道不可得而闻也【公冶长】子罕言利与命与仁【子罕】孟子曰恻隐之心仁之端也羞恶之心义之端也辞让之心礼之端也是非之心智之端也【公孙丑】孟子道性善言必称尧舜【滕文公】孟子曰尽其心者知其性也知其性则知天矣【尽心】

孔子教人未尝不言命与仁未尝不言性与天道鲁论二十篇何莫非是理而何隐乎尔也门人以为罕言以为不可得闻何也盖孔子之教人只在日用处凡所言仁皆是为仁之方不是正言仁之体所言性命天道皆尽性至命事天之事未尝推极性命天道之原也孔子不言心性而孟子开口便说性善说尽心知性存心养性孔子只说一个仁孟子乃说出仁义礼智四端孔子一部论语尽是教人就起居饮食应事接物上做工夫孟子七篇直教人就心上存养孔孟之教人岂有两心二道时不同也先儒曰春秋犹论是非战国纯论利害春秋之时文武之泽未斩义理之在人心者无恙故列国君卿大夫之自谋及辞命往来与隣国之可否者惟论理之是非不论势之强弱战国时先王之道影灭迹絶通天下不知义理为何物列国君臣与纵横之士谋其国者唯利害而已不识天下人心有是非枉直也以此观之则春秋时人心未亡战国时人心亡矣孔子时人心未亡愚夫愚妇皆可与知可与行故教人以忠信而已入孝出悌而已先行後言而已仲弓问仁则曰出门如见大宾使民如承大祭己所不欲勿施於

人而已樊迟问仁则曰居处恭执事敬与人忠而已至於夫子平日所身教者亦不过闾閻侃侃声色容气之间踳踳愉愉进退揖让之际凡形迹之粗事物之末皆帝衷之流行天则之呈露故夫子曰吾无行而不与二三子者吾无隐乎尔也孟子之时人心已亡举国皆病狂惑门人高弟尚未能笃信其师说谓舜不能怨慕者有之议周公不仁不智者有之疑孔子主痛疽瘠环者有之以管仲晏子为名世以公孙衍张仪为大丈夫夫人之良心陷溺如此非湔肠涤胃破骨洗髓不足以疗之故孟子不得不直从其本心下手也譬人有不识五臟而不信医者医为之剖其腹而指示之曰某为心某为肺某为肠某为胃然後病者方自信孟子无奈战国人不识四端何直从其軀殼之内标出而示之曰此天赋於尔者谓之命此尔受於天者谓之性此包性命管摄乎衆理者谓之心如此为仁如此为义如此为礼如此为智使人人自见得自信得然後吾之教可入而天理不亡孟子之唤醒人心其苦切有如此者虽然孟子岂徒教人以体察而已哉其操存其涵养其扩充七篇之书反覆言之详矣又体验以後之实践工夫也孟子之救人心苦切如此端的如此其工夫详密又如此後世异端之家乃有窃此以为识心见性之把柄者此不足辨也近世学者亦有得体验之绪余而强为执持者究其归亦同於异端之病而已矣今之学者读孟子必当涵养於未发之先以立其本体验於将发之际以审其几又操存之以定其所守扩充之以极其所止天所赋命尽在日用之间吾所受性皆为躬行之实以此读孟子然後不负孟子苦切之心

景春曰公孙衍张仪岂不诚大丈夫哉一怒而诸侯惧安居而天下熄孟子曰是焉得为大丈夫乎子未学礼乎丈夫之冠也父命之女子之嫁也母命之往送之门戒之曰往之汝家必敬必戒无违夫子以顺为正者妾妇之道也居天下之广居立天下之正位行天下之大道得志与民由之不得志独行其道富贵不能淫贫贱不能移威武不能屈此之谓大丈夫

昔者战国之世七雄争长仁义之路荆棘先王之教不明一时才智之士林立辈出不免利禄之趋功名之务而已又安知圣贤之学正己正人之道哉此景春所以有公孙衍张仪之问也盖公孙衍张仪之为人专以权谋之术游说於列国纵横之法连结於诸侯得志横行气焰可畏当时之人尊仰敬畏之不暇遂以大丈夫许之且言一怒则诸侯为之恐惧盖能使相攻伐也安居则天下为之休息盖能使相安於无事也何则盖七国之君一切以富国强兵为务其心已陷溺於利欲闻利则喜闻害则惧故皆为其所愚惑苟有丈夫之气以道义为主者又安能惑之哉故孟子叱之以是焉得为大丈夫乎但子未学礼故耳古者男子二十而冠三加三祝父必命之女子之嫁也施衿结帨母必命之及女子之往也送之门而戒之曰汝往至夫家必敬之戒之敬恭听宗尔父母之言而不可违也夫以顺从为正者乃妾妇之道今二子惟知以阿谀苟容窃取权势以侥幸於一时岂非妾妇之道又乌得为大丈夫哉果能居仁由义以礼自度养其大者不为小者之所夺则能超出於一时而不屈於万物是乃大丈夫也盖广居者仁也仁者之心广大寬平以四海为一家中国为一身故曰天下之广居居乎此则举天下卑污之私皆不足以动之矣正位者礼也礼则尊卑大小进退出处皆有一定之节故曰天下之正位立乎此则举天下不正之事皆不足以干之矣大道者义也义则事物之所宜乃天下人物之所共由者故曰天下之大道行乎此则举天下邪媚之行皆不足以趋之矣若然则得志以行道则可以使民共由之而皆归於仁寿之域不得志独行於身则使此身常立乎正大高明之地矣虽多财而富有位而贵亦不能淫荡其心矣虽无财而贫无位而贱亦不能移易

其节矣虽威势武勇之可畏亦不能挫辱其志矣何则其所居者广所立者正所由者大故也则视彼区区以利害之说愚惑庸常之君以窃取苟容於一时者诚不足道又乌可以大丈夫言之哉呜呼正学不明人心陷溺遂使智能有用之士如瞽者之无所见聋者之无所闻甘心浸淫为妾妇苟贱之行而不自知虽孟子树立如此之卓卓辩论如此之昭昭而卒无一人能自拔卒无一人能委而用之致使七国之君相胥於灭亡海内之民相胥於涂炭而後已岂天未厌乱而致然也欤抑邪说横流而不可遏之也欤是未可知也後之欲为大丈夫而为国家者岂不可戒而可观也哉孟子曰故凡同类者举相似也何独至於人而疑之圣人与我同类者又曰口之於味也有同耆焉耳之於声也有同听焉目之於色也有同美焉至於心独无所同然乎心之所同然者何也谓理也义也圣人先得我心之所同然耳【告子上】

此一章可以见孟子之救天下者直从人心上做起心之虚灵知觉一而已矣岂有二哉以饥食渴饮之情言则谓之心以天命之性言则谓之道心饥食渴饮之情虽圣人无以异於衆人天命之性虽凡民亦与圣人同尔春秋已降传心之学不明天下之人桎於形体之私而昧乎性命之正但知耳目口体之欲与人同至於本心之当然不可易者乃与人异孟子痛之哀之谆谆然告之曰凡我同类者举相似也何独至於人而疑之又曰圣人与我同类者盖谓夫知觉运动凡物之类莫不相似而况人乎虽圣人亦人耳今夫耳目口鼻四肢之所欲一有不得则陨护不能堪至於惻隐羞恶辞让是非之天则乃吾所自有者则逊之他人曰此圣贤事也又否则曰非不说子之道力不足也是以孟子又惕然警之曰口之於味也有同耆焉耳之於声也有同听焉目之於色也有同美焉至於心独无所同然乎盖以饥食渴饮举天下人人所同而方寸之微乃独不然此孟子至痛至切之辞犹惧夫人未之觉也又提起此心曰心之所同然者何物也理也义也理以体言义以用言圣人之所以为圣人者存此而已尧舜禹之授受以传之者此也汤武之吊伐以救之者此也吾夫子之作六经以抗起者此也唐虞三代洙泗之圣人所以出类拔萃为万世立极者岂有异於人哉特先知先觉乎此而已矣故曰圣人先得我心之所同然耳夫世教不明人心不同久矣孟子必欲强其所异而归之同自常人观之何自苦若是然孟子之心天下之心也盖其心元自有不得不同者夫所欲有甚於生者所恶有甚於死者非独孟子有是心人皆有之今天下坏证急在人心吾侪登斯堂也闭户造车出门合辙同此心也同此道也羣居讲习又何为哉乃所愿则学孔子

孟子曰仁也者人也合而言之道也又曰仁人心也

先儒论仁至矣尽矣其最善名状者无如谢上蔡指草木之核种之即生道以为仁其中一包皆生理也虽然特借草木之核而言耳人之核安在曰心天地之核安在曰人夫生生不息者天地之心也然其心不能以直遂必以托诸人人得天地之气以为形得天地之理以为性故万物皆备於我而天地之所以生生者实寄吾性分之内天高地下一日无人则天地特块然者耳故孟子曰仁也者人也夫二物相配之谓合仁以性言人以形言仁固所以为人之理人又所以载是理而行之者也离形言性则理何所托以自见故又曰合而言之道也然而人之所以为人者岂以躯殼为哉天地以生物为心而人又得天地之心以为心者也天地以此心寄诸人岂徒然哉厥初赋与许多道理皆要从人心上抽迸出来如草木勾萌自有勃然不可遏者方其未形冲漠无朕一与物接触之则生触着他义则善善恶恶便有廉耻羞恶之心作

触着他礼则尊尊贵贵便有辞逊揖让之心起触着他智则辨黑白别香臭便有是非之心迸裂而出上蔡曰活者为仁死者为不仁人心不仁则天地死矣故孟子又曰仁人心也七篇之书自首至尾切切然以人心陷溺为忧凡教人求教人收教人存教人养勤勤恳恳至痛至切一情之动则曰心之端一思之起则曰心之官见於面则曰根於心害於事则曰生於心物有长短轻重则曰心为甚千言万语不及其他直是指人之识痛痒有知觉处以示之虽非便以知觉痛痒为仁然欲其切已省察而救活其本心也不然死灰而已槁木而已顽然铁石而已此之谓不仁列御寇庄周之徒正坐此病今天下人心陷溺甚矣急起而救之责在学校心学工夫自我辈始羣居相与所学何事端居静念我之生也所以赋形宇宙而灵於物者岂空殼哉即天所与我之虚灵不昧至光至明底物事求之收之存之养之体於躬行日用之间着於食息动作之际则夫生生不息者不在天地而在于我矣故曰人者天地之心

乾称父坤称母予兹藐焉乃混然中处故天地之塞吾其体天地之帅吾其性民吾同胞物吾与也

西铭之作张子盖为人局於形体之私自小其身不知身与天地对立而不能尽人道之大也天高地下人位乎中天大地大人居其一故曰予兹藐焉乃混然中处乃者张子惕然自警之辞谓我以眇然七尺之躯乃得与天地对立者岂徒然哉天地之塞吾其体天地之帅吾其性此二句乃人所以得与天地对立者也塞者天地之气也帅者天地之理也以充实言谓之塞以主宰言谓之帅其体者以身体而实践之也其性者以身体而实有之也二句之上加一故字故者承上而有所用力之辞乾阳坤阴此天地之气充塞乎两间而人所得以为体者也然得其体必当有以体其体不体其体则人与物何以别体者一身躯殼无非造化日月之往来山岳之镇峙江河之流转寒暑之代谢一人之身天地之所为者备故曰天地之塞吾其体一阴一阳之谓道阴阳非道也所以一阴一阳者道也此即天地之主宰也所谓天地之帅也天地以阴阳五行化生万物莫不命之以是理人所得以为性者也得其性必当有以性其性不性其性则人与物何以异格物致知所以明此理诚意正心所以体此理此性其性之条目也操存之涵养之体察之此性其性之工程也如是则所以主宰者不在天地而在于我矣故曰天地之帅吾其性然而我有此体此性人亦有此体此性物亦有此体此性特人全物偏故有胞与之分同胞者受气禀理全无间隔吾与者亦我之侪辈也民饥已饥民溺已溺所以行吾同胞之事也昆虫草木鸟兽鱼鳖莫不使若其性所以行物吾与之事也故吾儒之道必至於此而後为全体大用必尽乎此而後眇然之躯殼始可与天地对立矣西铭一篇纲领在此由此而後皆其体其性之节目父母宗子以下指圣贤在上者言于时保之以下指圣贤在下者言读西铭者以此体察而践行之则各有下手处矣吾儒素其位而行在上之事固有任其责者在下之事我辈之所得为而不为则天地生我何如哉今田野之间骨肉反眼闻里作仇朋友弯弓主奴易位彼安知所谓理一分殊名为儒者不思所以植立抗起之则风靡澜倒其势必至於胥为禽兽而已矣凡我同志盍相与努力於斯

周礼乡大夫之职受教法於司徒退而颁之於乡吏使各以教其所治以考其德行察其道艺以岁时登其夫家之衆寡【夫家男女也】辨其可任者【任者谓给繇役也】国中自七尺以及六十【七尺谓氓二十岁以上】野自六尺以及六十有五【六尺谓氓十五岁以上】

皆征之【征谓繇役】其舍者国中贵者【谓爵尊者】贤者【谓有德者】能者【谓有才者】服公事者【谓士大夫居官者】老者【谓年尊者】疾者【谓废疾者】皆舍【舍先儒谓复除其繇役也】

乡大夫者司徒之属掌教之官也考德行察道艺宾贤能其本职也然於征役琐细之事亦与焉何也盖所以辩贵贱优贤能行弛舍也以岁时登其夫家之衆寡辩其可任者所以考察其民之可役与否也国中之民自年二十以及六十野之民自年十五以及六十有五皆征之此成周繇役之法也国之民年二十则役之六十则免野之民年十五则役六十有五则免国中晚征而早舍以地近则役多也野中早征而晚舍以地远则役少也其舍者有六贵者贤者能者服公事者老者疾者皆舍此成周免役之法也贵者不役以其爵尊也贤者不役以其有道有德行也能者不役以其有才艺也服公事者不役以其居官有职事也老者不役以其无筋力也疾者不役以其不任奔走也此六者皆复除其繇役载在周官所以示万世昭昭也後世王道不明凡贵者有公事者与老者疾者皆免而独贤者能者未得复除而与编氓皂隶同受役於府史胥徒之下冠履倒置莫斯为极古者公卿大夫士与庶人各有定分而不相踰越公卿大夫行先王之道以治於朝士明先王之道以教於乡庶人服庶人之事以役於野凡学先王之道者谓之士为小人之事者谓之庶人三代之时士庶人家各百亩不以贫富为差而以贤不肖为别世教不修士庶人之分不明为有司者乃欲使士与庶人并役是不察周官之法不知士庶人之各有定分也庶人之役役其力耳吾儒则经天纬地为天下正君臣定父子别夫妇序长幼其为役也大矣今自国及野仆役於主子听於父妻不敢二其夫幼不得凌其长非儒之教其谁之功也且有天下者必有所尊而後足以成天下之尊自古为人主者必折节以下天下之士非尊其人也尊其道也天地设位道行乎其中纲常礼义自儒者出一日无此道则强凌弱衆暴寡智鬪智力角力天地间乃一凌犯角夺之区而已矣然则君天下者乃所以自成其尊也王制曰命鄉论秀升之司徒曰选士升於司徒者不征於乡不征者先儒谓复除其繇役若此则不独周官之法通三代之制然矣乃者上台有请以三代之法推而行之江南此尊儒道将以立人极也夫愚请发明王制以晓未识三代之法者

策

问天文变异及中国夷狄君子小人德刑公私之异

主意 君子纯乎阳明之德则以阳召阳而星宿清润君子袭夫阴柔之为则以阴召阴而彗孛垂妖其端芒兆於君子之身其证应着於天地之表今日星文示异所以不责小人而责君子也

考官批【机轴出於胸中华采流於笔下答题不徇题用事皆实事作此者必老手也】

对尝观阴阳清浊之气流布於宇宙间在天为祲祥为祲眚在人为中国夷狄为君子小人为德刑公私数者同一阴阳也虽然天下之阳类衆矣而君子者衆阳之主天下之阴类羣矣而小人者羣阴之宗然则今日星文之异其小人为之欤抑君子为之欤世固以是责小人矣愚

独不责小人而责君子也何者向者共驩居朝五辰未抚犹可诿也今臯夔进矣将谁诿乎昔者管蔡在列保章星动犹可辞也今旦爽归矣将何辞乎曩者季氏专朝星陨之妖犹曰宜也今宣尼相矣岂复宜有此乎是则君子有不容不任其责者苟能纯乎阳明之德则於国为覆盂於仁为雨露於公道为权衡其应在天则析木天街星宿清润阴不得胜乎阳矣为君子者不免袭阴柔之为则於国为蛇豕於仁为荆棘於公道为蹊隧其应在天则孛飞彗流垂妖吐异阳亦不能以胜乎阴矣是故历象苍珠玑衡珠璧非天数之偶符也唐虞治古俊德者纯乎俊德以阳召阳之应如雨之妖守心之象非天数之适变也春秋世降正人不能纯乎正人以阴召阴之证也迨我国朝天圣之流星庆历之太白诚可畏矣惟杜富韩范欧余王蔡诸君子如景星凤凰故在天之阴不能以胜在人之阳崇宁之彗大观之孛未必不可销也惟奸党有碑邪等有籍诸君子不能自白故在人之阳亦不能以胜在天之阴信乎宇宙之相通一气耳其端芒兆於君子之身其证应着於天地之表此犹黄鍾一动则根荄芽甲之下皆春夜气一交则么微怪乱之证错出机缄影响气类埤簏断断乎其不爽也恭惟皇上寅畏事天固宜衆阳鼎盛羣阴睨消而乃者正阳之月譴示星文证不虚生何缘而起岂中国之阳未盛与昔权奸挟敌以固君父之宠三边清野不问也於斯时而天变见焉是可曰夷狄之阴召之也更化以来敌人相噬困于蒺藜泗上凯旋伏戎于莽晋彗出室胡可移过於遵鉴相屠之时岁星犯月胡可逊咎於柔然将破之日是则诿之夷狄不可也否则吾仁之阳未畅与昔权奸以赃吏为公门之桃李永州之蛇不问也於斯时而天象警焉是可曰刑罚之阴感之也更化以来谨刑有铭江河疏濶戒杀有诏雨露涵濡长星竟天非元朔渗漉之朝所宜有孛宿历氏非贞观既效之日所宜闻是则诿之刑法不可也又否则公道之阳未盛欤昔权奸以多诈逢君君娥之啓宠不问也关子之交通不问也斯时而天戒示之犹可曰私情之阴召之也今邪径既窒天日开明幸门莫通云雾轩豁偏党俱无矣胡为箕毕未协乎刑赏平明矣胡为陨星告变乎是又不然矣然则星文之变胡为而如此乎无已则君子之阳未纯也夫传说骑箕萧何应昂君子未尝不应於天象摄提之位列卿鈎铃之司出纳天象未尝不应於君子故君臣和则三台齐君子多则东壁着贤人进则少微绚彩其感召如响之答也今天象昭昭一则曰小人之阴为之二则曰小人之阴为之不知中台星折可独诿之张华乎太白袭月可专责之曹爽乎诸君子盍曰明白洞达者阳也吾未能无覆护揜匿果非阴乎慷慨奋发者阳也吾未能无依阿湏臾果非阴乎断制者阳也今或似味道之模棱任事者阳也今或类石建之逊避譬如奕棋局面虽改而其间一二着数未免犹似前日之所为可谓纯於阳明乎吾未能纯於阳则召阴盛之变者非私情也非刑法也非夷狄小人也我也夫如是则位郎星职卿月应功臣之宿符三台之象者莫不以阳明自厉必洞达明白必奋发慷慨必断制必任事则阳亨於复而阴剥穷矣阳长於泰而阴否消矣星变夫何虑虽然执事所问数条曰仁曰公亦不可废也此又在於人主之心乎人主之心事事皆仁则德性昭明与阳俱盛而至诚畅乎九垓人主之心一适非公则物欲昏炽而幽明隔於方寸昔绍兴三十六年太白犯前星高宗皇帝曰人君有过天则戒之及惧而改天则爱之次夜而观太白顺轨矣然则以心答天不当如高宗乎先儒曰阳明盛则德性用阴浊盛则物欲行愚请揭是为座右铭谨对

论

礼法之大分如何论

杨森批 立说得先儒议论行文有前辈气象

佳作也

论天下纲常之大当自人君立其大者基之夫礼莫大於分分莫大於君君不能自有其大则礼法荡矣生民之初人未知有君之尊也先王忧焉为之辨上下别等杀而为截然之法法立而礼行礼行而君尊夫为君者盍曰吾之所以独尊於天下者仅有此分耳使吾一日失此则不能自有其大君失其大则礼法能独存乎世降叔末此分不明久矣不知先王所以为是礼法者正为君尊地也吾处其大可不思有以守其大乎【云云】礼法之分安在乎曰君臣也父子也兄弟也皆分也求其分之大者则同室之分莫大於父同与之分莫大於兄虽然又有大者焉统乎人伦之上而居分之至尊者非君欤夫以四海之广兆民之衆受制於一人虽有絶伦之力高世之智莫不奔走而服役者岂非分之至大哉虽然处天下之大必有以守其大是故秩於天庸於舜谨於文武成王周公自朝廷宗庙达之於州闾乡党自闺门衽席而至於天下国家者所以立其大也昔仲叔于奚有功於卫辞邑而请繁缨孔子以为名者君之所司季氏在鲁擅颡臾之伐孔子以为天下有道礼乐自天子出诚以名与礼乐天下大分也而君不能司之天子不能自出之则失其所谓大矣一失其大则天下无复纲纪礼法其不坠於地者几希矣乾尊坤卑礼之始也圣人法焉制为长幼之节疏戚之差若足矣未也又从而为之法焉车服有制宫室有度此法也小大有经尊卑有纪此法也总而为吉凶军宾嘉散而为三千三百之仪者皆是法焉若足矣亦未也士庶人之上为之置卿大夫卿大夫之上为之置侯伯焉侯伯之上为之置三公焉等级而上至於天子其分极矣为天子者盍曰先王制礼所以为是差次焉者正以成吾之尊也吾处至尊之分而不能自有其尊得乎士大夫分职自我分之可也如晋之六卿鲁之三家则分陵矣诸侯建国分土而守自我建之可也如韩魏以请命而侯则分僭矣三公分命总方而议自我命之可也如界虢贰郑之事则又自坏其分矣分不克守则失其为君之大君失其大如礼法之陵荡何春秋皆此类也况荀卿之时乎卿也起视四顾无一可人意着书立言而有礼法大分之语卿之意深矣杨倞不足以知此以任人职分释之吁卿之意或者正为名分忧岂在区区分守乎虽然大分一语卿言是矣然载之王霸之篇君子不无遗论焉夫礼法之废正为五伯坏之耳卿方欲遏颓澜不能尊王抑霸顾以王霸并称而名篇不观笔削之经乎子拒父者罪之而父子之分明庶夺敌者贬之而兄弟之分明臣召君者讳之而君臣之分明然则春秋一书其礼法之大宗乎此见春秋者有周礼尽在鲁之叹而後儒亦曰春秋为一王法谨论

策题

问战胜攻取不如韩信此将所以贵乎武方叔元老克壮其猷此将所以贵乎旧诗书礼乐惟郤穀可此将所以贵乎儒霍去病之常天幸王钦若之禄未艾此将之所以贵乎福四者之中孰为善欤两军对垒使诈使贪将不武则败守西河使隣国不敢向非起不能筑长城使北胡不敢近非恬不能岂将当以武为上欤或者又曰韩彭英卢危则要安则背如养鹰鷂反费縻笼然欤否欤无已则改用儒欤鸣条之师伊尹主之东山之师周公将之岂将当以儒为上欤或者又曰陆机非不儒而不能免河桥之败房琯非不儒而不能救陈涛之奔儒而不真则反

败事然欤否欤无已则改用旧德欤必欲取荆非王翦不可必欲讨蚩马援尚堪一行新者之疎不如故者之练岂将当以旧为上欤或者又曰田单之攻燕则下攻狄则不下前日身操版锬则有死之心无生之气今日黄金横带则有生之乐无死之心此鲁仲连所以逆料其不胜如此则将之旧者岂又不可用欤武帅之敢於鬪则惧其难驭文帅易於制则惧其罔功旧帅熟於兵则又惧其已骄舍是三者之外无已则择一福帅用之可欤福星临吴则风燎可以走曹瞒而不必周瑜王气在晋则草木可以蹙符坚而不必谢安然欤否欤乃者荆湖易帅以骁将摄之岂非以武帅缓急可鬪欤未几改命资帅又岂以文帅易驾驭欤潭湘分命起督帅镇之又岂以旧帅久熟备御欤或谓荆阨不如就畀摄帅或谓不如移畀督帅孰为便欤然三帅之中当谁畀欤虽然朝命已授钺矣今之谋帅固不敢仰视伊尹周公若周谢之事亦可凭籍福星王气之所在而收风燎草木之奇功否欤忧国者固望之幸之诸君试借一着

问祭之重其享神也莫重乎牲其求神也莫重乎乐与灌郊用犊尚纯慤也明堂我将我享维羊维牛说者谓明堂不以犊而以牢盖牛羊豕备曰牢明堂不以犊将不纯於慤欤帝牛不吉以为稷牛【祀后稷者】说者谓卜为帝牲不吉则以为配祖之牲然则祭祖以不吉之牲固无歉欤帝牛系於滌舄之三月稷牛维具说者谓稷牛惟临时取备然则祭祖不【阙】恭为疑欤商人尚声先作乐而後迎牲周人尚臭先灌而後迎牲二者求神孰近欤乐所以求诸阳灌所以求诸阴魂气归於天魄气归於地当合阴阳求之今各尚其一何欤礼曰乐之号所以告诏天地之间说者谓用乐之音呼号告於天地庶乎神闻之而来然则果能必其来格欤否欤又曰灌用鬯臭阴达於渊泉说者谓用郁鬯灌地则臭气达於渊泉然则一瓚之鬯果足以裂地而直达欤周礼曰乐七变则天神降八变则地只出九变则人鬼格然则天神地只人鬼必将俟七八九变而後至欤周礼曰以献裸享先王则享人鬼皆当灌也然宗庙用灌而明堂配祖不用灌又何欤岂祖宗在天不当求之阴欤所谓贵纯贵声贵臭三者之义可得闻欤子入太庙每事问况三载明禋於此有未达敢从诸君质之

问中庸曰国家将兴必有祲祥不然必有妖孽见乎蓍龟动乎四体然则中庸之所谓妖尚隐於微者欤然遽曰见动何欤乃者蜀阆走驿以嘉叙地震雹击水怒山裂上闻京城盛夏而大风拔木发屋此非天妖欤所以召此者何失销此者何修欤或曰天作孽犹可逭然欤否欤豸冠执白简击二竖子此非人妖欤然膏之上肱之下鍼之不达药之不及将何道而可欤彼且操戈以逐台臣是可忍孰不可忍欤豸所以触邪今反助邪以触豸岂以言者为妖欤继之者将言欤勿言欤缙绅中尝有移书庙堂者亦弗见听将弗能救欤於登崇俊良之中而首为掾竖逐直臣不为除目玷欤去天之妖不过修德至於人妖甘者如荠岂终无良剂欤过庭绪论可得闻欤恐眷题之窘不欲泛引故事答者将勿略

碑铭志

唐侍卫都指挥使王押衙太尉碑

圣人之制祭祀也法施於民则祀之以死勤事则祀之以劳定国则祀之能御大菑扞大患则祀之故厉山氏之後至今祀以为稷共工氏之子至今祀以为社此皆有功烈於民者青溪之

东去县七十里安乐乡之枫溪有唐侍卫都指挥王押衙庙其始父老信其灵异尸而祝之凡冠婚丧葬营缮莫不质其吉凶而後即事岁有水旱札瘥祷之立应淳熙八年删定陈公晔访其灵迹纪之县志越嘉定甲申戴侯师圣尹兹土以秋涸乞灵而雨以其灵迹闻於朝勅封灵惠庙忠顺英烈侯仍捐己俸增葺祠宇檄少府董役不月而成差戕屹峙庙貌一新迨淳佑辛亥神之裔家於东土岁奉宗祀者来请予纪其实鑱诸砥以诏不朽予按县志及索其旧碑所为文得其始末神生於唐大中元年神少负节槩涉书史慷慨沉毅膂力絶人长於弓马劒槊世迄僖昭政权旁落藩方尾大翹足伺衅者环天下皆是神独抱膝长吟自比诸葛乾符中裨将王郢倡乱两淞镇将董昌以戍兵单寡檄乡井兵未有应者神首举义旗与钱鏐协志应之郢既讨平逆巢之衅作拥衆长驱攻掠淞东饶信池宣歙等郡神复乘胜击贼合鏐兵誓死俱奋不介马驰之所向辄捷贼畏其锋遁自采石渡淮时高骈为诸道行营兵马都统闻贼不犯境壮之而奏於朝以神为都押衙鏐为都指挥使乾宁二年董昌据越叛朝命神偕鏐兵讨之未几昌就擒露布献捷以功迁侍卫亲马步军南北都指挥使而鏐加镇东军节度使是时宦竖骄横如田令孜韩全海等劫胁人主东西出其意神实愤之而谋适不用无如之何同列诸帅如李茂正朱全忠等无非挟强大冀非望之人神实耻之而大厦将倾非一木所能支举目山河终夜雪涕於是浩然有归志麾衆而东曰吾姑俟圣人出也居无何阙庭喋血而唐室丘墟五十年矣我太祖皇帝六龙御天海外有截是何神先见蓍龟也神所居即今之安乐乡环境十里皆迺峯矗壁大者龙跳小者虎卧下者崎岖迤邐浅露萦迂昂者层棱欽崑形峭状怪观乎此使人心胆雄伟志气踊跃其上榱桷杞梓幽幽阴阴蒙【阙】苍苔络紫蔓霞雾卷舒云月吞吐观乎此使人胸襟放旷起高蹈尘表之思地灵人杰固应不凡也然神犹以平陆千里大江辽絶民旅担簣酸股脱膝遂规度浚治为河湟以通舟楫千夫荷插万畝齐作功未毕而殒星告变今天乐观左遗迹如故观者至今恨之神讳克俭字子廉墓在昌期乡之柘源诸部曲所葬也神叔父长史昌胤仕唐昭宗神之兄副都指挥使克勤仕唐宦游宝婺因家焉神之侄承义仕後周太祖为廷尉延寿仕吴越钱氏为主簿诸诰牒尚存其後枝叶硕大且繁今居淳安者皆其裔也呜呼盛德必百世祀神有功於国有功於民有功於御菑扞患其世祀也宜哉遂为之铭曰皇路嶮巇谁扶谁持惟神骁勇东击西驰有严鉞钺所向辄捷蹶郢走巢翦昌定越外叛未清内奸已成何物阍竖纳兵阙庭天翻溟渤一篲莫窒明哲保身进退不失殒星於东乃显神功生封死庙呜呼英雄

行状

宋知郡寺丞俞公行状【并铭】

公旧讳忱一【上字本从言从成】後改公明字则明为君避也曾大父简大父谦咸隐德弗耀父点自号云岩居士赠奉议始祖稠仕吴越为睦刺史因家焉今为严之分阳公少穎书一覽辄记云岩公鍾爱之家自为师友研经史寒暑不释卷嘉定【某甲子】以周礼首乡荐明年上桥門又冠之自是气益雄文益进月书每先诸子鸣声誉郁天京矣公以重闥在上不忍去膝下归而私淑於家四方士负笈者云集凡膏润之所沾丐者莫不歆艳一世贡於乡升於学魁於南宫者踵相接其目睫可数者如潘君忠恕何君梦然兄弟是也十三年以监举试礼部未得志归而益肄业十六年升舍寻擢上第调昭武教官宝庆甲申龙飞循修职郎旋居云

岩公忧服阕以庆覃转文林郎再调和州教官两易南康兼白鹿书院山长公教人以践履为先择经明行修者列职事以倡每讲说必明界限析义利不专以文义优劣士用以劝当路如蒙斋袁公留耕王公着斋高公咸刻於朝端平甲午董文上饶同寮持卷请差次公曰三场惟策可观人遂拔其一及蛻号乃韩君叔颖士论帖然郡太守以撙节有美将献之朝公曰献美是逢君也不若以代民输而弛其赋守勉从之二年鹤山魏公视师江上闻公而罗之幕公条陈攻守急务历萃慷慨魏以远器目之嘉熙丁酉调浙东帅幕来赴间京城灾公攒眉时事移书时相规以省灾异量赈恤禁侈靡省营缮数事二年改调淮东总幕旋为有力者夺之公恬不较归而复聚徒於门未几文清李公当国如京谒选复移书陈时病五事曰审命令信赏罚择宰属久外任选将帅李嘉纳焉寻调临安盐仓弊蠹必梏出纳必尽情履斋吴公尹京一见曰管库岂所以况清流耶檄之幕淳佑辛丑被旨衡文别头如洪如叶所得皆知名士四月迁书库官二年迁宗谕改秩转宣教郎三年迁太学博士轮对反覆援文帝太宗事以讽上首肯之次劄言科举三事一曰考校拘执之弊二曰誊录卤莽之弊三曰弥封易换之弊四年再为别头考官前列如翁如汤皆公所拔也寻丐外添倅上饶会岁大旱公戚曰吾职劝农奈何视民饥而死也郤交承礼亟走羣望一夕忽雨郡境赖之积讼压累政不剖者山积皆为尽心一一当曲直民之讼於他司不直者争愿质於公咸曰乞送清强俞太博诸台交委讼牒雨集一经予夺无反覆者岁再饥公择大家劝赈首捐己俸以倡又借公帑为余本航他境米平其直以赈徐节他费补偿之道有遗孤捐己俸募人收之民赖全活者衆当路如後村刘公虚斋赵公实斋王公交荐之五年转奉议郎会徽及南康乏守朝廷闻公劄摄徽而当路又命摄南康公俱辞之越月以朝旨之徽居无何代者已压境公钥府库以俟供给礼例皆却弗受还任信又阙守复摄事六月朝命以宗正簿召八月造朝差衡文胄闾撤棘乃领事七年四月迁国子丞以磨勘转奉议郎寻考试殿庠得张君【孟博】岁旱副端张公小坡李公以言去国公以封事争之不报言者从而媒孽之遂有主管崇道观之命八年二月差知常德辞改知南康又辞不许十一年转朝奉郎南康促代忽除公大理丞方控辞未行言者已尼之盖柄国者欲夺公南康以畀嫫婬故神其操纵如此寻再与公郡公悟遂丐祠以老杜门絶客菽水之外惟以书史自娱同志或为怏怏公无闷焉宝佑癸丑元日上挂冠请越六日俄疾革夜半呼子弟握手叮咛不及他事惟曰吾负吾母不得终子职若能竭力事吾母汝父死不死矣言訖而逝盖二月之七日也享年六十有七娶秦氏封安人子一泽民见待省进士女一适何应孙孙一松寿公生山水邑人物清苦而坚孝友根於天性学问勉於躬行云岩公抱恙晨夕奉药衣不解带居丧尽礼哀毁骨立祖父母丧代终大事必尽礼外舅姑亡家窆丧弗克举厚助之皆有归里东孔道病涉捐金鸠衆梁而屋之其待人接物睦族展亲居乡交隣靡不辑顺度量寛容喜怒不形辞色遇事刚果不为祸福怖自奉俭约菲衣粝食破窗败几澹如也居家莅官未之改性不嗜饮宾至必设醴论文着述凡一十五卷号南畴集九月丙午奉襄於生仙乡之传岩予与公虽不面而心知敬则旧公之孤谒予序羣玉丐状公行予焉辞辄铭之曰读公之文兮金声即公之行兮天成桐江之山公之名桐江之水公之心山之不动兮不以震撼而重轻严滩之冷冷兮或为公而不平悠悠苍天殲我良人

恭人邵氏墓志铭

恭人邵氏者中奉大夫尚书吏部侍郎兼中书舍人兼同修国史实录院同修撰兼侍读方逢

辰之妻乃吾母夫人之侄也名滿父曰弥高为严陵之知名士生於嘉定十六年癸未六月十日以淳佑辛丑归於我宝佑甲寅以夫有位於朝封孺人越二年丙辰八月二十有三日以疾卒年甫三十四也明年丁巳贈安人咸淳丙寅贈宜人又三年己巳贈恭人男三人国孙梦孙鄱孙女三人省女福女子女咸淳九年九月二十五日甲辰葬於龙山之北曰汪尖山下去家仅十里逢辰铭之曰夫人之家世种福田乃生尔姑为女圣贤又生夫人秉心塞渊如何苍天乃不假年三十有四已埋於阡後数百世陵谷变迁君子鉴兹为我掩焉

有宋方公翠坡先生方母安人潘氏墓志

公之冢子於逢辰为娅婿其冢妇又逢辰表女兄也孤子齋来为公请一言以表於墓予何辞公姓方吾宗之典刑者也讳天驥字龙友娶潘氏公人物礪礪倜傥少年场屋有隼声屡膺亚选几战胄闈居家奉亲孝故乃翁寿至百岁教子笃孝方二鵬皆读书世其家居乡里质直好义每持公论以裁物凡人有不平者辄质平焉人多德公晚年酷好恬静幅巾竹林之下自号翠坡老子闭门净扫一室读史观诗暇则閱老佛氏书每语人曰老佛氏之言与吾儒相近盖喜老氏知止之论与佛氏有诱人为善之意其霜降冰涸之年孳孳之好如此夫潘氏安人生於诗礼之门幼失所恃事叔婶如母然在室清贞淑谨父疾革尝刲股以疗之孝感神明长以年德择对来嫔於方安人孝事舅姑义处姻族无违夫子抚育诸男女恩爱如一翠坡翁治身理家待人接物其善德令闻安人内助之功为多焉子二人长壮犹娶莘田邵氏孙一人会老俱亡次本逢辰曾带行应试娶府城陈氏又高坊某之甥女也孙一人嗣老翠坡翁生於庆元乙卯卒於宝佑丙辰安人生於丙辰卒於庚午男齋卜其宅兆以甲戌十一月合葬於进贤乡之二龙坞

童会卿墓铭

童会卿之孤泳元翁馆於家塾泣请曰泳先人生於某年某月某日以咸淳己巳五月某日卒家贫未克葬越八年丙子宇宙大故先人弊庐为盜焚毀兄弟仅克以死获殡今以某年某月某日葬於某所盖祔先妣兆域从先志也请予为铭元翁每与予言乃翁自七八岁失母随父东西寄学於大家之塾逮长卓有立志处里族笃以睦交朋友实以逊虽遇田夫孺子不敢慢人亦敬而亲之数奇不偶以秀才终其身予惟人之才与学与文天不苟以畀人也降衷之初其性善同而智愚贤不肖之质则有异有其质而无学无文者又滔滔也岂非天降生民不啻其性而独於文与学不肯多以与人乎自宇宙变革以来士不守其业临难苟免衣冠降於皂枹之下独会卿家守其文学自其父业於是今其子又业於是其孙又业於是天之所甚嗇而不肯苟以与人者乃独鍾於会卿耶会卿讳驥龙安项氏江州湖口宰女侄也子泳次某中子早卒孙某铭曰先民有言既富方谷世变日下贫乃其福三后之姓高岸为谷穷士之家守志弥笃四世读书一簞自足後君百世尚有膏馥

蛟峯文集卷七

卷八

钦定四库全书

蛟峯文集卷八

附山房遗文 宋 方逢振 撰瑞粟图序

青溪之近郊有粟一茎而两穗者三四穗者民若士合辞以庆於长官学正宫大用率诸生以其图来谄俾予叙其岁月予曰异哉邑之嘉瑞也昔张君之治渔阳雨阳时若嘉谷生百姓歌之曰张君为政麦穗两岐载在简册吏治?然有光观史者诵之而已未尝得於目击今粟穗两岐秀出於素当年盛美复见於兹得非善政感召而然欤民曰续我大命时尹之休士曰大和尹实有之尹不自有归之太守太守曰於戏非守若尹之力圣君贤相之德予闻之喜於是乎书以备观风使者之采録云

潇洒集序

潇洒集者复心汪称隐之吟卷也潇洒者何吾州名也州曷为曰潇洒文正范公守是州日名之而称隐取以名其集也称隐歙人为州学正年妙而工於吟来吾州曾几何时锦囊已成巨帙访予卧病中属之叙其端予曰噫柳柳州以愚自名溪池丘岛无往而不愚是邦潇洒楼亭泉石无往而不潇洒凡仕於斯歌於斯先後来不知潇洒几人矣今又将潇洒子之诗挟册读之大篇淡而不失之枯小篇奇而不流於怪其为人楚楚洒洒可见其中之飞雪层冰矣是则称隐之诗又不专以吾州得名也虽然先贤所谓潇洒者山水云乎哉子陵一丝之风凛凛千古吾州之得名以此子为正亚博士一等皋比得分半席以讲授余闲率冠者五六童子六七徜徉乎逝川之水涵咏乎舞雩之风蝉蜕而春融籁鸣而机动即其鸢飞鱼跃体认其活泼泼者悠然思超然览心领而躬行之是则吾之所谓潇洒者也子其勉之

扬州盛恕斋吟藁序

杜少陵昔与李太白高书记游时卫八处士年最妙呼为小友後二十年少陵有诗赠之曰少壮能几时鬓髮各已苍又曰访旧半为鬼惊呼热中肠前辈羈穷流落之余不遗故旧如此予少从军淮海时盛君之年妙之又妙予且未得友之矧敢小越二十有五年以吟藁索予於万山深处属之叙追省旧游恍若隔世斯可见少而壮壮而老曾日月之几何而天地不能以一瞬也噫予衰久矣盖自辛未放还抱痼疾卧空山垂尽无几平生往事不复梦见壁上龙蛇化为尘土江流浩浩逝者如斯然而天机动处元无古今固自有不毁不灭不逝而往者不知於何乎寄栖霞寄於刹琼花寄於祠道乡四柏之风操谁与守今吾得是编然後知舞雩之下犹有铿尔而作超然独见之吟弄而归则夫楚山之云秦淮之水二十四桥之风月始有所寄而不孤子其勉之蔽自三百篇而下本乎六义以观所感究乎四始以考其成而又探之骚以致其幽博之西晋晚唐以广其趣然後约之李杜欧苏以会其指归囊括造物之无尽藏者散为

太平风露庶几永与坡後四学士齐名使观是编者曰此严陵方某二十五年前从军时所不敢小友之者也

普安寺记

佛庐於青溪者凡三十有九而盂粥盆饭则普安为第一予筑室读书清风潭上顺流以东三里折而北又五里复折而南峯断流分有峯隆然起而伛倭以伏若虎踞熊卧横絶二流之会以控淳遂苍藤古木萧然翳蔽而普安利为翠岩千尺别是人世出林跬步即翕翕热热僧游其间非铁肝汗胁鲜有不动心者予丙子避地於杭越明年寇平缆舟西上而过之则庐已火於盗但见寒烟断础荒草颓垣而已四顾閴其无人旁有室斗大茺然一衲如孤云野鹤凄其憔悴俨绘像而事之予为之怆然归旧隐且十年有僧复礼访予於清风潭上问向所经从则云栋雪脊奂然一新矣问昔之茺然憔悴造次颠沛於是者谁欤曰礼也问今之轮奂翬飞幻出於寒烟荒草者谁欤曰礼也礼率其徒撙节粥饭苦心殫力以济登兹钟楼藏宇创於庚辰佛殿法堂建於癸未僧舍两庀?库成於丙戌礼之来求以记岁月云尔予嘉其流离困踣不忘所事坚忍强耐以复厥初於是喟然叹曰凡物废兴成败不可得而知也天高地下往古来今一兴一仆一起一灭消而长长而消相寻於无穷此岂可得而知哉盖自有不以兴仆起灭消长而为之消长者则存乎人

静乐先生祠堂碑

淳安县常乐乡上贵寺静乐祠堂者唐处士静乐先生方公聚徒授业之所也先生生於唐末以节义自高唐亡耻非所事持峻行不屈五代之吴越钱氏招之不往遯於深山读书讲道以终老焉昔宋咸淳明堂诏书求历代忠臣烈士有功於民者令州县岁时祭祠时知县事承议郎应应偶发钱一千缗下本寺助造佛庐就其中为先生祠从衆请也越数年国家更代宇宙且运而往独前代名人遗迹不许废坠先生之祠如故呜呼先生之道与天地相为久长岂特子若孙世守之邦人士闻先生之风凛凛如生亦足以为劝

王道以德义生民赋

王立民命道於福基念本根之系此即德义以生之坦然至正之彝理皆日用推此可遵之实人遂春熙圣人出而胎一世之春天理乃壽羣黎之地惟寬平正大大事事无扰故涵育浑融元元咸遂王维知此宵旰之念在斯民道岂他哉德义之中有生意观夫洪范其建驹虞以成无反无侧以修以明非屑屑以力假非区区於利征万端皆正此洪范之攸建纖芥不仁岂驹虞之大成此王者能自得师孰是顾所行之本要先为益俾遂莫不壽之情生者可养期无憾乌可以不厚欲惟和种岂容於罔克有大孕育无穷保息尊以不伤是即罔砥礪而欲并【阙】无禹拯观弥满天下民所蒙福见胚胎春意义之与德者眇以饬修之始莫匪常行纳夫人心归悦之中畴非允殖大抵一毫悖理此岂粹王之道万宇皆春莫非吾道之功故仁壽多在帝治醇醲之际而糜烂每基於伯图功利之中王乃纲审其执贯民所同极予遵而汝免短凶之咎仁我行而尔无鄙夭之风使王民之皞皞如是见道之生生不穷情本欲安事自商汤之制

典因以任教由成后之通是道也在商为极惟以用康於夏曰中形而允治春风惟政之德时雨行师之义用能苏怨徯之困浆食西北拯瘠捐之命蚕桑充冀奈千载以来亦几斯道之泯幸一王者作而受更生之赐如或戛沈其命当不任刑儆令念尔推肌勿交征利尝论衆形皆有弊理独不朽坏证苟弗除脉终未苏胡乃括田非义也忍矣膏腴之夺科敛薄德也伤哉疲弊之敷曾不曰怨已满腹剥将及肤不去斯二者使承苏也则生之一脉殆将斩乎当令化致幽原壽一农夫之必介仁先政邑馁宜老者之无噫灭义非可怒曷怒商顽败德不必诛曷诛苗蠹衆芳同植育则兼育一物独枯忍与不忍王者若曰顺吾德义者则施以春生之惠梗吾德义者则示以秋杀之威道宜两尽噫陶物以古治固善胚臍匡国用盗臣反滋残忍毋管晏术行斩民命於筭策毋孔桑利折腴民脂於平准否则遏絶生意小人未去皆足为吾民之巨蠹焉斯道奚其能尽

冠二子说

冠义曰凡人之所以为人者礼义也礼义之始在於正容体齐顔色顺辞令容体正顔色齐辞令顺而後礼义备以正君臣亲父子和长幼君臣正父子亲长幼和而後礼义立故冠而後服备服备而後容体正顔色齐辞令顺故曰冠者礼之始也

冠义一篇首及礼义而不先之以冠礼义备可矣未也必礼义立然後始及於冠冠其可以不重乎冠者大人之服古者二十而冠十九而下皆得为童子一服大人之服则与童子辞矣安得不重之哉人之所以异於禽兽者以其有礼义也男子生能饮食教之右手能言教之唯诺六岁教之数与方名七岁教之能别八岁教之能让十岁学幼仪十三学诵成童学舞射御其为教不离乎容体顔色辞令之间以常情观之正容体齐顔色顺辞令初无甚高难行今自能食能言至於由小学而大学岁月若是其久工夫若是其深岂徒苦其心志哉盖大人之坯朴已造於此容体正顔色齐辞令顺至於礼义始备以之正君臣而君臣可正以之亲父子而父子可亲以之和长幼而长幼可和至於礼义立矣然後加之大人之服故曰冠而后服备其与童子异也然所以异於童子者軀殼云乎哉盖必有事既冠以往三十而有室则将有父道焉四十而莅官则将有君道焉生乎吾後者先吾则将有兄长之道焉回视二十以前所学何学则当惕然警悱然发痛自督厉曰正容体容体果正欵齐顔色顔色果齐欵顺辞令辞令果顺欵必能尽乎为人子而後可以为人父能尽乎为人臣而後可以为人君能尽乎为人幼而後可以为人长所谓大人之事者盖如此曾子自少而壮壮而老一生涵养工夫见於动容貌正顔色出辞气三事直至全而归之方知免夫善乎士冠礼三加之祝曰弃尔幼志又曰介尔壽考曰敬尔威仪又曰慎尔黄耇人生之岁月易老天下之义理无穷髻髻习之有余头白行之不足古人於加冠之始不得不致丁宁告戒之意盖终身大人之学方自此发轫故又终之曰冠者礼之始也後世冠礼废童子与先生并行逊让之节既不防闲於幼穉之时修治之方又不谨严於行冠之始此人才所以难成而教道所以戛戛乎难入愚重有感焉故於二子之冠绎其大义而申言之 正容体【持已处要端俨以守之使内贼无自而起】齐顔色【接物时要矜庄以莅之使外贼无自而入】顺辞令【出辞气时要审以发守如恶言不出忿言不反出必顾行重必然诺大学曰言悖而出亦悖而入即此便是不顺】弩有机谨而後发知动知微者其为机乎和孙名汝曰机字汝可度

户有枢运则不蠹知阖知辟者其为枢乎良孙名汝曰枢字汝可达遣礼往项氏书

某端拜申稟某惟至敬无文大圭不琢大羹不和件列长仪非古者是用尽芟繁芜而一致情
悃惟高明先之以察某切谓婚姻人道之始礼之本也易之咸诗之时礼之醺且命所以重本
谨始也嫁女之家三夜不息烛思相离也取妇之家三日不举乐以着代也古人致严之婚礼
盖如此顾今天地变人道缺纲常之寄在吾党所以立斯道者亦有仁义而已矣共惟亲家令
闻在躬而惇善积之本义方笃教而开德润之基寒绪之於华宗以世俗论齐大岂偶而纯诚
厚德所尚则同此门墙之所以下取而蛟峯所以托之子女也某亦既送侄女出就车虽以其
未克羞苹藻为忧然既获执枣栗以见云乎不喜薄礼将敬采菲斯荣心之精微言不能尽伏
乞台照

峡中和卜彦才韵

尹躬乐不在耕莘乐在明明以及民贪看回头多应错偶闻变色始知真圣贤气象心为大天
地根萌人是仁认着濂溪牕草意自家胸次一般春

峡塾讲中庸第二章诗

滔滔逝者若斯夫不有耆儒孰共扶昭揭五条皆达道由来一本不殊途圣贤奥义难穷尽老
笔名言妙写模我欲研朱同点易先生肯位此中无

次卢月山贺建造韵

辙雪营巢近岁除樵奴溪友落成初卜隣喜有玉川子作计 为陶隐居架上多储韩杜卷案
头不着老庄书乾坤自有关心事非是幽人偏爱庐【山房归隐卜筑清风潭上与賁爵卢氏
之居直一苇之隔尔故诗云卜隣喜有玉川子也】

至元廿四年十一月二十日得宣命诣朝可庵有诗不敢当次韵以谢

雪棹殷勤泛剡溪吟香为拂案头埃老躯久已乞骸去瘦骨应难入画来但愿东皇怜病瘦早
从西华觅云台当年自是渠无分明主何曾弃不才

抱琴来会锦沙溪音响能清一世埃不学晋人反招隐颇知陶令欲归来羨君雪里骑驴兴哀
我年前戏马台留取老翁看云月乾坤撑拓赖奇才

风潭精舍月夜偶成【先生山房之号本此】

茅屋三间一坞云此窝真足养吾神不知逐鹿断蛇手但见落花啼鸟春石几梅瓶添水活地
炉茶鼎煮泉新古今天地何穷尽愧我其间作散人

挽諫坡居士

諫议村中一布衾幽潜两事最堪称瘞骸鬼结来生草削髮僧然後夜灯螭篆凄凉嗟老钝薤
章呜咽动亲朋羨公有子能如此多少英雄叫不膺

赠相士叶秋月

麻衣道眼明如月学士神仙带不来天上贵人若相问只消三字画炉灰

江湖稳处【於潜寺僧】

此舟无物本来虚万斛清香只有诗昨夜潮头高几丈老僧睡着不曾知

赠山屋相士

我有一部相法在无言处颇欲圆趾欲方耳欲聪目欲明鼻孔欲别香臭其形肖者为上相目
重瞳以迄於今睿者秀者高年者孤幼者颠连无告者不知相中几千万万矣惟不肖者不入
相我昨日病期汝明发来当相传授如期汝果至是或可教与之诗曰圆颇方趾具仁端性体
由来只一般若见里头腔子黑相书已作死人看汝持是法以往十希八九矣

悼亡秘书

翠华东南来奎聚属吴域分王百余年灵光赫天德龙文发南源图书粲东壁谁拆天罅开猝
忽正气泄剖藏发金柜抉蘊破石室籤怕逐汗牛至珍去遐絕我欲然藜人四库亦赤立细人
慕所爱但嗟珠玉翼君子为道谋惟忧孔孟北风气日已趋南强变金革周礼吾能言欲徵恐
无籍落落星向晨後生当努力

毛伯玉以六月廿七日来访是年天不雨梅亢热异常书数韵述怀且以赠之

伯玉不我过过我必六月老天雨不梅五行一乃絕亢离单用事赤乌赤如血人寰何辜辜几
欲炮烙杀左手解衣襟右手不停箠脱帽无奈何而况可腰折西望禽鬼焦东望金鱼涸前山
牛眠湾亦复如火发相携将安之只合坐论说伯玉老先辈家传洞林诀谈辩管郭雄五鬼皆
避易借君铁拄杖蹴踏六月雪为我买雪山斷水作天穴

庚寅人日雨夕大雷电激而成雹阳专而阴不胜寒反为燠复雷雹大雨弥旬燠极而霰继以
大雪三日深山盈丈自人日至晦凡二十三日雨雹霰雪农民告苦为二十韵以记之

龙马交战相长雄一胜一负互始终二气胁击威力穷凝冰迸出焦火中跳丸飞炮怒打空一
夜白尽千头峯顷田十万银裹封东皇未肯开冶熔山眩水晃人灭踪痴猿冻鹤惊折松邻鸡

失旦僧懒钟昏晓不辨天地聋盐虎坐险终陷凶狞狮见日空眼红书生径卧身龙鍾諷諫不到齐王宫灞陵无驴句不工万象丑怪难形容我闻古语盈尺丰今深一丈愁杀农欲将此意问天公天公高高高几重

翰林将指下学峡宾声叟为诸友先雨雪载途民亦劳止一诗怀之

空山雪片大如盘有客远在孤馆眠翰林喝马不到地白帝叱驭亲行鞭疾驱滕六答飞廉六花急舞狂且颠玉皇香案口读宣深衣大带依然仙东里先生履欲穿湿透布袜枵囊纏高谈雄辩鱸亭边不有义意谁肯前阳羡山中春信传两骖已发垂虹鞭诸君急棹山阴船子猷逸兴今翻然

茶具一赞鲜于伯机

惠山天下第一泉阳羡百草不敢先二絕独与端石便不受翠铁黄金煎古来风韵擅玉川日高丈五犹打眠山中旧事今不然石铍不在坡炉塼伯机卓犖美少年好官不做自取廉床头月俸无一钱陆羽经二篇我有片石出古端斤师斲成无脚铛为君置之书几边自汲活水烹新烟不待七碗肌骨仙飞去玉皇香案前天公高高望眼穿百姓墮落深深渊无人敢说江南天

示湖田庵僧【湖田庵乃耐轩先生墓所】

千里渴骥奔横川万松滴翠蜿蜒盘我来庐墓分一龕纸窗摇动卓锡泉铸钟?鼓买祭田云冠雪衲聊结缘崑仑石壁蛟龙渊呵禁守护灵物专六根五蘊洗不蠲山鬼不肯降太颠内热正坐饥火煎睡蛇灭尽方安眠君不见汾山禅刚把铁牛鼻孔穿犯人禾稼痛撻鞭常见迴迴在我前又不见高公崑天遣妖魔下玉輶试我楞壁坚不知死灰无复燃我游诸方三十年出入无界参人天不羡翬飞绀碧捐金钱不羡高堂会食罗大千只羡当年开山祖师贤

送侄隆吉作遂安教谕

旧时州置文学掾南宫集英大学选英雄壮志必此争饭囊郡庠奴隶县今时学籍难登天青山【阙】老天厌蚁旋驴磨犹自痴不释不玄良觉窘南州谕缺数百员得即忻忻不得愠他年正録繇此迁视博士员居四紧博士以上梯级危仕至泮宫钻天令小阮胆大志复狂拔起泥中尤自奋不顾在列嘲好为濫取皋比得家便天上知心爱屋乌尚觉知心相勉劝弘文弟子需补员径合翰林集贤院我欲劝子入翰林却恐远嫁难为情

蛟峯文集卷八

蛟峯外集卷一

<集部,别集类,南宋建炎至德佑,蛟峯文集>

钦定四库全书

蛟峯外集卷一 宋 方中 续辑赐改名勅黄

尚书省牒九月八日宰执面奉御笔勅赐进士及第方梦魁可改赐名逢辰仍换给勅牒乡贡进士方逢辰牒奉勅宜赐进士及第牒至准勅故牒淳佑十年九月八日牒

赐闻喜宴诗

肆予临御九宾兴蔼蔼盈廷俊乂升喜赖谠言条八事欲乘景运进三登摅忠社稷惟名节济用邦家必器能丰芑涵濡盛今日勉思德意共钦承

初补承事郎授平江佾判诰

勅赐进士及第方逢辰朕勅天之命夙夜只惧兹亲策多士於庭尔以正对发明时几之义深契朕心擢冠羣英佾言惟允授尔京秩赞画辅藩往钦初命益务培养器业将於此乎观可补承事郎特差佾书平江军节度判官厅公事替范炳阙奉勅如右牒到奉行淳佑十一年二月十三日

除正字诰

勅承事郎方逢辰朕庚戌亲策有以时几对居第一敷陈鲠亮羣经生学士所不能到非尔乎尔学本乎理义气充乎议论廷唱间佾谓朕得晁董流矣试之宾画而幕府振蓬莱道山往正芸简此我朝待伦魁彝典也志於事业则官爵不足道宜益培清望以须之可依前承事郎特授守秘书省正字奉勅如右牒到奉行宝佑元年八月一日

除校书郎诰

勅承事郎守秘书省正字方逢辰中兴抡魁以九成十朋为称首盖其立朝有敢言之气节词章其次也尔冠廷唱学有源委士论归焉晋班册府慷慨能言凜然有九成十朋之气朕甚嘉之就升鹺校不特储养清望他日馆阁言事於尔有属可依前承事郎特授守秘书省校书郎奉勅如右牒到奉行宝佑二年四月三日牒

兼国史实录院校勘勅黄

尚书省牒承事郎守秘书省校书郎方逢辰牒奉勅宜兼国史实录院校勘速为撰述舆服志牒至准勅故牒宝佑二年五月某日牒

转宣教郎诰

勅承事郎守秘书省校书郎兼国史实录院校勘方逢辰朕顺考古道率由旧章圣继圣明继明共仰四宗谟烈之美疑传疑信传信尚稽诸儒论撰之功固知放失之多盖亦显承之缺是在武丁之孙子任亦匪轻乃资叔向之春秋言皆有考成功惟允褒律宜优尔学有渊源词尚体要老氏藏室联辉奎璧之间鲁史策书补艺炎兴而下十志铺张而不诡诸儒褒贬以惟公比及三年可传百世有晋王虞宋徐沈之善无【阙】苟袁家政骏之讥卓识所资凛着一王之法奏篇既讫聿严六阁之藏论赏诏功陟明有典爰霁丹宸之渥申跻文石之阶扬鸿烈而章缉熙既藉发挥之力率纯德以励忠孝尚坚报称之心可特授宣教郎依前秘书省校书郎兼国史实录院校勘奉勅如右牒到奉行

除秘书郎诰

勅奉议郎秘书省校书郎兼国史实录院校勘方逢辰汉之藏书天禄东观命马融刘向为郎至唐则掌四部图籍有三人焉非第一流曷称兹选尔以经术之渊源负伦魁之声望曳裾册府校讐甚优秉笔史筵讨论靡倦爰命进典中秘以倡斯文异时玉堂承明皆权舆乎此可依前奉议郎特授秘书郎兼国史实录院校勘奉勅如右牒到奉行宝佑三年二月十六日

兼庄文府教授勅黄

尚书省牒奉议郎秘书郎兼国史实录院校勘方逢辰牒奉勅宜兼庄文府教授牒至准勅宝佑三年十一月某日牒

除著作郎诰

勅朝奉郎方逢辰等承明金马汉家著作之所也紬千古书公万世笔非学通源奥文贯紘维不足与兹选尔逢辰听廷魁杰尔持厘尔坦璧水翹英或寤寐於洵阿或翱翔於幕府或淹恤於栳棘皆一时清望也兹命逢辰为郎於着庭而以持厘坦佐之以共掌东观阳秋之重朕之遴选甚不轻也昔刘子元谓史有三长尔三人者何愧乎朕於是知汗青之有日也勉哉可依前件奉勅如右牒到奉行景定元年正月十八日下

差知瑞州勅

尚书省牒朝奉郎主管成都府玉局观方逢辰牒奉勅宜差权知瑞州军兼管内劝农营田事填赵若来不赴阙仍借紫候回日却依旧服色牒至准勅景定三年八月某日牒

除尚右郎诰

勅朝请郎方某本朝除郎之路虽广其要有三曰馆阁曰寺监丞曰监司郡守近自乾淳以来郎非监司郡守不可得虽然岂所以待伦魁者乎尔以清文奥学崇论抗议对策大廷朕尝亲擢以冠多士入仪班着夙稔直声行已非磷缁立朝有本末朕未尝不怀其贤也去把郡麾又淹家食起之盘涧俾佐铨衡於是得一佳吏部矣洁齐以俟朱绂方来可依前朝请郎特授尚书吏部员外郎奉勅如右牒到奉行景定五年九月十日

除司封郎诰

勅朝奉大夫方逢辰记有云好贤如缁衣以其改为改造不替夫善善之初心也尔逢辰先朝伦魁植学有渊源立朝有本末气节端亮议论激昂叠畀州麾屡造省户虽有滞南之叹弥殫拱北之忱爰以勲曹致汝班列是诗人之意也肆酬嘉庸尚有显序可依前朝奉大夫特授行尚书司封员外郎奉勅如右牒到奉行咸淳元年六月十五日

转朝散大夫诰

勅朝奉大夫新除司封郎官方逢辰等生民立君既尊居於大宝惟辟作福斯溥锡於湛恩兹予一人践祚之初亦尔羣臣委?之始粤从京秩递进华阶臣事君以忠宜勤厥职官量能而授嗣选尔劳方逢辰可特授朝散大夫行尚书司封郎官奉勅如右牒到奉行咸淳元年六月一日下

兼国史院编修官勅

尚书省牒朝散大夫新除司封官方某牒奉勅宜兼国史院编修官实录院检讨官牒至准勅故牒咸淳元年八月某日牒

除秘书少监诰

勅朝请大夫行尚书司封员外郎兼直舍人院兼国史院编修官实录院检讨官方逢辰朕只若先朝哀是钜典宏开史局既董领以重臣分判书林宜精求於髦隲尔种绩甚懋植立不凡正学以言曾见洋洋之对嘉猷则告居多谔谔之风顷即前行用计羣吏遂参联於六押仍振案於三长甚宜厥官式叙尔位肆上帝羣玉之府俾贰其间庶我宋一经之传袭六可待可依前朝请大夫特授守秘书少监兼直舍人院兼国史院编修官实录院检讨官奉勅如右牒到奉行咸淳二年六月五日

除秘撰江东提刑诰

中秘藏四部书班高论譔外台奉三尺法职重澄清式表儒猷以华使指朝请大夫主管成都

府玉局观方逢辰卓尔不羣之意气褒然为首之科名凤毛批纶见称占授之敏螭头载笔方
僊直前之猷胡进之难其归也浩朕惟人才培植之匪易事功述作之方新岂繫誉髦而可家
食爰出少府之节俾祥一道之刑把绣斧而临芝山大江东宜不究矣冠绅佩而上蓬岛弱水
隔岂其远而副予抡材之心行尔泽物之志可依前朝请大夫特授秘阁修撰权江南东路提
点刑狱公事兼本路劝农提举河渠公事提举弓手寨兵仍借紫候回日却依旧服色奉勅如
右牒到奉行咸淳三年三月十七日

转朝议大夫诰

勅朝请大夫秘阁修撰权江南东路提点刑狱公事兼本路劝农提举河渠公事提举弓手寨
兵方逢辰在仁宗朝有若韩琦实进士第二人也平日循循若不能为逮帅真定扞骄挺乱琦
独凝然不动举十卒而殲焉谓儒者不知兵可乎尔以先朝伦魁之彦司臬江东会上饶有脱
中之变乃能拔取二士布之州县密伺奸谋以俟机会卒致草薶而禽弥之可谓儒效章章矣
论功行赏爰进一阶径跻六品之荣以为元士之望可特授朝议大夫依前秘阁修撰差遣如
故奉勅如右牒到奉行咸淳四年六月十三日

陞集英殿修撰诰

勅朝议大夫秘阁修撰权江南东路提点刑狱公事兼本路劝农提举河渠公事提举弓手寨
兵方逢辰淳熙间部使者有能究心狱事多所平允及我孝祖嘉之进秩一等又陞阁职尔以
魁彦通才司臬江左亦既逾年克殄凶顽不动声色顷尝赏以元士之阶兹复华以论撰之职
有功而既见知矣其只朕命益远乃猷可依前朝议大夫特陞集英殿修撰依旧权江南东路
提点刑狱公事兼本路劝农提举河渠公事提举弓手寨兵仍借紫候回日却依旧服色奉勅
如右牒到奉行咸淳四年七月十四日

除江西运使诰

勅朝议大夫集英殿修撰权江南东路提点刑狱公事兼本路劝农提举弓手寨兵方逢辰儒
者守约施博无所不通刑狱钱谷事殊理一盖知所以爱惜民命必知所以培养民力也尔以
先朝伦魁之望初政倚柱之贤顷一道祥刑风采殊振兹改畀以输将之寄自东徂西盖取诸
近载驰千隰之駟以活涸辙之鲋则予汝嘉可依前朝议大夫集英殿修撰特授江南西路计
度转运副使兼本路劝农使仍借紫候回日却依旧服色奉勅如右牒到奉行咸淳四年二月
二十一日

蛟峯外集卷一

蛟峯外集卷二

钦定四库全书

蛟峯外集卷二 宋 方中 续辑赠蛟峰先生易登云新扁记 岳元帅时先祖会书盟於马岩聚星楼淳佑戊申易登云新扁明年乡闈先祖果登首选又明年廷唱为进士第一人斯文信有徵矣

淳佑戊申乡之寓公秀土方梦魁辈将以二月乙卯易登云新扁揭於聚星楼前蓬莱山人谿於衆曰是扁之设丹漆其字金璧其书巍巍煌煌炳星丽日揭之通衢十手争指十目争视文则文矣实安在乎簪纓戟如剑佩锵如牲牢既具鼓吹毕陈斯名之揭斯之符津津喜色已溢眉睫文则文矣实安在乎吁文者末也实者本也宁使实过於文无使文浮於实虚其实而求夸於文诸君之自期者可谓诞矣略其文而求工於实诸君之自勉者可不力与圣天子宾贤之诏不期月而颁好事逼人瞬目过耳堂堂之阵整整之旗空拳可以冒白刃乎短兵可以接勍敌乎日月却从闲里过功名不向懒中来此十四字座右铭也诸君生长儒乡登巍科躋膺仕前後辈出衣鉢相传源流有自加以同力合志郁乎俊秀耆英先达凛然典刑可以激昂後习勉励新功相率以为善相资以为益奋凌云之志藹如云之文展拏云之手遂登云之愿使实足以副其文则今日之揭斯扁也未为无助异时之覩斯扁也大为有光若其人自为师家自为学专门独擅面墙株守无不耻之心狃怀居之习坐失事功虚掷岁月三年过矣又复三年徒新登云之扁覩登云之兆文不副实非特为诸君之羞抑亦为是扁之羞矧今大魁黄君亚唱听廷首破天荒地相连也居相迓也诸君之相与友也诸君之相与会文者也予何人也时至气应行当放出一头地要在勉之而已予将洗目以观盛事

贺蛟峯先生及第书 方云峯

某揆时白苹风劲黄菊露鲜共惟某官徜徉帝里领?神仙穹厚协扶台候动止万福某粤自夏新躬造屏庑摅展贺忱过厪尊府肃入得以服膺老成之论唤醒久矣君子之思春风满面秋水照人黄锺律吕之韵入耳着心尘埃为之退却三舍铭镂肺肝又在豆觴殷懃外也临行而魁骑回轅虽得略伸庆悰第若来鸿去燕适相遇於江湖之渚踵复东西有言莫罄不满至今自是判别瑰仪伋植瑞蕙五换杓明岳峻徒厉清梦某久仰执事负湛卢之器蘊相如之学文光百丈笔力千钧摘髭一第固其余事然而以壮怀而掇巍科济膺仕荣双亲耀一族实所罕见况执事进黄君之地位破严濂之天荒吾邦增重士类生辉虽牧圉刍养亦且踊跃不禁则凡励志萤牕攻心雪案者当何如其鼓舞耶若兹盛事殆未可以寻常庆语形容也继今以往弩骀下质朴 小才亦将淬锋厉刃刮垢磨光愿踵芳躅又宁肯甘心暴弃耶如某者兰宫退鹄今年未能窃魁?之辉以同姓作同年良亦饮恨然大事业固不敢起幸觐心或者以华家喧轰在前恐可叨光借润追逐遐轨高明谓何载惟执事虽今日名魁四海恩宠九重大可喜而可贺而愚心所期直欲为国家梁栋作苍生霖雨勲猷与伊傅齐驱岂以一大状头便为兄足哉敢冀酌乾之运辅泰之主式玉其躬以需新渥之宠拱俟锦衣荣还敬敢趋走崇墉尾贺宾後先此擘笺寄鲤以寓贺私之万一伏丐台照

謁蛟峯先生書 方萬二丈

某聞士大夫達而在上其德惠之所施功與造化同夫造化天地也噓之則暖然而為春萬物以之生吸之則淒然而為秋萬物以之成此理出於自然士大夫使然之功奚其同蓋以眷負四海之望唾咳風雲陶泓雨露貧賤者可使之無貧賤失所者可使之不失所旨意之所寓恩波之所洽是雖使然之功殆與自然之化同一

機緘欵共惟某官【闕】受間氣以應昌期以歐陽子之文章收王文正之科第明料如包孝肅而寬大過之鎮靜如韓忠獻而學問有余受知兩朝道山蓬閣藥階薇省未几而分符未几而荷橐共參大鈞論大政垂紳正笏措天下於泰山之安者行將見之是當令飢者之求食寒者之求衣不遂者之求得皆有望於名公之造化矧如某者寧獨无心於此某碌碌無似年不後人才不先人誤蒙以監軒溪堂之澤俾納交於筆硯窮通異命矣而軫念之不忘云泥殊勢矣而予洁之猶故非三世夙緣不爾也慨先人早世母氏繼亡三妹一弟笄者嫁冠者娶叢責於一身安居萬山欲耕無田所資者泛舟之役欲蚕無桑所織者貿絲之將云窗雪案之習又不能與商賈相爾汝所以孔方常下絕交書也吳門別業搬載阻於江禁之嚴顆粒無從水旱相仍強干乘之反食主肉之弱得不償失未免俾之易姓以無源之水而事灌溉以不根之木而取花實羣疑滿腹衆難戡胸所以不二十年家徒四壁先人之墓木雖拱而慈氏之櫟未入於九泉風雨霜露曷勝其悲弟妹之債僅圓而妻兒之号寒啼飢人不堪其忧可謂宇宙間枯槎敗枿阳春誕布生意不相干預吁造化吾固無望於天地同造化之造化豈無望於名碩耶周公瑾指廩魯肅得以濟其飢范忠宣捐麥其友得以葬其親某也固不能无所求求則於是執事以大魁登顯仕江浙東西虎節龍符或文墨之旧殘膏馥賢於十部從事者俾某之以曳長裾焉晴花昼妍麗錦春濯彼必裘连城之寶為榮幸矣如是雖不指廩指之者無非公瑾之廩雖不捐麥捐之者無非忠宣之麥生者感之死者亦感之矣抑又聞之士之已達不忘交好之窮謂之仁士之未達能求友好之貴謂之義仁者予其所當予而能周其急仁莫大焉義者求其所可求而不例其進義莫大焉某之所謂其亦庶几於仁義者乎干冒崇嚴不寒而栗

賀蛟峯先生復秘書署摘句

渙膺宸綍晉陟道山天下第一人宜獨秉三台之筆狀元為宰相即并調梅鼎之司

賀蛟峯先生提刑江東書 文天祥

某當公在螭坳時嘗奉一紙書於閣下書上未几而公歸蛟峯矣譬諸草木臭味實同瞻望云山臨風切切某茲者恭申升撰秘丘宣威直指西台與政蓋嘗識潁濱之文東路洗冤亦以行濂溪之志六絲初駕一佛懽傳共惟某官色正而芒寒揚休而山立言語妙天下材稱一代之奇出處重本朝望在諸公之右自夾侍玉皇香案等而上之胡不均弘俾執事樞國家重更迭之制江湖一節煩公驅馳式敬由獄以長我王國公所學在此歸哉歸哉中詔在道某山林之下靜觀世故其於君子進退安得不致其惓惓芝山父老迎擁星輶以時考之可矣輒馳一介自附於門下燕雀江水東西心期天遠臨紙欲飛

上蛟峯先生书 僧无文

比稟违後为慈亲请田事见实堂又留两日乃絶江省洪氏女兄桃花峯下徘徊玉溪柳塘间三月初方还鄱锋车促覲屡见近诏正人登庸固可为天下国家贺然骤失贤父母又极为西民惜也度关紫气已行复辍岂山川鬼神阴留潜尼以遂斯民所大欲耶某伏奉公移以上蓝缺住持事俾举所知敢不循名考实以求无负侍郎主张之意然有所谓明老者昨领鷺湖於大坏极弊之时百废具兴内和外悦惟恐其不留而翩然引去寺僧申邑邑申台此侍郎曾出公帖留之矣明老去意不可夺托某申恳乃已今之为住山者多弥缝钻刺深根固蒂惟恐不尽其术若僧若俗又惟恐去之不速於此可以观明老人品矣侍郎求僧於数百里之外某以妄人应举不独有愧侍郎亦愧此心也荒荒眼底求一可人如某意者不可得而况侍郎两眼空一世乎此所以舍明老外不复他举也

淳民以横斂上蛟峯先生书

此书长老传言先祖既得书手封送州县官曰亟改亟改不改且奏闻矣州县大惧弊政尽去民如解倒悬也书具载家乘用附卷末以彰先祖之德且使有民社者见之亦得以自警省而平其政庶几先祖之仁心不独行於当时云

淳安县土民董有真等谨百拜裁书献於国史中书右史吏部侍讲侍郎先生师席前某等尝闻先正范文正公居母夫人忧日上宰相书及民间利害凡万余言仰见先正以天下为心以生民为念初不以大忧戚而暂忘也某等今有利害迫於已庸敢合辞以请惟先生其听之某等生为严民同饮严水严之为邑有六田之少者惟淳为最千亩之户不满十百亩之户不满千丰年乐岁民犹不足加以连年水旱夏秋之间粒米珠怪掘草茹根苟活残喘虽中上之户亦趋而下矣遭霜之叶不可以风垂惫之证岂堪再汗斯民一线生意抚摩而爱护之犹恐旦暮之不保何况椎其肌而剥其髓乎洪惟我朝培植至仁以生民为国脉圣天子绍休圣绪以忠厚为家法令户部遍牒诸路苗米不得过数增收高折价钱许人越诉多出榜文此八月十八日之圣旨也颇闻州县於百姓不甚加意夏税秋苗取之无艺此八月十九日之玉音也所有被害民户仰外经监司内经台部越诉根究得实官吏一体坐罪此九月初五日之圣旨也元老恭谨圣训则有预期而催数倍折价之忧以为圣天子加念元元祈天永命无易於此台臣上体玉音则有爱惜民力重催叠扰之奏且欲令郡貳长严戢吏奸上而圣君贤相问答之恳切下而廷绅百执事章奏之敷陈其为生民虑者无所不用其至承流宣化正有望於近民之官也天锡吾邦得贤守令为民父母斯民举手加额以谓郡龚黄而邑卓鲁欣欣然而有更生之望有如王赋供输前此州县之号令一颁虽穷崖深谷之民亦奔走奉命之不暇孰敢有越厥志今也吾民之视守令如父母而守令不以赤子待吾民非惟不以赤子待之且以非类待之矣申请府由挟势作威乃欲置之於汤火中银牌之大如门悍吏之唬如虎一邑震骇神散魂飞千百年古淳之民未尝罹此虐焰也家之老稚相视而泣大则有家破之忧小则有瘦死之患号啼之声上彻青冥国家之所恃以为命脉者乃欲一旦而斫削之仁人君子不忍闻之而见之也作俑之吏方且扬扬然以为我能为官办财赋我能为官作威福刻薄之政肆行抚字之仁何在县吏则曰我即知县也府吏则曰我即知府也十四乡之贵寓巨室我能箝之

而制之十四乡之下户细民我可生之而杀之狡焉小吏弊例捷出已纳之税一疋则有六贯之陪已输之苗一石则有五关之贴以至上供折帛又有三贯重纳之折丝绵每两则交称二十钱重岂文思院有是秤也而又有所谓头脚者焉苗米每石则折纳六十贯岂丰稔岁犹有是价也而又有所谓磨费者焉以至禾税畸零每尺例有一贯之取则又有脚钱钞钱者焉圣天子有苗税取民无艺之忧今州县则取之过苛矣圣天子有秋苗高折价钱之虑今州县则益之倍蓰矣平章有恭敬圣训之心州县则若不知之台谏有遵体玉音之奏州县则若罔闻之一有上司催科之榜则宣之扬之以揭通衢之墙壁惟恐其不张皇一有圣恩宽民之旨则秘之密之以涂时人之耳目惟恐其有见闻甚至前政预借之关必不用今来趲借之令必欲行问之於吏则曰前政之行不可用也问之於官则曰前政之借不可理也知县方欲有循理之言而专局之官吏乃从而箝其口知县方欲动宛转之笔而专局之官吏又从而掣其肘曾不思前日之借既以为非则今日之借亦未为是前日之关状不可用之於今日则今日之钞书亦不可用之於後日也诚如是则民间预纳之钱遽欲使之平白泯没於官理耶法耶故乡民为之语曰去年预借官不还今年典卖重纳官今年趲借急如火明年饥寒如何过况夫屡年以来县无正籍止凭府吏随时标簿暂尔批凿影射乡民今日之足钞未必不为他日之具文也始也专局官吏之来西风飐飐黄叶悲秋今也专局官吏之去四知不畏暮夜行舟抑明月坎抑膏血坎将尽归於公朝之府库坎抑归於私家之囊橐坎人见其空篋而来满载而往妇子伺门僮仆懽迎私相告语喜色津津是虽一家之幸为可喜不知一邑之哭不忍闻也呜呼蝮蛇之毒暂歇虎狼之恶又来一邑元气销铄殆尽龟皮鹭股岂堪频刮而频封耶但闻道路之间攒眉而语曰前官去时削尽膏脂後官来时剗尽地皮一邑之民罹此荼毒抱此冤抑欲以畀辟正理鸣於县官而县官不之受欲以此情此意白於郡使而州县相为表里蕞尔小民岂能回郡侯之听也於是相与语曰吾邦有先达之尊以尧舜君民为己任行将霖雨天下岂不能洒一滴以活吾邑之涸鲋乎某等今有哀痛一书陈於百里欲乞钧慈转而致之琴堂以回一邑之生意先生今之文正也必能以文正之心为心垂情父母之邦上为国家壽元气下为斯民续命脉达之州县可也申於台部可也闻於朝廷可也庶使九重之仁无壅斯民之疾有瘳吏奸可絕横政可寬预借可免而前官之关状可开矣一邑幸甚惟先生其嘉听之

访蛟峯山房二先生 紫阳方虚谷

朝窺石峽峽中石暮宿风潭潭上风【石峽蛟峯所居风潭山房所居】

石峽书院赋 紫阳方虚谷

历故鄣之遗区兮泝桐江而西上百滩跳以湍驶兮万峯閭其清朗挹寒碧以濯纓兮睨空青而倚桡维还淳之古邑兮割歙封之东壤昔固尝郡於斯兮犹民稠而土广予家於紫阳之下兮濫此邦之来长虽视之若桑梓兮愧曾微於善状七阅岁曷不归兮骇童颠而槁项赖多士之微俗兮遵砥途之坦荡犹阡陌以劝耕兮嘉农畔之洵让伟深衣与大带兮劳予行之鞅掌曰肄业於精庐兮新石峽之嶢 领袖者予同宗兮又同登於龙榜郁经纶其未竟兮聊私淑乎吾党睠吾宗之婣媯兮扣古初而遐想古雷氏之嬖轩后兮实得姓之攸昉至姬周而昌大兮叔佐宣而善将参召南之雅什兮咏其猷之克壮伯牙之师子春兮弦山水之幽响?两都之

九卿兮字君实而名赏纷蟬起以勸新兮有平陵之相望成败之不可以论人兮亦一时之倜傥猗真应之仙翁兮知驾鹤其焉往叹异代之陵寢兮孰不凄迷於烟莽彼金椀出人间兮此独岿然而无恙羣云仍之簪纓兮谨岁时而来享隱鵠原者曰于兮守雉山者曰亮一則保土宇以綏靖一則擅詩名而高尚皆賢良之苗裔兮匪郡乘之私獎予君玉之好修兮鼓斯文而為倡昆季儼其連璧兮迈坡穎之超放出寸云必為霖兮寧退處而孤抗肯斯堂於傍近兮奉聖賢之遺像聚學徒而蒞止兮咸攝齊於函丈俾掃松而釋菜兮契予衷之歆仰撫鹿洞之故實兮謂升堂而授講嗟予學之久荒兮艱弄斤於般匠拾朱子之糟粕兮切有聞於疇曩情之動貴乎省察兮性之靜在乎存養未發固无所偏倚兮發則欲其各有攸當致知以進其識兮居敬以除其妄如鳥翼之必雙兮如車輪之必兩日用飲食无非道兮勿馳情之惚恍一念不念之間兮分聖狂之克罔噫近世之不古兮?名場之置網科舉之坏人心兮竟區區之得喪厉夜生子而取火兮幼嘗視以無誑以干祿為始教兮將終身其奚仗天或者惡其然兮斯革弊而矯枉无所為而為學兮真儒庶其可訪聲乃心於希瑟兮盤厥躬於陋巷顏曾固何必仕兮勝齊魯之卿相或塾居而授書兮或野芸而植杖君子晬盎以潤身兮小人給夫一餉化鋸鋒而牛犢兮息鋸箛之鷸蚌春幽酒以介眉壽兮豈太平之無象嬰吏徽而弗予蛻兮言及茲而泚頰予固將引而去之兮疇敢卜鄰於思曠時辛巳孟夏十有七日

壽蛟峯先生七旬 邵清溪

元佑人無幾對西風從頭倭指寥寥誰是劫火灰中真鐵漢老【闕】一人而已那【闕】掀天揭地司馬不來諸老去奈乾坤顛倒成兒戲天下事竟如此小春明日浮梅蕊到如今平頭七十依然弧矢且把六經書盡注更占峽山深處又管甚世間風雨稱壽一觴公須飲道此心千載斯文寄康濟外總余事 右調賀新郎

又 方逢振

峽山秋晚峭蒼寒萸菊拒霜時候眼底氛埃千萬態看盡云輪白首宇宙骰盆天公兒戲人事猶刍狗此翁七十精神只麼如旧須信待足何時不如人意時事十常居九到得聖賢無奈處天亦不能管勾司馬自傷伯寮自慙於我乎何有喚庄生起借椿千歲為壽 右調念奴嬌

賀蛟峯先生入宅詩 何夢桂

富貴朱門蓋里閭先生斷石此山居一區自足子云宅三徑何妨靖節廬萬壑風雲生几席四山花木入庭除乾淳豈少高官爵自是寒泉要著書

賀蛟峯先生得孫 方山房

翁年六十九大郎才得孫五行不孤亢停當乾與坤於焉觀於穆孝悌天已根賢愚一任汝鞠育推予恩我觀人祖心恨不見曾元曾元日以遠多至昧厥源惟有眉山家穎弟坡為昆慶圖挂高堂幼幼而尊尊代昌賢才出根碩枝葉煩願是我家兒庶几大吾門

蛟峯外集卷二

蛟峰外集卷三

<集部,别集类,南宋建炎至德佑,蛟峯文集>

钦定四库全书

蛟峰外集卷三 宋 方中 续辑

祭蛟峰先生文 何梦桂

天生哲人千载一期固有负经纶天下之志乃至鬱於数而不得以竟其所施当其鬱而不达不惟人不得以致其力虽天亦不能违自古大圣大贤与夫一世之豪杰不得志以死者何限而卒不得以揅夫时惟公声名在天下功业在方册而其蓄大发宏瀦深流溢识者方望其福泽之被天下使匹夫匹妇之不余遗至有不得以尽如其意者时耶命耶吾不得而知十数年来每一进见但见其忧忧戚戚扼腕而攢眉穷达仕止惟义惟命公岂为一身区区者之私故其语及民事则为之太息而欷歔畏天命悲人穷固圣贤之责而民之痒痾疾痛公忍视之藐焉为手足之痿痹然力不能扶则已何为自鞠自苦以至於斯又况世之所谓孤臣者其虑患之深而操心之危麟折其足而奠楹拽杖泰山之颓其忽而君子此心固非衆人之所能识而其事则亦知与不知者之所深悲民失所怙士失所师九原不作其将谁归呜呼天地无穷事会无极愚以是悲吾道之孤奇盖棺事定公全归而无愧固未知後死者之何居百里絮酒一束生刍公鑒此心尚其来思

又 邵古香

愬灵修之翕散兮瞻盖壤之悠悠怅凤衰而麟踣兮繡林莽为荒丘轲之死?无传兮渺邹峰其予愁木铎瘖瘖而收声兮说铃峰起千五百载之寥寥兮微程朱其谁与俨双峡之撑空兮紫阳是似障梭象之狂澜兮江汉汤汤彼瞿聃之诞幻兮况得侍乎门墙伟勲名之照杀青兮羌吾知其粃糠忽天跳而地踔兮叫苍梧其何许纪柴桑之甲子兮岁冉冉其云暮痛巖嶠之辛苦兮独抑郁其谁语使章甫不至荐屨兮夫惟斯文之故吁噓乎泰山之岩岩兮横目具瞻虎豹倏而逝兮狐狸曷其昼潜将生人之无禄兮胥为愚黔将往圣之无神兮委钩髮之绵延不然何夺吾之冢钜兮遄归於天矧燕石之蒙繅藉兮青黄乎沟断岂徒哭吾之私兮切独悲此文献粲蕉荔以为羞兮横流涕之潺湲睇主楼之閭?兮吾将从夫南阳之阡

又

呜呼大贤之生动静太极执道而出如阳之辟时行物生风飞霆擊卷道而入如陰之翕玉韞珠沉声收影息故其进而道不为之孤退而道不为之屈呜呼我公正学濂伊储精奎璧元佑全人三代遗直雉麓西蹲龙峰东萃鬱鬱葱葱环瑰毓德公生则宅龙峰之阿死则枕雉麓之窟是吾淳数百年之间气鍾於公在大化中犹旦夕也虽然载道有书死而不亡纪实有铭远

而弥光素车彭彭白旆央央江流呜咽山气沧凉生刍薄奠俎于道傍哲人已矣涕泗其滂

又

耆旧沦谢兮日益以稀嗟若先生兮苍苍而不慙遗文昌夜陨兮星斗黯其无辉峡云惨淡兮空护藏山之遗书世之有识兮举闻讵而悼惜矧丈席之日亲兮曷不揽涕而嗟咨慨先生之立朝兮献纳曾不依违叱折奸邪於始萌兮诚为国之著龟麾节煌煌於外兮厥闻四驰士咏归於雩风兮点胥骄卒震慑乎霆威苍生顒顒其霖雨兮倏陵谷之改移数有不可必兮不得以尽其才之所欲为谓科目不足荣兮陋晁董於千载谓富贵不足夸兮退然陋巷簞瓢之癯儒谓正学当续兮由考亭上溯乎濂洛谓古必有塾兮所以造就族党之与比闾铎声一振兮救人心於已死着书立言兮庶几来世之永貽深衣幅巾兮可优游以忘世不皦皦以为洁兮不混混而诡随呜呼先生声名盖世兮功业未邕厥施文章黼黻乎皇猷兮问学卓为世师心耿耿其忧世兮虽易箠而犹未已抱节以终其身兮而今而後得全以归呜呼人孰无死兮先生之死夫何憾而山颓木坏兮实为斯文而痛悲

故侍读尚书方公墓志铭 文及翁

公讳逢辰字君锡其先河南人远祖紘官吴中避新室乱因家於丹阳郡歙之东乡今淳安县是也孙储汉和帝时贤良方正对策第一仕至太常洛阳令黠侯忤窦宪弃官去或见其皓鹤自随呼为仙翁远孙曰上贵府君唐僖昭时隐德弗仕教授乡里其徒号曰静乐先生越十一世生参谋公力学笃行记问该博乡人尊敬之号耐轩先生子三人公其长也公天稟卓絶自幼刻苦务学夜诵彻旦诸子百家之书无所不读而会归于周程朱子之学其所为文家传人诵士林素以魁彦期之淳佑九年己酉乡举以梦魁名预首选明年中省试第一等理宗临轩策士以公所答敷陈鲠亮擢为进士第一御笔改今名昭异渥也公感激上恩方在期集所闻二豸冠忤宰相郑清之相继去国善类摇动适遇雷变遂叩阁上书其略曰伏覩御笔以雷发非时避殿减膳恤刑狱而独无求言一条天下恠之中外传闻以庙堂为监谤之穽所贵乎大臣者以道事君不可则止今君嗣未定大臣不能赞之土木方新大臣不能诤之货臣聚歛大臣不能禁之敌国佯遁大臣无以备之颠而不扶危而不持则具臣而已矣闻大臣屡疏丐闲而未可其请留之者愈坚攻之者愈衆乃所以为大臣甚天下之议非所以爱之也疏奏上优容之初补承事郎佾书平江军节度判官厅公事公莅事勤恪提刑潘公以臬事咨决知其远到深器之吴中有和靖书堂郡请公领学事初讲太极图说分作五节发明濂洛蘊奥宝佑元年甲寅以秘书省正字召入时海州丧师淮阌以捷闻物论沸腾公叩阁上书有曰伏覩御笔以海州之捷降诏奨谕道路疑之得以谤陛下以曲行赏矣海州之败三尺童子皆能言之而帅臣抗章来辩徒以一去恐朝廷直欲以败为胜道路传播莫不羞之今曲徇其请又诏奨谕岂陛下不知而受其欺耶彼国忠之欺其君为固宠也天下国家之安危彼不恤也今富贵操柄陛下自有而自欺欲何为耶为陛下谋者何不降诏以督励之曰朝廷好官爵汝为之天下大富贵汝享之今四郊多垒汝欲以敌遗君父将安之乎此诏一下彼敢于言去臣不信也阳城有言脱以延龄为相臣必取白麻坏之学士院果降此诏则祖宗三百年涵养缙绅中岂无阳城乎臣甚为天下国家羞辄痛哭流涕之臣愿陛下急收回御笔犹可解万世之议揜外

国之笑借曰万世之议未暇恤则四隣笑我何以立国乎公此疏为制阉贾似道发也二年乙卯春除校书郎时上总揽权纲威福有窃弄者储君尚幼公怀隐忧上疏有曰当大本犹豫之秋岂无旁睨蜉蝣之撼甫节之焰焰难度其心平勃之屹屹当储其後又曰天下有贫州郡而无贫太守有贫国家而无贫邸第南司贫而北司之应奉不贫百姓贫而缙黄之窟宅不贫如此类者不可枚举至於狭小才以济大贪者於陛下之近亲有依凭焉於陛下之宫中有承受焉於陛下之左右有游誉焉专以伺陛下下之好恶喜怒以媒其身陛下得之於左右之游扬者曰某人能也某人廉也然後出自圣断而用之或畀以麾或授以节曰吾自除吏也而不知西园之谐价固有从旁而窃威福者矣又曰京师国家之根本王畿四方之命脉此天下所恃以为国者京有尹畿有漕所以使培护根本爱养命脉也岂愿其拨本根戕命脉以便吾之私哉迨年之为是官者失其设官之本意不过为阉竖辈一大承受耳无名宣头真伪莫诘非时取索隐匿莫稽亲密之地惟恐浸润之易行严邃如天谁敢执拗以取祸仇士良之教其徒曰天子不可令闲暇暇必观书见儒生又纳谏智深虑远吾属恩且薄而权轻矣莫若以财货声色蠹其心使无暇更及他事然後吾辈可以得志今此曹遑遑汲汲为陛下经度前之藻棁未休後之丹雘又起陛下方以其小心办事动适吾志而不知此正仇士良之策也帅漕两司疲於应奉之不给帑库赤立廩如垂罄职此之由万一畿甸之内有一旦警急不知陛下何所趋办何所倚仗乎是不急救两司之贫乎如将救之愿断自今日止营缮省宣索剗刷两司不急应办之空名悉停罢之左右并缘需索之有例者悉阁之扫除蠹冗先自此始然後可以责两司之培护根本爱养命脉以为缓急之备也三年丙辰夏上疏有曰善处急者不以急而震天下亦不以暇而愚天下夫天下之势固不可以激尤不可以媮势急矣吾又示之以急则失之激故不容不暇以压之此所谓暇岂真暇哉当为皇皇之急不当为悠悠之媮然後可以暴白於天下曰吾所以示不迫之暇者非愚天下也不敢震天下也古之谋人国於江左有为之者矣莫窘於淮淝而谈笑於奕棋莫迫於新亭而从容於就席此之谓不以急而震天下外示谈笑内必有以神其指授之略而收轰雷破柱之功阳示从容陰必有以伐其壁後之谋而折其飘风怪雨之势此之谓不以暇而愚天下夫安则曰安危则曰危迫则曰迫纾则曰纾何为翕张阖辟哉世变日激天下之事不可以直遂故处急则必以暇处暇则必以急不然吾能为晋人之急则天下之忧端未艾也又曰天下者使吾有以自谋可也不可以隣国之存亡为安危使吾有以自备可也不可以敌国之缓急为喜惧以隣之存亡为安危则病於依以敌之缓急为喜惧则病於制善为谋者不依於人善为备者不制於人苟不以我之未及谋未及备者为第一义而遽以彼之存者为安缓者为喜万一隣敌阳示安枕以给我而假敌以道脐可噬乎胡不赫然一怒移其揣摩他人者而自谋自备乎进退伸缩无不由我固不必以隣国之存亡觐敌国之缓急也时阉宦导上以土木湖山工役大兴公疏又云今与敌对境我无一日谋敌而敌无一日不谋我彼之所筑者金城铁壁我之所筑者土妖血山彼之所筑者夺我之地为之我之所筑者夺民之地为之又极言备边之事以必争之规模而夺浮光然後可以全两淮而保长江以必死之规模而守樊襄然後可以拒光化而全江陵大淮之犹可守可耕者以犹有一綫河也今乃涉河而筑浮光光乃吾户内若其屯於斯耕於斯生聚教训於斯则日夜出骑以挠我淮东西俱不可耕矣虽坚城闭壁而坐为禁制不得动矣为吾之计当勉谕淮阉尽力以争浮光毋使彼得以久其耕而牢其巢则两淮犹可安枕也万一樊襄不牢彼反夺而巢之则江陵孤注尚足恃哉为吾之计当择荆之猛将责之以必死之规模守樊襄则北可拒光化而南可以全江陵一则思所以夺其地二则思所以争其民则对垒之胜负决当在此而

不在彼矣公此疏真救国之活剂也奈何不见聽用以至於亡人邪天邪时内竖纵横日以滋炽御史洪天锡劾之不行而去公即移书宰相勉其行申屠嘉之事又抗疏援膏上肯下二竖为喻曰台臣劾二竖欲为国家早去厉鬼非有膏上肯下之难也而陛下不行其言岂陛下自爱其国反不如爱二竖之甚乎汉唐之季建置天子在阍竖掌握罪大恶极朝廷不能诛之天下必有起而诛之者汉之宦官陈蕃窦武争之不胜并州之将操戈而殪之唐之宦官宋申锡攻之不胜河中之帅移兵以屠之又曰小人之在君侧其操心何所不至其所以不敢动於内者盖有所憚於外若外不足憚则此曹无忌憚之心生无忌憚之心生则无君之恶动矣言极激烈上不悦公遂称疾求去是时丁大全以台长用事欲鉤致诸贤公见几而作谒告径行丞相董公槐劝公不必远引公曰丞相且自照管越数月董果罢斥四年丁已除着作左郎台论以公不合擅出关寝新命讷斋程公元凤拜相首以公荐上曰姑与外庸未几除知宁国府台臣以交游学舍论罢公自乙卯弃官归杜门卻扫潜心於易召之不赴开庆元年己未大全罢逐相位无肯当者内地汹汹上以海阌疆起履斋吴公潜踰月入相收召善类以着作郎召明年权尚左郎官是时丁党虽黜六贼尚存国博徐庚金等相继上书乞诛六贼以谢天下时上外迫边警内蔽六贼宣谕吴相不当汲引庚金等议论纷纭吴相榻前抗疏其略有曰强敌入我堂奥奸党犹在衽席外庭纷纷盖为社稷陛下若以正人不当收召则是君子不足恃六经不足信而孔孟之道可废万一宗社倾摇恐天下後世书之曰亡国自臣潜作相始上为之斂容隙由此开先是鄂渚危急似道提师江陵密奏欲请下流兵权上以问宰相潜奏鄂以上既属似道鄂以下宜属赵葵上不从径以下流兵权并聽似道节制时上与贾密往复外廷不得预闻以宰相不知边报为潜罪夜半片纸忽从中出吴潜除职与郡中外惴惴谓必有後命公上疏略曰臣闻圣人之好恶是非与天下为公不宜与天下立异好恶是非者心也圣人之心本与人同岂有与天下异者然一人虽至眇而九重至尊也万钧至重也天下虽至衆实则至微也至贱也以至微至贱之好恶是非而反有时与圣人异焉以常情观之万钧之重九重之尊岂不能与之立异而自为好恶是非以与天下角一胜哉而圣人则曰不敢拂百民以从己之欲明目达聪询谋咨岳进善有旌敢谏有鼓诽谤有木衢室有问总章有访谋之卿士庶民谋之邦君御事盘庚之恳恻多方多士之委曲凡一政一事之取舍断断焉不敢自决必需民之肯而後为之圣人岂畏天下而徇之者盖天下之所同好而我独恶之天下之所同非而我独是之则为人上者其好恶亦难知矣大抵上易知则下亲上难知则下畏下亲上则上安下畏上则上孤故主道莫恶乎难知莫危乎使天下之畏已又曰窘急而求之一缓而遣之号呼而进之一唯而退之旁观沮缩何以作人任事之气上问为谁公捧疏敷奏言辞恳恻又奏臣疏不敢直指惟陛下曲回天怒以安中外上首肯至再下殿纳副缙绅六館莫不传送而榻前欸密之言外廷无闻知者呜呼曲江公不留而天宝之乱起司马公不存而元佑之治衰正人君子之出处国家社稷之存亡系焉公此疏盖有见於此矣未几似道入相台臣希旨论公罢职徐国博以书来招公开讲於婺之书堂生徒从游者数百人景定辛酉除知婺州林光世希权臣意以外台劾寝新命公遂即家剡塾以私淑其徒屡年而後成寻除知嘉兴府以论罢改知瑞州及考又以论罢去之日一郡如失慈母咸淳元年乙丑度宗登极以司封郎官召辞不允上在东宫久闻公名一见甚喜将大用之除兼国史院编修官实录院检讨官兼直舍人院上疏乞举行天圣绍兴之诏命朝臣为知县重其事权当如胡安国之言专以均田税正版籍均力役劝农桑崇孝悌训士卒除盗贼为考课之法旨从所奏後沮不行寻除秘书少监再除起居舍人三年丁卯信州军乱以措置军粮失宜録事参军遭其凌辱乱卒白昼持军器一城

汹惧上除公秘阁修撰江东提刑公闻命就道及境或者来言城中近事劝公勿入城偃旌寂鼓而过公付之一笑到城下即日单骑入州决狱一城肃然於是密戒能事者館于信州尽得乱卒姓名密调诸寨銳卒擒其渠魁及其余党悉置之法而叛卒平王褒嘉之词曰仁宗朝有若韩琦进士第二人平日循循逮帅真定悍骄挺乱琦独凝然不动举士卒而殲焉谓儒者不知兵可乎尔以伦魁司臬会上饶有脱巾之变乃能密伺奸谋卒草薙而禽猕之可谓儒效章章矣公断狱如神两造在庭戒吏勿挟持虽田夫樵竖必引至案前曲尽其情每事如此行之不倦故一路无冤民盗贼屏迹公治事少暇必至鄱江书堂与多士讲书延见朋友问政问政堂乃公所建也公以教化为急务曰教化行则狱讼简矣拨田养士招集生徒教人以进学下手处从躬行上起从人伦日用上起悉以朱子之学推广之明年除江西转运副使有献策於堂者请以铜钱一当十行之天下似道委公自江西行之公抗言其不便议遂寢市余翔涌公发米平糶賑济饥民江西民苦和余之害申朝省蠲免郡有女妖以左道惑衆隣境数州之民十百成羣踵门徼福者不絶积有年矣公杖而流之由是遂息治事之暇必至东湖宗濂二书院及府庠与士友讲论明辩而笃行之漕廨後有莲池数亩公筑屋其上扁曰君子堂取濂溪爱莲之意公所至以讲学为急务士师其道吏畏其威民怀其德五年己巳郊礼成列爵开国男食邑三百户除权兵部侍郎同修国史实录院修撰兼侍读上日御经筵虚心问道公每事启沃所以格君心者多矣上眷隆渥问公读书聚徒之所奎画昭回赐名石峡书院赞书曰近进士一科文章盛而古意衰卿以儒硕荆家塾以程朱之学淑其徒朕甚嘉之七年辛未典贡举竣事除吏部侍郎丁母令人忧去国哀毀至服阙除左侍郎辞不就贾相国十六年而公屏居十余年德佑初元除公荆湖四川宣抚司参谋官以父命辞遂颺侍汤剂絶意仕途寻除权户部尚书改礼部尚书皆不拜是年夏丁父忧公力疾负土营葬惟恐不及未几乡寇不靖焚荡官舍民居公居室虽毀而书塾岿然劫火之外避地来归命子梁等洒扫文庙修葺书院廊宇斋序日与生徒讲明修己治人之道若将终身焉盖公嗣往圣开来哲为己任考之年谱公生於嘉定辛巳九月二十九日午时卒於至元辛卯正月初三日申时遗言以深衣殮不尚异教晚年隐居之日多着孝经解易外传尚书传中庸大学注释凡若干卷刊於家塾公平生得力以格物为穷理之本以笃行为修己之要故其教人也读书有法劝戒有条凡登公之门者皆有用之学时士风不振所至頽靡惟公之乡党衣冠如故皆公之力也公性和而介胷中无物磊落如青天白日天地元气聚於公之身浑沦醇厚不见涯涘其接物也不事察察而自不可欺人物魁岸声如洪钟至老观书夜分不寐视世之富贵利达纷华盛丽蔑如也待诸父昆弟子侄悉皆如一待亲戚邻党皆尽其情一以至诚及物所以人皆心悦而诚服也曾祖汝翼贈宣教郎妣任氏祖謙贈朝散郎妣童氏父熔累封奉直大夫两淮制置大使司参谋官妣邵氏封太令人公娶邵氏太令之侄女也累贈令人理家处已待族御下皆有法公遂得以专意於学男子三人长梁前太学率履斋生次栋次杰习儒业女子三人长德纯适前修职郎无为军无为县主簿徐敏中次德恭适前武学贵谋斋内舍生项雄飞幼德温孙男二人合孙德孙谨卜以至元癸巳三月二十九日乙酉安厝於淳安县南之安溪於虞昔司马文正公曰吾与范景仁兄弟也特姓不同耳抚今怀昔岂忍使伐木之音寥寥亡闻廼按事状而系以铭铭曰

猗欤先朝以儒立国道理最大繼天立极於穆理皇道久化成观乎人文理学大明上章揜茂如日正中九宾胪唱魁首擢公廷策万言具在国史屹立朝端凜凜奏疏排奸指佞责难谓恭尧仁如天黯直亦容麾节所临仁声义气经济之才公辅之器天步孔艰归欤石峡着书满家

经传史册驰旌之招循墙以避臣心惟一帝临无二我之於公志合道同熙明启沃相勉报忠公之云亡孰不流涕千里而遥编示状志不泯其实乃系以铭刻之金石炳若丹青

蛟峯先生阡表

故宋礼部尚书方公历仕三朝为时名臣宋亡晦迹弗仕学者因其自号称之曰蛟峰先生如隐者焉在世祖时旁招遗老以待咨访诏御史中丞崔彧起公於家辞疾不赴以高壽终今天子稽古图治诞命儒臣刊定前史以览观其得失而有司莫能奉公事状以闻竟不为立传书已上而潜与公曾孙道龢适同在史馆因得公言之详乃摭其大要而序次之以授道龢俾刻石为阡表庸备史之阙文谨按方氏睦之淳安人公曾祖汝翼赠宣教郎祖谦赠朝散郎父熔封奉直大夫母邵氏赠太令人公初名梦魁淳佑十年理宗临轩策士览公所对敷陈鯁亮亲擢为进士第一赐名逢辰故公以君锡为字用例补京官金书平江军节度判官厅公事宝佑元年召为秘书省正字升校书郎引疾却官除著作左郎未命除知宁国府未上并以言者罢开庆元年召著作郎兼权尚左郎官居无何复以言者罢除知婺州以外台奏寝新命除知嘉兴府未上改知瑞州甫及期亦皆以言者罢咸淳元年召为司封郎官兼国史院编修官实录院检讨官兼直舍人院累迁秘书少监起居舍人三年除为江南东路提点刑狱公事徙江南西路计度转运副使五年入权兵部侍郎同修国史实录院同修撰兼侍读七年知贡举竣事除吏部侍郎丁内忧服阙以侍左侍郎召辞不赴自是不复出德佑元年除京湖四川宣抚司参谋官权户部尚书改礼部尚书俱以父疾辞遂丁外忧此公所阅之官也秘阁修撰公之职也承事郎转至中奉大夫公之阶也淳安县开国男食邑三百户公之爵也郑丞相清之秉政御笔以雷变彻乐减膳恤刑狱而独无求言一条中外传闻以为庙堂监谤之术及两察官以忤清之去国公亟扣阁上书力言之且谓所贵乎大臣者以道事君不可则止今君嗣未定不能赞之敌国佯遁无以备之货臣聚斂土木方新颠而不扶危而不持则具臣而已闻其屡疏丐闲留之者愈坚攻之者愈重此非所以爱之时公犹在期集所而未官也上特优容之贾丞相似道制置两淮海州丧师更以捷闻公上疏言海州之事三尺童子皆能言之而阍臣以败为胜陛下曲徇其意出御笔令学士院降诏奨谕之岂不知而受其欺邪抑已知而姑以揜外观而自欺邪愿陛下急收回御笔以解万世之议而免外国之笑借曰万世之议未暇恤邻敌笑我何以立国乎公之取怒於似道自此始理宗在位日久务总揽权纲政多从中出羣儉乘时弄威福之柄公上疏曰当大本犹豫之秋岂无旁睨蜉蝣之撼甫节之焰焰难度其心平勃之屹屹当储其後又曰天下有贫州县而无贫太守有贫国家而无贫邸第南司贫而北司之应奉不贫百姓贫而缙黄之窟宅不贫至於挟小材以济大贫者近亲有凭依焉宫中有承受焉左右有游誉焉陛下以得之左右者出自圣断而用之曰吾自除吏也不知有从旁窃威福者矣又曰京有尹畿有漕所以培护根本爱养命脉迹年居是官者不过为奄?輩一大承受耳无名宣头真伪莫诘非时取索隐匿莫稽仇士良谓天子不可令闲暇若以财货声色蠹其心使无暇更及他事然後吾輩可以得志今此曹遑遑汲汲求适吾意者正士良之策也帅漕两司疲於应奉帑庾赤立万一畿甸之内有一旦警急何所趣办何所倚仗乎愿断自今日止营缮省宣索两司不急之应办悉停之左右并缘需索之有例者悉阁之然後可以救两司之贫为缓急之备也上颇感悟而土木之功不为之少辍公复因论边事屡及之有曰善处急者不以急亦不以暇古人谋人国於江左者莫窘於淮淝而谈笑奕棋莫迫於新亭而从容就席

固不以急也外示谈笑而内有以神其指授之略阳示从容而陰有以伐其壁後之谋所谓暇者岂真暇哉又曰吾有以自谋而不以隣国之安危为安危则不依於人吾有以自备而不以敌国之缓急为喜惧则不制於人苟以彼之存者为安缓者为喜万一隣敌阳示安枕以给我而假敌以道脐可噬乎又曰今与敌对境我无一日谋敌而敌无一日不谋我彼所筑者金城铁壁我所筑者土妖血山彼所筑者夺我地为之我所筑者夺民地为之其言切中当时玩细娱而不图大患之病寻上疏极陈备边之策曰以必争之规模夺浮光然後可以全两淮而保长江以必死之规模守樊襄然後可以拒光化而全江陵夫淮之犹可守可耕者以有一綫之河也今涉河而筑浮光乃吾户内若屯於斯畊於斯教训於斯日夜出骑以挠我淮东西俱不可畊矣虽坚城闭壁而坐为禁制不得动矣为吾之计当勉谕淮阃尽力以争浮光则两淮犹可安枕也万一樊襄不牢彼反夺之则江陵孤注尚足恃哉为吾之计当择荆之猛将责以必死之规模守樊襄则北可拒光化南可全江陵一则思所以夺其地二则思所以争其民则对垒之胜负决当在此而不在彼矣识者谓公此疏真活国之良剂朝廷不能用以至於亡而公言无不验重为之太息焉御史洪天锡劾内官卢允升董宋臣不行而去公移书宰相勉以行申屠嘉之事且抗疏援膏肓二竖为喻曰何陛下爱其国不如爱二竖之甚乎汉唐之季建置天子在奄竖掌握罪大恶极朝廷不能诛之天下必有起而诛之者汉之宦官陈蕃窦武争之不胜并州之将操戈而殪之唐之宦官宋申锡攻之不胜河中之帅移兵而屠之小人之在君侧操心何所不至其所以不敢动於内者盖有所惮於外若外不足惮则无忌惮之心生无忌惮之心生而无君之恶动矣言尤激烈上览之不悦公遂称疾求去丁大全方以台长用事欲鉤致诸贤公见几而作谒告径行董丞相槐劝公不必远引公曰丞相且自照管越数月果为大全所击而去吴公潜拜左丞相公亦召还会国子博士徐庚金等言大全虽去相位而六贼尚存乞诛之以谢天下上谕潜不当汲引庚金等议论纷纭潜於榻前自辩上为之敛容而隙自此开先是鄂渚危急上命似道提师江陵似道奏请下流兵权潜奏鄂以上既属似道鄂以下当属赵葵上不从径以下流并听似道节制凡似道密奏外廷不得预闻上反以不知边报为潜罪及台臣奏忠王之立人心所属潜独不然奸谋叵测潜遂罢相中外惴惴疑必有後命公上疏曰天下之所同好我独恶之天下之所同非我独是之则为人上者亦难知矣大抵上易知则下亲上难知则下畏下亲则上安下畏则上孤窘迫而求之一缓而遣之号呼而进之一唯而退之旁观沮缩何以作人任事之气乎上问为谁公奏臣不敢直指愿陛下曲回天怒以安中外上乃首肯而榻前欸密之言外廷无闻知者既而似道入相希指论公者章连上矣度宗即位公乃还朝上见甚喜欲大用之公乞命朝臣为知县以重其事权专以均田税正版籍均力役劝农桑崇孝弟训士卒除盗贼为考课之法有旨从所奏後沮不行此公之忠说见於立朝者也信州措置军粮失宜召乱朝廷以江东臬事付公闻命就道及境或来言城中事劝公偃旗息鼓而过公笑不荅即日单骑入州决狱一城肃然密戒能事者访得乱卒姓名擒其凶渠逆党悉置於法事平有诏褒谕比公於韩魏公云公於他狱事莫不尽其情故一路无冤民而盗贼屏迹及将漕江西有献议於庙堂请以铜钱一当十委公自江西行之公抗言其不便而止请行賑糴以救民饥乞蠲和籴以苏民病有女妖以左道惑衆邻郡愚民十百成羣踵门徼福公杖而流之由是遂息此公之绩用见於出使者也盖似道柄国十有六年公屏居者十年谏则不行言则不聽而施于有政者又厘厘若此此有志之士所以美其际运之盛而措其设施之未究也公天稟卓絶於书无所不读而会于理学以为归宿自为幕职官至秉麾持节所至以教化为先务暇日辄从容庠序间授学者以求端用力之方自躬行上起自人伦

日用上起婺之东阳有好事者创义学迎致公为之师从游者数百人闽人林光世夤缘宦竖而赐出身及为漕东常平使者首劾公不当俯就义学之招婺州之命由是而寢公遂即家建塾以私其徒後以从官侍经帷每事启沃以格君心度宗眷遇之甚至问公讲授之所赐御书扁额曰石峡书院仍赐手诏褒之江南新附乡寇猖獗官舍民居尽毁而书院岿然劫火之余葺治既完诸生稍来集公倡明正道以致知力行名其堂以仁义礼智名其斋时所在士风颓靡公所以振起而作新之者成效甚着此则公自任以师道之重期於继往圣而开来学者也公所着有孝经解一卷易外传【阙】卷尚书释传【阙】卷中庸大学注释【阙】卷格物入门一卷行於世公人物魁岸声如洪钟磊落如青天白日浑沦醇厚不见涯涘观书至老不废视纷华盛丽事蔑如也待诸父昆弟子侄各尽其礼接物以诚而无不悦服不为察察而自莫能欺公卒于至元二十八年正月三日享年七十有一以三十年三月二十九日葬于县西之安溪娶邵氏封令人再娶朱氏子男三人长梁太学生次栋次杰女三人长适修职郎无为军无为县主簿徐敏中次适武学生项雄飞次适邵元廷孙男四人女三人曾孙男七人女一人仲子栋季子杰入皇朝并以儒起家栋月泉书院山长杰长州县学教谕然皆恬於进取不至显位栋之孙炜之子道鼐始以至顺元年擢进士第今自翰林国史院编修官出为嘉兴路总官府推官阶承务郎石峡书院既领於有司而设弟子员道鼐病其痹迫弗称乃以公之故居广其居址而新其栋宇弦诵之声不减於公在时先儒有言道不行百世无善治学不传千载无真儒公之道虽不行於当时而其学有以传於後世夫何憾乎潛之曾大父左曹府君实公榜中进士托斯文之雅故於公门四世有年矣今所述乃学士大夫之公言非潛之私言也来者尚有考焉至正十年正月三日年家生翰林侍讲学士中奉大夫知制诰同修国史同知经筵事黄潛表翰林学士承旨荣禄大夫知制诰兼修国史张起岩篆额荣禄大夫御史中丞许有壬书丹

石峡书院蛟峰先生碑像赞 何梦桂

大原孔孟的????朱张忠恕弘毅刚大直方义存出处道系存亡立言垂训德久弥光

拜观先师蛟峰先生历任岁月与平生着述有感

诗 徐持敬

灵蛟久化想仪型座上春风十载情青史定书名法从白头犹有老门生痛心无复丘原起病眼相看涕泪横綠鬢功名好孙子遗言一一赖编成

挽蛟峰先生诗 方一夔

前代衣冠第一人老来鸣道振遗音勲庸臣子平生志书易圣贤千古心士愿执经来鹿洞客求挟册售鷄林飞仙虽去斯文在山阁神光照斗参

石峡书院增田记

学校养士之地理义以养其心廩粟以养其身易象以养正蒙养内也需以饮食需养外也此需之所以次蒙井田学校之设先王君师天下之道盖如此石峡书院故侍读尚书蛟峰先生方公平居讲道之所公以魁彦师表後进东南之士多裹粮从之教虽勤未及於养他日公之子梁栋诸弟捐田二顷有畸以成先志然远在吴会岁入租不足贍长此山者率欲兴举往往有其志无其时至大己酉秋淳安邑长爱祖丁承事亦既新县学增学田矣一日谒先圣於书院顾瞻久之慨然曰吾将以县学成规行之比会廉访分司僉事吴公举按部莅止有作新意应午时承乏代庖因以为请公即命邑长董其事府檄下亦如之乃礼谕诸生庀工缮修视昔壮观士之裕於家者乐以田入凡若干亩春秋之祀廩膳之资修葺之费胥此焉出多士懽然属应午为之记窃惟道之大原出於天而寄于人明道以淑人师儒之善教也广田以养士贤大夫之善政也士频困征役身且不暇养况心乎邑大夫能以庠序教养为心乡所躡踐者折节而下之乡所腴削者继粟而贍之意气感召不令而从为书院立数千百年方来之规意亦勤矣为士者可不知所以自养乎子程子曰古之人耳之於乐目之於礼左右起居动息皆有所养今皆废之独有义理之养心耳游於斯者必礼畊义种耨之以学涵养其本心以茂明先王之道俾得展其大用顾不伟欤应午既述其始末并以前山长方梁义士徐洪父以下所助田租入之数载于碑陰以谄来者永永无忘邑大夫之功至大三年庚戌正月望日权石峡书院事王应午记

重修石峡书院记

唐五代之季天下惟有四书院教法未备也自周程张朱首倡道学而东莱吕氏往复其间略考订殆无余蘊所至皆剏书院聚生徒教养皆备大抵张本道理最大一语呜乎伟哉惟严陵石峡书院故尚书蛟峰方公闲居私淑之所也咸淳辛未公侍读经筵尝被赞书有曰近进士一科文章盛而古意衰鄉以儒硕剏家塾以程朱之学淑其徒朕甚嘉之赐名石峡书院刻之坚珉列於学宫皇元【阙】混一以来崇儒重道形於播告至元戊寅浙西按察僉事夹谷之奇聿至严陵以书院中更多故渐至颓圯命公之子梁为山长任其经理於是所当兴修者次第为之古意复振书院悉用武夷规模置居仁由义复礼近智四斋每旦籤讲略说大义长喻是正之正録明辩之具有程课如六经三史通监纲目近思録通书西铭之类并令通习而东序西序各有揭示二十年间备殫勤瘁後之代者视如传舍教弛而学几废至大己酉淳安邑长爱祖丁为人廉能以新学校为已任适廉访僉事吴公举相继巡按兴念斯文俾董修学事於是庙貌齐宇丹雘相辉过者色然莫不起敬如增学田造祭器新圣师从祀像皆其力也今之俗吏视教化为不切而淳之长官能於此乎用心是诚可书予得已於言乎夫学所以传道受业解惑也苟所传所授不本於正必流为佛老为刑名为功利学非吾儒之学矣虽欲难疑问答求以正之其惑也滋甚後有作者必当开示涂辙使之一出於正撤其蔽而祛其所甚惑庶几无愧菁莪乐育人材之心兑泽朋友讲习之义大学正心诚意之道承学之士与方氏子若孙实嘉赖之至太庚戌中秋後十日陵阳牟璣记

立蛟峰先生塑像记 徐持敬

至顺三年冬十月朔故侍读尚书蛟峰先生方公塑像成诸生徐持敬以下四十二人乃舍菜

以告曰先生以幅巾深衣像带缘如爵谕者每谓宋三百年而此郡山川之灵磅礴块圯仅先生一人出状元高科者盖天下无与为比此足为先生荣然未知先生刚直之气不附时相归翔书院一以教学为事直与白鹿洞同一气象发明子朱子义理之学其功至今百余年且不废进士人品盖所不论学者来登先生堂诵先生书峡山苍然峡水泠然与道为体仰之瞻之自有得见先生於目睫间者塑像之设此其立畏之一端耳旧先生有石刻立像今始为塑坐像於是直学应珪适摄院事尝移县葺殿堂斋序既备新作棖星门县长索罗来任其事继而令尹刘彭壽簿徐不花相与獎成之惟先生尚其有光於斯文俾诸生益开其志於远者大者礼成乃丹书刻于石以昭成典赞曰峡山之秀西挟紫阳以聯其峩峡水之长东会新安以同其波圣贤之泽有如元气浑然太和仰瞻先生百世之下不屈不阿

立塑像祭文 徐持敬

惟正气蟠薄天地间公得之而生自魁天下而为名法从其耿耿不死者空山林下今犹若见之爰立肖像所以立人心之畏也斯文之重百世是依敢告

蛟峰外集卷三

山房先生外集卷四

钦定四库全书

山房先生外集卷四 宋 方中 续辑

贺山房先生得孙 方士夔

晚节归来绿野堂传家衣鉢付诸郎喜存千载古壘洗初听九苞雏凤凰春早桐枝新擢秀日
长棣萼膺流芳公家好事聯翩在首寄篇诗写弄璋

贺山房先生得宣命 卢可庵

自从骢马到清溪净洗江山絶点埃霜月高擎随地转春风吹喜自天来皇华礼遣荣花县宣
命恩浓出栢台海内苍生望霖雨庙堂正要栋梁材

赠山房先生得宣命 何昭德

飞凤翩翩下九阍先生出处重斯文不将钟鼎易朱绂要老桐山守白云处士一生纯是晋逸
民千古尚为殷皇家恩意如天大定把三峰乞与君

贺山房先生入新居 方一夔

紫阳从西来孤峰望吴越自昔有佳人高蹈造理窟雉山走其下清淑鬱未发吾宗紫阳民秀
挺鸾凤骨家学印大程南北斗柄揭尔来卜新居佳气渺葱鬱天香生桂兰野性老薇蕨嬉戏
独乐园翛然立清絶我来坐庭隅幽草澹风月图书有真趣为指掌中诀

奉谢山房先生 古杭赵春洲

驿骑临门意澹然肯将钟鼎换林泉碧云遥望半千里白髮惊嗟十五年鴈挟西风归楚塞潮
随暮雨泪吴天拙吟不是公题品安得山人姓字传

石峡书院山房先生碑像赞

金舂玉应絶学是续???宗紫阳规循白鹿以身卫道障川回澜大节无亏进退可观

挽山房先生 何梦桂

东壁无光夜陨星为公痛哭泪沾襟才高不竟平生志身死空留万古心听曲谁能歌白雪知

音徒拟铸黄金伤嗟迟暮遭吾道恨不相从九地深

又

病入膏肓药砭难绵绵相忆劝加飧击奸曾籍青萍劒报德惭无白玉盘树檟未成年岁暮枯
桑犹在海风寒平生书至将盈篋泪洒长笺不忍看

祭山房先生文

士生天地间要不偶然盖有数存其盛衰关乎时运消长系乎斯文是皆非人之所为而委
命於天者为之吾固尝历数一代之人物上下十数年间凋谢殆尽而奄奄如木之遭霜落落
如星之向晨岂果时之不齐而斯文将至於夷泯乡之硕德伟望今几何人如吾山房先生者
才有用而位不大学未尽试而志不克伸謫迺迴乎吾道而重以多故之忧殷鸡呼起起而偶
值夫龙蛇之厄辰天之降丧吾是以伤夫折足之麟追维曩昔每握手论议至於书问之相闻
惟长吁太息为之蒿目而眉顰患难相救骨肉弟昆惟气同而志合故情至而义敦睠兹交道
匪直旦暮不知者谓近托乎婚姻今遽如许吾与谁亲天不憖遗一老後死者何足与於斯道
而复嗟夫岁月之流驶世故之惊奔静言寤擗不可重陈疾不及省讣不及奔痼於衰病负咎
奚云緘辞絮酒老泪盈襟寄此情血天地鬼神

山房先生外集卷四